

NAQQIUT

Oqaaseqaatit Inatsisartut inatsisissaatut siunnersuut 11. august 2016-imeersaq taarserpaa

(Naqqiutip oqaaseqaatai Inatsisartut inatsisissaatut siunnersuut imigassat aalakoornartut pillugit Inatsisartut allattoqarfiaata naqqiutaa malillugu aaqqinneqarpoq Naalackersuisunut tunniunneqarfissaanik killigititaasoq qaangerlugu tunniunneqarsimasoq naapertorlugu.)

Inatsisissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut

1.1. Siunnersuummut tunngaviusut

Naalackersuisut peqqinnissamut politikkimik Inuuneritta II-mik akuersissuteqareerput. Inuuneritta II-mi qitiutinneqarpoq innuttaasut inooriaasiat aamma inooriaatsit kingunerisartagai, tassa kalaallit innuttaasut peqqissuunissaannut pingaaruteqarnerpaajusutut isigineqartut.

Imigassamik aalakoornartortalimmik hashimillu atornerluinerit Kalaallit Nunaanni ullumikkut innuttaasut peqqissuunissaannut immikkut ajornartorsiutaanerpaajupput. Ilisimatusarnerup takutippaa persuttaasarneq aamma imminut toqunnissamut eqqarsaatit meeraanermi imigassamik ajornartorsiuteqartunut attuumassuteqarsimanermut attuumassuteqarluinnartuusut.

Taamaattumik Inuuneritta II-mi imigassaq aalakoornartortalik aamma hashi sammisassatut pingaarnerpaajusutut toqqarneqarpoq, tassami atornerluineq meeqqat, inuusuttut ilaqutariillu ajornartorsiuteqartarnerannut annertuumik pissutaasarmat.

Taamaattumik, Inatsisartut Inatsisaata normu 11-p, 11. november 2000-imeersup, imigassamik aalakoornartortalinnik nioqquteqartarnermut sassaalliteqartarnermullu tunngasup allangortinneqarnera siunissamut pitsaaliuinerimut peqqinnerulersitsinissamullu pilersaarutinut tapertaasussatut, isigineqassaaq aamma pitsaaliuinerup pilersaarusiorderneranum ilaatut.

Tamatumunnga ilutigitiillugu peqqinnissamut politikkiminni Naalackersuisut kissaatigaat Nunarsuaq tamakkerlugu Peqqinnissamik Suliniaqatigiiffiup (WHO-p) inassutigisaata aammattaq ersersinneqarnissaat. WHO-p nunarsuaq tamakkerlugu pilersaarutaani 2008-meersumi imigassaq aalakoornartortalik imigassamullu aalakoornartortalimmut attuumassuteqartut ajornartorsiutit pitsaaliorneqarnissaat qitiutinneqarput. Imigassaq aalakoornartortalik toqujaartarnermut innarluuteqalersarnermullu patsisaanerpaajusut pingajuattut taaneqartarpoq. Tamatuma saniatigut

Kalaallit Nunaanni innuttaasunik misissuineq 2014 innersuussutigineqarpoq. Misissuinermit qitiutinneqarput ilaatigut sammisat innuttaasut kalaallit peqqissuunissaannut pilersaarut 2013-2019, Inuuneritta II, tassa: nerisaqarneq, tupatortarneq, imigassaq aalakoornartortalik aamma timi atorlugu sammisaqarneq. Taamatuttaaq misissuinermit sammisat misigissutsimut tunnganerusut ilaatinneqarput soorlu imminut toquttarnermi ileqqut, kinguaassititigut kannguttaatsuliornerit aammattaaq persuttaasernerit aamma tamakku angerlarsimaffimmi imigassamik ajornartorsiuteqarfiusumik imminnut attuumassuteqarnerat.

Naalackersuisut imigassanut aalakoornartortalinnut tunngasumik inatsimmik allangortitsinermikkut inassutit WHO-mit iliuuseqarfignissatut innersuussutaasut malinniarpaat, ingammik takuneqarsinnaanerinit aamma pissarsiariuminarsinnaanerinit tunngasut aammattaaq sassaalliteqartarfinnut malittarisassaliornikkut taakkulu nakkutigineqarnerisigut.

Taamatuttaaq piviusumik paasinarsisimavoq imigassaq aalakoornartortalik pillugu inatsisitigut nutarnerinissaq pisariaqartuusoq.

Inaarutaasumillu Inatsisartut ukiakkut 2012-imi ataatsimiinnerminni aalajangiiffignissatut siunnersuut akuersissutigaat imatut imaqartoq: *“Imigassamik aalakoornartulinnik nioqquteqartarneq sassaallertarnerlu pillugit Inatsisartut inatsisaanni nr. 11, 11.november 2000-imeersumi §§ 11 aamma 12-imi imigassamik kimittuunik kimikitsunillu nioqquteqarnermi piffissaliussat tuniniaaffiusartut tallimangornermi aamma arfininngornermi nal. 21.00-ip tungaanut sivitsorneqarnissaat siunertaralugu allannguutissatut siunnersuummik Naalackersuisut saqqummiusseqqullugit peqquneqarnissaannik Inatsisartuni aalajangiiffignissatut siunnersuut”* Aalajangiiffignissatut siunnersuut taanna kingusinnerusukkut atorunnaarpoq Inatsisartunut 12. marsi 2013 qinersisoqarneranik pissuteqartumik.

1.2. Inatsisissap piareersarnerani immikkoortut pingaarnerit.

Imigassat aalakoornartortalit pillugit inatsisissap nutaap suliarineqarnissaanut suliarisassanut nassuiaassummi takuneqarsinnaavoq suliarinninneq aqutsisooqatigiinnit aqunneqassasoq. Aqutsisooqatigiit katitigaaneranni sinniisooqartinneqartut tassaapput: Imigassaq Ikiaroorartullu pillugit Siunnersuisooqatigiit, Politimestereqarfik aammattaaq KANUKOKA, Kalaallit Nunaanni Sulisitsisut (GE), aamma Peqqissutsimut Naalackersuisoqarfimmi immikkoortortaqaqarfimmi pisortaq ataaseq, kiisalu Peqqissutsimut Naalackersuisoqarfimmi pisortaq siulittaasutut inissisimasoq.

Aqutsisooqatigiit suleqatigiissitanik pilersitsippat taakkunani sinniisuutitaqarlutik Kalaallit Nunaanni Politimestereqarfik, akunnittarfiutillit aamma neriniartarfiutillit soqutigisaqatigiiffiat, pisiniarfiutillit, kommuneqarfiit, KANUKOKA, Imigassaq Ikiaroorartullu pillugit Siunnersuisooqatigiit aammattaaq Peqqissutsimut Naalackersuisoqarfimmi immikkoortortaqaqarfimmi pisortap aamma fuldmægtigut taakku qulakkeerinnittussaallutik ajornartorsiutit attuumassuteqartut inatsimmik suliaqarnermut ilanngunneqarnissaannut.

Suleqatigiissitat Inuuneritta II-mi aamma WHO-mit inassutigisat aallaavigaat, tassa Ilaqtariinnermut Peqqissutsimullu Ataatsimiititaliamit UKA 2012-mi isumaliutissiisummi tunniunneqartumi kiisalu maleruaqqusani atuutereersuniittut.

Suleqatigiissitat sulinerminni immikkut eqqartorpaat akuersissuteqartarnermut aalajangiisartut, imigassanik aalakoornartortalinnik sassaalliteqarsinnaanermut nioqquteqarsinnaanermullu akuersissutit, imigassat aalakoornartortallit pissarsiariuminarerat aamma pinaveersaartitsinermi iliuusissat tamatumunnga ilanngullugit meeqqat aamma inuusuttut imigassanik aalakoornartortalinnik atuisarnermi ileqqui. Taamatutaaq suleqatigiissitat peqataaffigaat ajornartorsiutinik piviusunik qulaajaanermi. Taamaattumik inatsimmik suliaqarnermi immikkut salliutinneqartut tassaapput meeqqat aamma inuusuttut imigassanik aalakoornartortalinnik atuinermi ileqqui.

Tassunga atatillugu oqallisigineqarpoq imigassap aalakoornartortallip pissarsiarisinnaanerata aamma saqqumitinnerarata imigassamik aalakoornartortalimmik imertarnermut, kiisalu ataatsimut isiginnilluni imigassamik aalakoornartortalinnik atuinermi ileqqunut qanoq sunnuteqarnera, aammattaaq malittarisassaliornissami siunertamut tulluurtunik naleqqussaansat.

Aammattaaq imigassanik aalakoornartortalinnik kimittuunik aamma kimikitsunik immikkoortitsisinnaaneq, inatsisip nakkutigineqarnerani misilittakkat, kiisalu unioqqutitsisoqarsimappat kinguneqartitsinissamut periarfissat oqaluuserineqarput.

1.3. Siunnersuutip imarisai ataatsimut isigalugit.

Siunnersuummut ilaapput allannguutissat taakku imigassat aalakoornartortallit kikkut tamat ornittagaanni takussaavallaarnerat killilissavaat. Ilisimatusarnikkut takutinneqarpoq atuisartut amerlasuut isigisamikkut misigisaminnik aqunneqartartut. Taamaattumik naleqqusnaanermut tungaviuvoq ilaatigut nittarsaassinerup pitsaanngitsumik kinguneqartitsisarnera, ingammik meeqqanut inuusuttunullu ataatsimut imigassanik aalakoornartortalinnik paasinninnerat aamma inuunerminni kingusinnerusukkut imigassanik aalakoornartortalinnik tunngatillugu ileqqoqalertarnerannut. Tassuuna takuneqarsinnaasut tunngavigalugit siunnersuummi ilanngunneqarpoq imigassanik aalakoornartortalinnik nittarsaassisarnermik inerteqquteqalernissaq aamma imigassanik aalakoornartortalinnik pisiniarfinni nioqqutissanit allaniit assiaqusersuinissaq. Imigassanik aalakoornartortalinnik pissarsisinnaaneq allanngortinneqanngilaq. Misissuinerne takutinneqarpoq ingammik imigassaq aalakoornartortalik timimik ajoqusiisartoq aamma sivisunerusoq eqqarsaatigalugu imigassap aalakoornartortalik ajoqusiisartoq kiisalu inuusuttut aalakoornartortalinnik imigassartortarnerminni ileqqunik pitsaanngitsup tungaanut ingerlatsitsilersartoq. Siunnersuummi imigassat aalakoornartortallit inatsimmi ilaatinneqarnissaanut killiliussa qappartinneqarpoq 2,25-mit 0 volumenprocentimut, kiisalu imigassat aalakoornartortallit immikkoortunut arlalinnut agguarneqarlutik, tassa imigassanik aalakoornartortalinnik

nioqquteqarsinnaanermut/sassaallersinnaanermut akuersissummik pisaarnissamut sunniuteqartut. Tamatuma saniatigut siunnersuummi ilanngunneqarput nioqquteqartarnermut aamma sassaalliuteqartarnermut ammasarfiit allangortinneqarnerat, aammattaaq aalajangersakkat imigassanik aalakoornartortalinnik kimeqarnerusunik (imigassat kimittuut) atuinerup annikillisinneqarnissaanut sammisut ilanngunneqarput. Kommuneqarfinni ataasiakkaani akuersissuteqartarnermut aalajangiisartunik pilersitsisoqassaaq. Akuersissuteqartarnermut aalajangiisartut maannakkut kommunalbestyrelsit pisinnaatitaaffeqarnerannit taarsiissapput kiisalu suliamut tunngasunik toqqaannartumik ilisimasanut tapertaassallutik.

2. Siunnersuummi immikkoortut pingaarnerit

Maannakkut inatsisitigut atuutsitsinermi imigassat aalakoornartortallit immikkoortunut marlunnet agguarneqarput, imigassat kimikitsut 2,25-miit 4,10 angullugu volumenprocenteqartuullutik imigassallu kimittuut 4,10-mik imaluunniit taanna qaangerlugu volumenprocenteqartuullutik.

Inatsisissap piareersarneranut atatillugu imigassat kimittuut kimikitsullu agguataarneqarnissaat oqaluuserineqarput piffissanut ammasarfinnut akuersissuteqartarnernullu taakkununnga marlunnet tunngatillugit. Illuatungaaticut politikikkut kissaatigineqarpoq imigassamik aalakoornartortalimmik atuinerup ataatsimoortumik annikillisarneqarnissaa aappaatigullu aammattaaq politikikkut kissaatigineqarluni imigassanik aalakoornartortalinnik nioqquteqartarnermi piffissat ammasarfiit sivitsorneqarnissaat. Isummat taakku marluk siunnersuummi matumani mianeralugit ilalersorniarneqarput.

Tamatuminnga tunngaveqartumik siunnersuutigineqarpoq imigassanik aalakoornartortalinnik nioqquteqartarnermi aamma sassaalliuteqartarnermi tamarmiusut 0,00 volumenprocentimik taannalu qaangerlugu kimittussutsimut killeqartinneqassasut. Taamaalilluni imigassat aalakoornartortallit pineqartillugu killiliussaq 2,25 volumenprocentimit 0,00 volumenprocentimut allangortinneqarpoq. Tamatuma kingunerisaanik meeqqat aamma inuusuttut 18-it inorlugit ukioqartut imigassanik aalakoornartortalinnik suugaluartunilluunniit pisiaqarsinnaatitaanerit unitsinneqarpoq.

Imigassamik aalakoornartortalimmik akuttunngitsumik atuinerup imigassamik pinngitsuuisinnaanissamut navianartorsiorneq annertusittarpaa, kiisalu imigassamik atuinerup appasinnerpaaffissaanik qularnaatsumik nanissaasoqanngilaq, tamatumani pineqarput pinngitsuuisinnaanerup ineriartornera inunni taamaattunngornissamut qanittuni.

Taamatutaaq imigassamik atuinerup appasinnerpaaffissaanik qularnaatsumik nanissaasoqanngilaq naartusuni ilumiut ajoquserneqarsinnaanerannut tunngatillugu. Taamaattumik imigassaq peqqissutsimut ajoqusiinnaavoq naak annertunngitsumik atorneqaralarluni.

Isumasiuutip allangortinneqarnissaatut siunnersuutigineqartukku paasineqassaaq imigassaq suna aalakoornartortalittut taaneqassanersoq, taamaalillutik innuttaasut ataasiakkaat sianigissavaat qaqugu imigassartalimmik imernerlutik.

Imigassanik aalakoornartortalinnik nioqquteqarnissamut sassaalliteqarnissamullu akuersissuteqartarneq siornatigutullu kimittussusiat aallaavigalugu immikkoortunut agguataarneqarnissaat siunnersuutigineqarpoq.

Tassani nutaajusoq tassaavoq taamatut agguataarnerisigut akuersissutit ataasiakkaat tulluarsarneqarnissaannut periarfissaqalissammat, taamaaliornikkut imigassat aalakoornartortalit tamaasa ilanggullugit akuersissuteqartoqarsinnaassaaq, taamatullu akuersissuteqartoqarsinnaassalluni soorlu assersuutigalugu taamaallaat immiaaqqanut aamma viinninut tunngasunik.

Iliusissaq nutaaq timersornermut atatillugu aaqqissuussinerni aamma aaqqissuussinerni inuusuttunut tunngasuni imigassanik aalakoornartortalinnik nioqquteqarsinnaanermut/sassaallersinnaanermut akuersissutinik tunniussisoqartillugu pingaaruteqarnerulissaaq. Inatsimmi atuuttumi ullumikkut taamaallaat imigassanik aalakoornartortalinnik nioqquteqarsinnaanermut/sassaallersinnaanermut akuersissummik taamaallaat immiaaqqanik aamma viinninik aammattaq imigassanik kimittuunik ataatsimoortumik pissarsisoqarsinnaavoq. Misissuinerit takutippaat ingammik imigassat aalakoornartortalit kimittuut timimik akornusiisartut aamma piffissami sivisunerusumik immigassamik pissuteqartumik ajoquteqalertoqarsinnaasoq.

Malittarisassani maannakkut atuuttuusuni mittarfeqarfinni kioskini hotelinilu unnuisulinni piffissami 06.00-12.00-imit sassaalliteqarsinnaanermut immikkut akuersissuteqartoqarsinnaavoq. Tamanna allangortinnagu atuutsiinnarneqassaaq.

Takornariaqarnerulerneq angallatinillu attartortitsisartunit ujartuisoqarnera tunngavigalugit nutaatut siunnersuutigineqarpoq aammattaq takornarianut ingerlatsinernut atatillugu imigassanik aalakoornartortalinnik immikkut akuersissuteqartoqarnikkut sassaalliteqarsinnaanissaaq. Imigassanut aalakoornartortalinnut 16 volumenprocentit ataallugit kimittussusilinnut (soorlu immiaaqqat aamma viinnit) ammasarfiit siunnersuummi ulluinnarni akunnernik marlunnik sinnersuummi sivitsorneqarpoq, taamaaliornikkut nal. 20.00-imut nioqquteqarneq ammasarsinnaalluni arfininngornernilu nalunaquttap akunnerinik pingasunik, tamatuma kingunerisaanik nal. 16.00-ip tungaanut nioqquteqartarneq ammasarsinnaalluni.

Tamatuma saniatigut imigassanik aalakoornartortalinnik ukiutoqqami nal. 13.00-ip tungaanut nioqquteqarsinnaaneq ammaaffigineqarpoq. Tamatumuunakkut naatsorsuutigineqarpoq ukiortaap nalliusseranut atatillugu immikkut nioqquteqartarnerup pitsaanerusumik ingerlanneqarsinnaanera.

Aalajangersagaq tunngavigalugu ukiortaamut atatillugu katillugit nioqquteqarnerusalernissaq naatsorsuutigineqanngilaq.

Ammasarfiit imigassanut aalakoornartortalinnut assut kimittuunut 16-inik imaluunniit taanna qaangerlugu volumenprocenteqartunut (imigassat kimiittuut) ammasarfiit allanngortinnagit taamaaginnartinneqarput, taamaalilluni ulluinnarni 18.00 tikillugu kiisalu arfininngornikkut 13.00 tikillugu nioqqutigineqarsinnaanerata ammasassaaq.

Siunertarineqarpoq imigassanik aalakoornartortalinnik kimikinnerusunik soorlu immiaaqqanik aamma viinninik pisisinnaanerup ajornannginnerulernissaa, kiisalu ingammik inuusuttut imigassanik aalakoornartortalinnik kimittoorsuarnik (viinni akusat aamma imigassanik kimiittunit) atuinerat killilerniarlugu, taamaaliornikkullu imigassanik aalakoornartortalinnik atuinermit ileqquusut naleqqunnerusunngortinnissaat aqunniarsarinjarlugu.

Taamatuttaaq siunnersuutigineqarpoq imigassat aalakoornartortalit ersittumiitittarnerannut piumasagaatit sukannerulerinneqarnissaat siunnersuutigineqarpoq.

Siunnersuutigineqarpoq aalajangersakkamik ilanngussisoqassasoq imigassat aalakoornartortalit tamarmik 0,00 volumenprocentimik taannalu qaangerlugu kimittunerusut niuertarfimmi nioqqutissanit allanit assiaqusersorneqarnissaannik. Niuertarfinni anginerusuni imigassanik aalakoornartortalinnik nioqqutissanit allanit assiaqusiineq inimik allammik immikkut isertarfilimmik pilersitsinikkut ingerlanneqassalluni. Pisiniarfinni mikinerusuni allatut iliorluni imigassat aalakoornartortalit assiaquserneqassapput immikkoortumik immikkut pilersitsisoqarneratigit, tassani imigassat inissinneqassapput imaaliallaannaq takuneqarsinnaatinnagit.

Assiaqusiinermi ilaatigit siunertaavoq meeqqat siunertaqanngitsumik sunnerneqarnissaannut illersorneqarnissaat, tamatumunnga ilanngullugu imigassat aalakoornartortalit meeqqanit nioqqutissatut nalinginnaasutut ulluinnarnini isigineqannginnissaat.

Ilisimatusarnikkut misissuinerit takutippaat atuisartut amerlasuut takusaminnik aqunneqartartut.

Tamatuma saniatigit nalinginnaasutut ilisimaneqarpoq nioqqutip inissinneqarnera, taamaalillunilu takuneqarsinnaanera nioqqutip tunissaaneranut sunniuteqartartoq. Ilaatigit retailimi taaneqarpoq – takuneqartussat annertunerpaamik malugineqarnissaannik siunnersuut, tamatuma kingunerisaanik iluaqutaasumik “pisisartut pisiniarfimmi aqutigisaat allanngortinniarneqassalluni taamaalillutik pisiniarnerminni nioqqutissanik amerlanerusunik takusaqarsinnaatillugit.”. “Tassami takusassiarineqartunik malugininneq pingaaruteqarluinnarpoq – ingammik nioqqutissanik pisiariniarlugit pilersaarutaanngitsunik tassanngaannaq pisiaqarnermut atatillugu.....”.

'Misissuinermit (2015) nunanit 37-nit peqataaffigineqartoq danskeq ph.d. Pernille Bendtsenimit Statens Institut for Folkesundhedimeersumit siuttuuffigineqartumi inerniliunneqarpoq, imigassamik pilerisaarineq aamma 13-init – 115-inut ukiullit imigassamik annertuumik atuinerat imminnut attuumassuteqartut. Ilisimatusarnermik suliaqartut uppernarsisinnaanngilaat pisut imminnut toqqaannartumik attuumassuteqarnerisut, kisianni takusinnaavaat attuumassuteqartoqartoq. Misissuinermit takuneqarpoq malunnarluinnartumik attuumassuteqartoqartoq sapaatit akunnerit tamaasa imigassamik najorsineq aamma nunani imigassamik nakkutilliinermut politikkit imminnut attuumassuteqarnerat, siunnersuutigalugu imigassamik aalakoornartortalinnik pilerisaarinermit inerteqqutaalernera tassaasooq iliuusissaq pitsaasooq akuttunngitsumik imigassartortarnerup annikillisinneqarnissaanut.'

EU-mi Underudvalget for Naturressourcer "*Pinngortitamut isumalluutit ataani ataatsimiititaliap*" 2016-imi aasaanerani ataatsimiinnermut EU-mi imigassaq pillugu iliuusissatut pilersaarutip pisariaqassusia aqqutissiuunnarlugu, qulequttat ilagaat nittarsaassineq tassunga tunngatillugu imatut allattoqarpoq:

"Nittarsaassineq – ilisimatusarnikkut misissuinerup takutippaa meeqqat inuusuttullu nittarsaassinermit eqqugaasernerat annertusiartuaartillugu, taava annertusiartuaaginnartarpoq imigassartortalernissaanut navianartorsiorneq imaluunniit imigassartortarnerisa annertusinissaat. Inuit attaveqatigiittarfii aqqutigalugu aamma internetikkut nittarsaassinerit aamma pilerisaarinerit mianerisassatut isiginiarneqartariaqarput, soorlu assersuutigalugu aqqissuussinernik tapersersuilluni aningaasaliissuteqartarneq, nioqqutissanik inissiisarneq aamma nioqqutissat taakku sanianniittut, tassa imigassat suunerinut ilisarnaatinut attuumassuteqartut."

Nittarsaassinermit inerteqquteqarneq tupamut tunngasuni ilisimaneqarpoq, tassani tupanik nioqqutissianik nittarsaassinerup inerteqqutaanera peqqissutsimut akornutaasinnaasunik aamma naleqqutsinngitsunik ileqqoqalernissamut ullutsinni illersuutit isigineqarpoq.

Imigassamik aalakoornartortalinnik sassaalliuteqarnissamut/nioqquteqarnissamut piumasaaqatit allannguuteqanngingajapput. Taamaattorli siunnersuutigineqarpoq piumasaaqammik ilanngussisoqarnissaanik, tassa qinnuteqaateqartoq 50.000 koruuninik imaluunniit taakkuninnga amerlanerusunik pisortanut akiligassaareersunik akiitsoqassanngitsooq, taassuma akuersissummik tunineqarnissani kissaatiguniuk.

Nutaatut siunnersuutigineqarpoq imigassamik aalakoornartortalinnik sassaallersinnaanermut/nioqquteqarsinnaanermut qinnuteqaateqarnermut ilanngullugu suliffeqarfiup imigassartortarnermut politikkaa ilanngunneqassasooq tamannalu akuersissuteqartarnerup ingerlaasianut ilanngunneqassasooq. Ataasiaannartumik atuuttussamik akuersissutit taamatut piumasaaqateqartarnermut ilaatinneqannginnissaat siunnersuutigineqarpoq, taamaattorli ataasiaannartumik atuuttussamik qinnuteqaammut ilaatinneqassalluni aqqissuussinermut

pilersaarusiaq, taamaaliornikkut aaqqissuussinermi sassaalliuteqarnerup aamma ingerlatsinerup akisussaassuseqartumik ingerlanneqarnissaa qulakkeerneqarniarpoq.

Aalajangersakkat atuuttut tunngavigalugit kommunalbestyrelsi tassaavoq imigassanik aalakoornartortalinnik sassaallersinnaanermut/nioqquteqarsinnaanermut akuersissutinik tunniussisartut aamma arsaarinnissuteqartartut. Taamatuttaarlu kommunalbestyrelsi tassaavoq akuersissummut atatillugu piumasaqaataajunnartunik aalajangersaasartaq.

Piginnaatitaanerup tamatuma akuersissuteqartarnermut aalajangiisartunut tunniunneqarnissaa siunnersuutigineqarpoq. Akuersissuteqartarnermut aalajangiisartunik pilersitsisoqarnissaanut siunertaavoq suliamut tunngatillugu atitunerusumik piginnaasaqarnermik ilanngussisoqarnissaa. Ilisimasaq tamanna suliamik sammisaqartut ulluinnarni sulinerminni qitiutissinnaavaat ajornartorsiutit imigassamik pissuteqartut, taamaattumillu imigassanik aalakoornartortalinnik sassaallersinnaanermut/nioqquteqarsinnaanermut akuersissutinik tunniussinerni, sivitsuinerni aamma arsaarinnissuteqarnerni aalajangersaanerni peqataassallutik.

Taamaattumik siunnersuutigineqarpoq akuersissuteqartarnermut aalajangiisartut arfineq marlunnik ilaasortaqaassat, katitigaanerallu tassaassalluni: politiiniit sinniisuutitaq ataaseq, ilaasortaqa ataaseq akunnittarfinit aamma neriniartarfinit, takornariaqartitsinermik ingerlatsisunit aammattaaq pisiniarfinit sinniisuutitaasoq, atuarfeqarfinni imaluunniit peqqinnissaqarfimmit sinniisuutitaq ataaseq, kommunip isumaginnittoqarfianit sinniisuutitaq ataaseq, kommunimit pinaveersaartitsinermut siunnersorti ataaseq aammattaaq kommunalbestyrelsemi ilaasortat marluk.

Immikkut pingaartinneqarpoq akuersissuteqartarnermut aalajangiisartut imigassanik aalakoornartortalinnik atuinerup annikillisinneqarnissaanut aamma atuinermi naleqquttumik ileqqoqarnissap siuarsarneqarnissaanut mianerisassat eqqarsaatigisassagaat, taamatuttaaq qulakkeerneqassaaq imigassanik aalakoornartortalinnik sassaalliuteqarsinnaanermut nioqquteqarsinnaanermullu akuersissummik tunisisoqartillugu kinaassusersiunnginnerup tunngavigineqartarnissaa.

Imigassanik aalakoornartortalinnik sassaalliuteqarsinnaanermut nioqquteqarsinnaanermullu akuersissut siornatigutut ukiuni pingasunik atuuttussanngorlugu tunniunneqartassaaq. Tamatuma kingorna nutaajusutut akuersissuteqartarnermut aalajangiisartut akuersissut atajuartussatut sivitsorsinnaavaat. Tamatumunnga siunertaavoq akuersissummik pigisaqartumut allaffissornermik oqilisaassinissaaq, tassa suliffeqarfiutiminik isornartoqanngitsumik ingerlatsisumut. Suli periarfissaassaaq akuersissutip ukiunik pingasunik sivitsorneqarsinnaanera tamanna ataatsimoortumik nalilersuineq tunngavigalugu tulluarnerusutut isigineqarpat.

Taamatuttaaq akuersissuteqartarnermut aalajangiisartut kommunalbestyrelsip akuersissummik utaqqissaasumik imaluunniit atajuartumik arsaarinnissuteqarsinnaanermut pisinnaatitaaffia

tigummilissavaat, suliffeqarfik isumannaatsumik ingerlanneqanngippat imaluunniit piumasaqaataajunnartunik malinninngippat, tassa akuersissuteqartarnermut aalajangiisartut imigassanik aalakoornartortalinnik nioqquteqarsinnaanermut/sassaallersinnaanermut tunniussineranni piumasaqaataasut tunngavigalugit. Tamatuma saniatigut nutaatut akuersissut arsaarinnissutigineqarsinnaalissaaq akuersissummik pigisaqartoq 50.000 koruuninik imaluunniit taakkuninnga amerlanerusunik pisortanut akiligassaareersunik akiitsoqarpat.

Inatsisissaq piareersarlugu suliarineqarnerani saqqummiunneqarpoq imigassamik aalakoornartortalinnik pissuteqartumik eqqissiviillioertitsisarnerit ilaat ataasiaannartumik atuuttussamik akuersissuteqarsimanernut attuumassuteqartartut. Ineriartorneq tamanna illuatungaanut saatsinniarlugu aalajangersakkamik ilanngussisoqarpoq, tassa aaqqissuussinerni taamatut ittuni imigassanik aalakoornartortalinnik 16 volumenprocentinik taannalu qaangerlugu (viinni akusat aamma imigassat kimittuut) sassaalliteqartoqartassanngitsoq.

Taamattaq siunnersuutigineqarpoq aaqqissuussinernut taamatut ittunut isersinnaanerup killilerneqarnissaa, tassa meeqqat inuusuttullu 18-it inorlugit ukiullit peqataasut angajoqqaaminnik, angajoqqaatut akisussaatitaasumik imaluunniit inersimasumik allamik akisussaatitaasumik inuusuttumut immikkut akisussaassuteqartumik ingiaqateqartussanngorlugit. Ataasiaannartumik atuuttussamik akuersissuteqarnermut tunngaveqartumik sassaalliteqarnermut atatillugu siunnersuutigineqarpoq nal. 24.00-ip tungaanut akuersissuteqartoqartarnissaa, taamaattorli immikkut ittunik pisoqartillugu tamanna sivitsorneqarsinnaalluni.

Nerisassanik angerlaassassanik (Diner Transportable) neriniartarfinni pisinermut atatillugu imigassanik aalakoornartortalinnik pisisinnaanerup killeqartinneqarnissaanut aalajangersakkamik ilanngussisoqarpoq. Tamatuma kingunerisaanik imigassanik aalakoornartortalinnik taamaallaat nerisassanik pisinermut ilanngussilluni nioqquteqartoqarsinnaavoq, tamatumani nerisassat qanoq akeqarnerat imigassat aalakoornartortallit qanoq annertutigisut pisiarineqarsinnaanerannut killiliisuvoq. Taamaalilluni siunnersuut tunngavigalugu imigassat aalakoornartortallit nerisassat akiisa 50 %-iata nalinganut pisiarineqarsinnaapput. Pineqartumi killilersuinerulernermut tunngaviuvoq ilaatigut uniuksimik ingerlatsisoqartarsimaneera, tamatuma kingunerisaanik nerisassanut pisiarisanut naleqqiussilluni tulluanngitsumik annertussusilinnik imigassanik aalakoornartortalinnik nioqquteqartoqartarsimalluni, neriniartarfinnit nerisassanik angerlaassassanik (Diner Transportable) aaqqissuussinermut atatillugu.

Aalajangersagaq nutaaq ilanngunneqarpoq tamatuma kingunerisaanik imigassanik aalakoornartortalinnik nittarsaassineq sunaluunniit aviisini neqerooruteqarfiusuni, aviisini akeqanngitsumik agguanneqartartuni, aviisini ullormut saqqummersartuni, tv-kkut assigisaatigullu aammattaq inuit attaveqaateqartarfiisigut tamani inerteqqaalissalluni. Nittarsaassinermut inerteqqut tupamut tunngatillugu ilisimaneqarpoq tassani tupanik nioqqutissat pillugit

pilerisaaruteqarnermik inerteqqut, ingammik meeqqanik inuusuttunillu peqqinnangitsumik aamma ileqqunik tulluannngitsunik nuannaartorinnilinnginnissaannut illersuutitut nalinginnaasutut maannakkut isigineqalersimalluni.

Taamatut inerteqquteqarneq nittarsaassinerup ajoqutaasumik sunniuteqartarnera isigineqassaaq ingammik meeqqanut aamma inuusuttunut, imigassamik aalakoornartortalimmik ataatsimut isiginninnerannut aamma inuunerminni kingusinnerusukkut imigassanut aalakoornartortalinnut tunngatillugu ileqqoqalernissaannut. Taamatuttaaq siunnersuutigineqarpoq niuertarfiit aamma neriniartarfiit imigassanik aalakoornartortalinnik nioqquteqarsinnaanermut sassaalliteqarsinnaanermut akuersissummik pigisaqartut paasititsiniaanernut Naalakkersuisut aallartitaannut peqataasarnissaat, tassani siunertarineqarluni imigassanik aalakoornartortalinnik atuinermut tunngatillugu tulluarnerusumik ileqqoqalernissaq.

Aalajangersakkap ilanngunneqarnissaa siunnersuutigineqarpoq tassani tapersersorniarlugu sulisaaseq, tassa piginnittup imaluunniit taassuma sulisorisaata pisisartumik iseqqusijunnaartitsisinnaanera, pineqartoq sulisunik imaluunniit isersimasunik aallanik allanik soorasaarisutut pissusilersorpat. Ajornartorsiut inatsisissamik suliaqarnerup nalaani eqqartorneqarpoq tassani saqqummiunneqarluni aalajangersakkamik taamaattumik pisariaqartitsisoqarnera, tassa taamatut pisoqartarneranik pinngitsoortitsiniarluni.

Inatsisissatut siunnersuutip siunissamut politiit nutaanik arlalinnik periarfissippaat pinaveersaartitsinermut suleqataanissaat aamma inatsimmi aalajangersakkat tunngavigalugit kinguneqartitsisinnaanermut.

Tamatuma kingunerisaanik politiit tunngavissaqalerput akuersissummik peqartumut inerteqqutigisinnaalerlugu inuit aalajangersimasut neriniartarfimmut aalajangersimasumut iseqqusaajunnaartissinnaallugit, soorlu assersuutigalugu inuk taanna uteqqiattumik nakuuserniarluni ileqqulersorsimappat imaluunniit allatut isersimasunik allanik akornusersuisarsimappat, imaluunniit politiit qularnaarlugu paasigunikku ikiaroorartut pillugu inatsimmik unioqqutitsisoqarsimasoq. Soorlu assersuutigalugu inuusuttunik 18-it inorlugit ukioqartunik isersimasoqarnissaanut inerteqquteqartoqarsinnaavoq sassaalliteqartarfimmi pissutsit, piviusumik nalilereernerisigut, paasinarpat inuusuttunut 18-it inorlugit ukioqartunut ajoqutaasinnaasut, imigassamik atuinermi ileqqunut pitsaanngitsunut il. il. kinguneqarsinnaappata.

Aalajangersagaq nutaaq ilanngunneqarpoq nipiliorluni, nakuuserluni, ajuallatsitsiniarluni imaluunniit assigisaannik ileqqulersornernik inerteqquteqarneq, taamaaliorneq tassaasinnaappat tamat ornittagaanni eqqissiviillortitsinermik imaluunniit allanut tamaaniittunut imaluunniit eqqaani najugaqartunut akornusersuutaasumik kinguneqarsinnaalluni, tassa sumiiffinni imigassanik aalakoornartortalinnik nioqquteqarfiusuni imaluunniit sassaalliteqarfiusuni. Akuersissummik piginnittoq imaluunniit taassumunnga taartaasoq pissusaavoq nakkutigissallugu inerteqqutit

malinneqarnera, pisariaqarpallu politiinnut ikioqqusinnaavoq. Aalajangersagaq ilanngunneqarpoq kikkut tamarmik ingerlasinnaaniassammata akornusersuinernik taamatut ittunik nalaataqarnatik, aamma ilaqutariittut meerartaqarluni pisiniarfiliartoqarsinnaassammata cafémut isertoqarsinnaaniassammata, meeqqat inuusuttullu taamatut tulluanngitsumik ileqqulersornernik naammattuugaqarnatik.

Taamatuttaaq politiit nakuusertoqarsinnaanera pinaveersaartinniarlugu pisiniarfinni, neriniartarfinni, akunnittarfinni aamma sassaalliteqartarfinni allani kikkut tamarmik iserfigisinnaasaanni init aaqqissuunerannik allannngortitsisoqarnissaanik peqqussuteqarsinnaapput. Taamatut peqqussuteqarnissamut piumasaqaataavoq nioqquteqarfimmu – imaluunniit sassaalliteqartarfimmu ataatillugu immikkut aarlerinaateqarsinnaappat nakuusernermik ileqqulersortoqarsinnaanera.

Iliusissatut nutaatut neriniartarfiit aamma sassaalliteqartarfiit allat pisussaaffilerneqarput naammattumik amerlassuseqartunik matulerisutut sulisussanik atorfinitsitsinissaminnut. Aalajangersakkami siunertaavoq isumagissallugu naammattunik amerlassuseqartunik sulisoqarnissaq neriniartarfimmu imaluunniit sassaalliteqartarfimmu iserniartunik isumaginninnissaq, tamanna eqqissisimasumik aamma torersumik ingerlasinnaaqullugu.

Siunnersuutigineqarpoq inatsisip ulloq xx.xx.20xx atuutilersinneqarnissaa.

3. Pisortanut aningaasaqarnikkut aamma allaffissornikkut kingunerisassai

Naatsorsuutigineqarpoq akuersissuteqartarnermut aalajangiisartut allaffissornermi sulinerat maannakkut killiliussaasut iluanniiginnarnissaa, tassa kommunalbestyrelsip imigassanik aalakoornartortalinnik nioqquteqartarnermut sassaalliteqartarnermullu akuersissuteqartarnermut suliasanik suliarinnittarnerattut. Imigassamik aalakoornartumik atuineq tamarmiusoq appassagalarpat nunatta karsianut kinguneqartussaavoq akileraarutunik annaasaqarnermik. akileraarutinilli annaasaqarneq illuatungeqassaaq peqqinnissakkut inunnillu isumaginninnikkut aningaasartuutikinnerulernermik.

4. Inuusutissarsiutunik ingerlatsisunut aningaasaqarnikkut aamma allaffissornikkut kingunerisassai

Naatsorsuutigineqarpoq aalajangersakkat nutaat pisiniarfinnut aningaasartuutissanik kinguneqarumaartut, tassa imigassanik aalakoornartortalinnik nioqqutissanit allanit assiaqusersuinissaminnut. Pisiniarfinni anginerusuni imigassanik aalakoornartortalinnut inimik immikkut, immikkut isertarfilimmik pilersitsiffiusussani, naatsorsuutigineqarpoq inuusutissarsiutunik ingerlatsisut tamatumunnga pilersitsinissaminnut aningaasartuuteqarnerulernissaat. Taakkununnga ilanngunneqassaaq sulisumut aningaasartuutit, tassa pisiniartunik pisiniartitsisussamik. Pisiniarfiit mikinerusut imigassanik aalakoornartortalinnik assiaqusiinissaminnut toqqaasinnaasunut, tassa pisiniarfiup ilaani immikkoortumik pilersitsinikkut,

taakkununga tamatumunnga aningaasartuutit killeqarnissaat naatsorsuutigineqarpoq, tassa imaammat qanoq assiaqusersuinissamut kiffaanngissuseq annertuujulluni.

Tamakkununga ilutigitillugu naatsorsuutigineqarpoq akuersissutinik pigisaqartunut allaffissornikkut pisariillisaasoqarnissaa, tassami akuersissuteqartarnermut aalajangiisartut nutaatut akuersissut atajuarnerulertussatut sivitsorsinnaalissammassuk akuersissummik pigisaqartumut tunngatillugu, taanna suliffeqarfiutiminik isornartoqanngitsumik ingerlatsippat.

5. Avatangiisinut, pinngortitamut aamma innuttaasut peqqissusiannut kingunerisassai

Naatsorsuutigineqarpoq piffissap ingerlanerani imigassanik aalakkoornartortalinnik atuinerup annikillinissaa tamannalu innuttaasut peqqissusiannut ajunngitsumik kinguneqarumaartoq.

6. Innuttaasunut kingunerisassai

Inatsisip maleruaqqusai siunissaq ungasinnerusoq eqqarsaatigalugu pitsaaliuinermi peqqinnissallu siuarsarnissaanut periusissami tapiutitut isigineqassaaq. Innuttaasunut pitsaasumik kinguneqartitsineq peqqissusermut pitsaasuvoq.

7. Sunniutaasussat allat malunnaateqarluartut

Soqanngilaq

8. Oqartussaasunik aamma kattuffinnik il.il. tusarniaaneq

Siunnersuut piffissami 6. – 10. juunimut 2016 tusarniaassutigineqarpoq ukununnga: Namminersorlutik Oqartussani naalakkersuisoqarfimmut tamanut, Kalaallit Nunaanni kommuneqarfimmut, Nunatsinni Nakorsaaneqarfimmut, KANUKOKA-mut, Kalaallit Nunaanni Rigsombudsmandimut, Kalaallit Nunaanni Politimestereqarfimmut, Kalaallit Nunaanni Eqqartuusivinnut, Kalaallit Nunaanni Eqqartuussisuuneqarfimmut, Kalaallit Nunaanni Sulisitsisut Peqatigiiffiannut, tassunga ilanngullugit Hotelinik aamma neriniartarfinnik soqutigisaqatigiit, Kalaallit Nunaanni Niuernermik, Sullissinermik aamma Assartuineramik suliaqarnermik ingerlataqartunut, Imigassaq Ikiaroorartullu pillugit Siunnersuisoqatigiinnut, PiSiu (Pinerlutsaaliuinermit Siunnersuisoqatigiit).

Tamakku saniatigut inatsisissatut siunnersuut nittartakkami tusarniaasarfimmi takuneqarsinnaasimavoq: 6. – 10. juunimut 2016.

Piffissap tusarniaaffiusup qaanngiutereernerata kingorna tusarniaanermut akissuteqaatit tigueqartut ukunangaannerput: Kalaallit Nunaanni Politimestereqarfik, Kalaallit Nunaanni Eqqartuussiviit, Naalakkersuisoqarfiit, KANUKOKA, Kommuneqarfiit aamma Atuisartoqarnermut Unammilleqatigiinnermullu Aqutsisoqarfik aammattaaq niuertarfinniit, neriniartarfinniit aamma sassaalliteqartarfinniit. Tusarniaanermut akissuteqaatit annertussusiat pissutigalugu inatsimmut

ilanngussaq 2-tut ilanngunneqarput. Tusarniaanermi akissuteqaatigineqartut aqqissornagit allaqqinneqarput.

Aalajangersakkanut ataasiakkanut oqaaseqaatigineqartut.

§ 1-imut.

Imm. 1-imut

Aalajangersakkami inatsisip killiliussatut atuuffissai aalajangersarneqarput.

Inatsit imigassanik aalakoornartortalinnik nioqquteqarnermut aamma taakkuninnga sassaalliteqarnermut sassaalliteqartarfinni, neriniartarfinni, cafeeni, taakkununnga ilanngullugu silami nunaminertanut tamakkununnga atasunut assigisaannullu aammattaaq aqqissuussinernut ataasiaannartumik ingerlanneqartunut atuuppoq.

Imm. 2-mut

Inatsisartut Inatsisaanni taamatutaaq ilaatinneqartut tassaapput imigassanik aalakoornartortaqaanngitsunik, tak. § 26 sassaalliteqartarnermut maleruaqqusat, taanna tunngavigalugu baarini, cafeeni il. il. neqeroorutigineqassapput imigassat aalakoornartortaqaanngitsut. Inatsimmi ilaapputaaq angerlarsimaffimmi imigassanik aalakoornartortalinnik imigassaliorneq maleruaqqusat, tak. § 57, kiisalu imigassanik aalakoornartortalinnik nittarsaassisarneq pillugu maleruaqqusat, tak. § 58.

§ 2-mut.

Aalajangersakkap tamatuma inatsimmi siullermi § 1 taarserpaa, tasanilu inatsimmi imigassanut aalakoornartortalinnut taaguutitut nioqquteqarnermut aamma sassaalliteqarnermut tunngasut aalajangersarneqarput.

Imm. 1-imut

Killissarititaasoq, tassa inatsimmi aalajangersakkat tunngavigalugit imigassatut aalakoornartortalittut pineqartunut allanngortinneqarpoq 0,0 volumenprocentimut, tak. § 2, imm. 1. Killissarititaasoq siullermik 2,25 volumenprocentiuvoq.

Volumenprocentip 2,25-mit 0,0 volumenprocentimut allanngortinneqarnera, tak. § 2. imm. 1, arlalinnik siunertaqarpoq. Pingaarneq tassaavoq meeqqanik, inuusuttunik aamma taakku ilaqutaannik mianerinnineq.

Meeqqat inuusuttullu 18-it inorlugit ukioqartut imigassamik aalakoornartulimmik sumilluunniit pisiaqarsinnaajunnaarsinneqarput.

Hvidtølíp nalinginnaasumik imigassamik aalakoornartortalimmik 1,7 – 1,9-mut volumenprocentimik akoqarpoq. Immiaaqqamut “pilsneritut kimmittutigisumut” sanilliukkaanni, taava hvidtølít marluk “pilsneritut” Gammel Calsbergitut aamma Rød Tuborgitut kimeqarput, taakka 3,3 – 3,8-mut % vol. Pilsnerit allat ilisimaneqartut assersuutigineqarsinnaasut tassaapput Grøn Tuborg, Carlsberg Ice aamma Budweiser, taakku akuata 4,5 - 5 % vol. missaanniippoq.

Immiaaraq kimikitsoq aamma nioqqutit “imigassamik aalakoornartortalimmik akoqanngitsutut” taaneqartartut taamaattumik inatsimmi maleruqaqusanut aammattaaq ilaatinneqarput.

Nerisassat, mamakujuttut aamma kaagit inatsimmi ilaatinneqanngillat, tak. inatsimmi oqaasertat “imigassat” aalakoornartortalit.

Taamatuttaaqq viinnit naalagiaritsinermut atatillugu atorneqartut inatsimmi ilaatinneqanngillat. Taamatullu imigassat aalakoornartortalit peqqinnissaqarfimmi passussinermut imaluunniit isumaginninnermut atatillugu atorneqartut inatsimmi ilaatinneqassanngillat.

Imm. 2-mut

Aalajangersagaq malillugu nioqquteqarneq pisarpoq pisisartuq imigassamik aalakoornartortalinnik nassagassaminik pisiaqarpat. Nioqqutissat pisiarineqartut pisisartup (atuisartup) nammineq atugassarivai pisinerlu niuertarfiit, tuniniaasarfiit, allatsitsiviit, internet il. il. aqqutigalugit ingerlanneqartarpoq, tassani pisisartuq tassaalluni atuisoq kingulleq.

Imm. 3-mut

Imigassamik aalakoornartortalinnik sassaalliuteqarneq amerlanertigut pisarpoq imigassamik aalakoornartortalinnik akiliisitsilluni sassaalliuteqarneq pisisitsiffimmi imaluunniit taasuma eqqaani najoqqarneqartussamik. Kisianni viinninik misiliititsineq assigisaalu aammattaaq oqariaatsimut sassaalliuteqarnermut ilaatinneqassapput.

Tassa imaangilaq sassaalliuteqarnermut tunngatillugu akiliisitsineq kisimi pineqanngimmat, tamannalu aalajangiisuunngilaq pissutsip inatsimmut attuumassuteqarneranut.

Sassaalliuteqarneq sunaluunniit ataatsimoorluni matoqqasumik privatimik ingerlanneqanngippat, taava tamanna inatsimmi paasinnineq tunngavigalugu sassaalliuteqarnertut isigineqassaaq. Taamaattorli ilanngullugit takuneqassapput §§ 7 aamma 16-imut oqaaseqaatit.

Imm. 4-mut

Taamatullu taaguutit ”imigassamik aalakoornartortalinnik nioqquteqarsinnaanermut/ sassaallersinnaanermut akuersissut” imaluunniit ”akuersissut” § 2, imm. 4-mi killilerneqarput tassunga ilanngunneqarput ataavartumik imaluunniit piffissami killilikkami akuersissutit nioqquteqarnissamut imaluunniit sassaalliuteqarnissamut. Akuersissummi ataavartumi pineqarpoq taassuma piffissami sivilisunerusumik atuuttuutinneqarnissaa.

Imm. 5-imut

Tassani oqariaatsimut “imigassanik aalakoornartortalinnik nioqquteqarsinnaanermut/sassaalliuteqarsinnaanermut akuersissut” imaluunniit imm. 4-mi ”akuersissut”, taava “ataasiaannartumik atuuttussamik akuersissut”, assigiinngissutaalluni tassani taamaallaat pineqarput aaqqissuussinermut aalajangersimasumut ataasiinnarmut atatillugu sassaalliuteqarnissamut akuersissut. Ataasiaannartumik atuuttussamik akuersissutit §§ 16-imi aamma 17-imi sukumiinerusumik sammineqarput.

§ 3-mut.

Imm. 1-imut

Aalajangersakkap aalajangersarpaa imigassanik aalakoornartortalinnik nioqquteqassagaanni imaluunniit sassaalliuteqartassagaanni, taava imigassanik aalakoornartortalinnik nioqquteqarsinnaanermut/sassaallersinnaanermut akuersissummik peqartoqartariaqartoq

Imm. 2-mut

Inatsisartut inatsisaat 2015-12-09-meersoq Inuussutissarsiummik ingerlataqarneq pillugu namminersorluni inuussutissarsiummik ingerlatsinermi pisiniarfinniit nioqqutissanik nioqquteqarnermi atuuppoq, inatsisissatut siunnersuummi tak. § 3, imm. 2, kisianni sassaalliuteqarsinnaanermut imigassanik aalakoornartortalinnik nioqquteqarsinnaanermut/sassaallersinnaanermut akuersissummik tamanna atuinngilaq.

Imm. 3-mut

Imm. 3-mi aalajangersagaq ingerlateqqinneqarpoq tassa pisortat suliffeqarfiutaasa pisiniarfiit, akunnittarfiit, umiarsuit il. il. taamatuttaaq imigassanik aalakoornartortalinnik nioqquteqarsinnaanermut/sassaallersinnaanermut akuersissummik pisaqarnissaat imigassanik aalakoornartortalinnik nioqquteqarneranni imaluunniit sassaalliuteqarneranni, imaangippat taakku inatsisinik allanik tunngaveqartumik ilaatinneqartussaananik.

Imm. 4-mut

Ataasiaannartumik atuuttussamik akuersissummik tunniussinermi §§ 16-imi aamma 17-imi aalajangersakkat malinneqassapput.

Imm. 5-imut

Aalajangersakkami imm. 5-imiittumi sumiiffimmi oqartussaasup pisinnaatitaaffia saqqummiunneqarpoq tamatuma kingunerisaanik imigassanik aalakoornartortalinnik nioqquteqarsinnaanermut/sassaallersinnaanermut akuersissut kommuneqarfinni pineqartumi tunniunneqartussaavoq. Sumiiffinni kommunit killeqarfiisa avataaniittuni imigassanik aalakoornartortalinnik nioqquteqarsinnaanermut/sassaallersinnaanermut akuersissut suli Naalakkersuisunit tunniunneqartartussaavoq.

§ 4-mut.

Imigassanik aalakoornartortalinnik sassaallertarnissamut nioqquteqartarnissamut akuersissummik pigisaqalernissaminnik kissaateqartunut inunnut piumasaqaatit maleruaqqusanut manna tikillugu atuuttunut assingungajalluinnarput.

Imm. 1-imut

Imigassanik aalakoornartortalinnik sassaalliuteqarsinnaanermut nioqquteqarsinnaanermut akuersissummik qinnuteqaateqarniaraanni qinnuteqaateqartumut malitassaq pingaerneruvoq 25-nik ukioqalereersimanissaq. Akuersissuteqartarnermut aalajangiisartut qassinik ukioqarnissamut piumasaqaatip malinneqannginnissaa nunaqarfinni aamma illoqarfinni mikinerusuni akuersissutigisinnaavaat, tak. § 12. Qinnuteqaateqartoq nammineersinnaassusiiagaasimassanngilaq aamma nakkutigineqartussaataasunngortinneqarsimassanngilaq kiisalu tamakku saniatigut, soorlu siullermisut imatut ileqqulersorsimassanngitsuusaaq isumaqartoqarsinnaalluni suliffimmik illersorneqarsinnaasumik ingerlatsisinnaanngitsuusooq. Tamatumani aammattaaq pineqarput pillagaanermik kinguneqarsimasumik iliuseqarsimannginnissaq, tamanna tunngavigalugu suliffeqarfimmik ingerlatsinermut atatillugu unioqqutitsisinnaanerat nalorninartoqarsinnaalluni. Tamakku saniatigut imigassanik aalakoornartortalinnik nioqquteqarsinnaanermut/sassaallersinnaanermut akuersissummik qinnuteqaateqartoq suli imigassanik nioqqutissiortunut imaluunniit nioqquteqartunut taarsigassarsisimanermik il. il. pisussaaffeqassanngilaq, § 11 tunngavigalugu Naalakkersuisunit akuerineqarsimatinnani, taamatuttaaq qinnuteqaateqartoq akiligassaminik akilersuinerminik unitsitsisimasutut nalunaarutigineqarsimassanngilaq imaluunniit akiliisinnaajunnaartutut suliaqarneq tassunga tunngasoq ingerlanneqassanani. Tamakku saniatigut § 27-imut oqaaseqaatit innersuussutigineqarput.

Aalajangersagaq nutaaq ilanngunneqarpoq oqartussaasunut akiitsoqarnermut tunngasoq. Taanna tunngavigalugu imigassanik aalakoornartortalinnik nioqquteqarsinnaanermut/sassaallersinnaanermut akuersissummik qinnuteqaateqartoq tunineqarsinnaanngilaq oqartussaasunut 50.000 koruuninik amerlanerusunilluunniit akiligassaareersunik akiitsoqaruni. Akiitsut akiligassaareersut pillugit aalajangersagaq qinnuteqaateqartup aningaasaqarnikkut inissisimaneranut nalilersuinermut ilaatinneqassapput tamannalu tunngavigalugu qinnuteqaateqartup niuernermit isumannaatsumik ingerlatsisinnaanermut piginnaaneranik aamma piumassuseqarneranik nalilersuinermit.

Qinnuteqaateqartoq oqartussaasunut akiitsoqarsinnaavoq kisianni qinnuteqaateqartoq akiligassaareersunik akiitsoqassanngilaq. Akiitsut akiligassaareersimasutut isigineqassanngillat qinnuteqaateqartoq soorlu assersuutigalugu naafferaalluni akilersuinissaminut isumaqatigiissuteqarsimappat aamma qinnuteqaateqartup naafferaalluni akilersuinini eqqortittarpagu akilersukkaminik piffissaq eqqorlugu akiliisaruni. Taamatut pisoqartillugu

qinnuteqaateqartoq akuersissummik pisinnaassaaq, tassa akiitsuni akilertaramigit akiligassanngorneri tunngavigalugit.

Imm. 2-mut

Naalackersuisut imm. 2-mi pisinnaatinneqarput aningaasat 50.000 koruunit amerlassusiannit, imm. 1, normu 5-imi taaneqartunik allanngortitsisinnaanermut.

Imm. 3-mut

Aalajangersagaq imm. 3-miittoq pisinnaatitaaffimmit atuuttumit ingerlatitseqqiineruvoq.

Imm. 4-mut

Imaammat interessentskab (I/S) suliffeqarfimmut inummik ataatsimik pigineqartumut sanilliunneqarsinnaalluni, taava tassani peqataasut tamarmiusumik akisussaassuseqartut imigassanik aalakoornartortalinnik nioqquteqarnissamut/sassaalliuteqarnissamut pigisaqassapput

§ 5-imut

Ingerlatseqatigiiffiit imigassanik aalakoornartortalinnik nioqquteqarsinnaanermut/sassaallersinnaanermut akuersissummik pigisaqassapput qanorluunniit aaqqissuussaagaluarunik.

Taamaattumik ingerlatseqatigiiffiit interessentselskabini akisussaasuullutik peqataasut imigassanik aalakoornartortalinnik nioqquteqarsinnaanermut/sassaallersinnaanermut akuersissummik pigisaqassapput, taamaalillutillu § 4, imm. 4-imi piumasaqaatit naammassissallugit.

Imm. 1-imut

Ingerlatseqatigiiffinnut piumasaqaatit, tassa imigassanik aalakoornartortalinnik nioqquteqarsinnaanermut/sassaallersinnaanermut akuersissummik peqalernissamut kissaateqartunut, maannakkut maleruaqqusat atuuttuutinneqartut assigiinnangajappaat. Qinnuteqaateqartoq suli akiliisinnaajunnaartutut suliamik ingerlatsiffigineqassanngilaq imaluunniit aaqqissuusseqqinnermik ingerlatsiffigineqassanani kiisalu imigassanik nioqqutissiortunut imaluunniit nioqquteqartunut taarsigassarsisimanermik aamma aningaasalersuinertut assingusumik pisussaaffeqassanngilaq, § 11 tunngavigalugu Naalackersuisunit akuerineqarsimatinnani.

Nutaatut ilanngunneqarpoq ingerlatseqatigiiffiit oqartussaasunut 50.000 koruuninik imaluunniit sinnerlugit akiligassaareersunik akiitsoqassanngitsut. Akiitsut akiligassaareersut pillugit sukumiinerusut matuma siuliani § 4-imi oqaaseqaatit takukkit.

Ingerlatseqatigiiffinni pisortaasunut ilaasut piumasaqaatinik § 4 imm. 1-imi, normu 1-imit 6-imut naammassinnissimassapput. Piumasaqaatit piumasaqaatinik ingerlatitseqqiinerupput tassa inatsimmi atuuttumeersunit, taamaattorli piumasaqaatit ilaneqarput tassa pisortaasunut ilaasut

oqartussaasunut 50.000 koruuninik amerlanerusunilluunniit akiligassaareersunik akiitsoqassanngitsut.

Ingerlatseqatigiiffimmi siulersuisunut ilaasortat piumasaqaatinik § 4, imm. 1-imi normu 1-imit 4-mut allassimasunik naammassinnissapput. Piumasaqaatit piumasaqaatinik ingerlatitseqqiinerupput tassa inatsimmi atuuttumeersunit, taamaattorli imaappoq siulersuisuni ilaasortat akiligassanik akiligassaareersunut tunngatillugu piumasaqaammut ilaatinneqanngimmata. Tamatuma saniatigut inatsimmi atuuttumit allaanerusoq tassaavoq piumasaqaataanngimmat siulersuisuni ilaasortat akiliisinnaajunnaarsimassanngitsut imaluunniit akiliisinnaajunnaartutut suliamik ingerlatsiffigineqassanngilaq. Tamatumunnga tunngilersuutaavoq siulersuisuni ilaasortat ingerlatsiviup ulluinnarni ingerlanneqarneranut toqqaannartumik peqataasannngimmata.

Malugeqquneqarpoq suli immikkut aalajangersagaqarmat pisortaasunut aamma peqatigiiffiini, klubbini il.il. siulersuisunut ilaasortanut immikkut aalajangersagaqarpoq, tak. matuma kinguliani § 7-ip iluani.

Imm. 2-mut

Naalackersuisut imm. 2-mi pisinnaatinneqarput aningaasat 50.000 koruunit amerlassusiannit, imm. 1, normu 5-imi taaneqartunik allanngortitsisinnaanermut.

Imm. 3-mut

Aalajangersagaq imm. 3-miittoq pisinnaatitaaffimmit atuuttumit ingerlatitseqqiineruvoq.

Imm. 4-mut

Aalajangersakkat imm. 4-miittut taamatuttaaq pisussaatitaaffinnik ingerlatitseqqiinerupput, tamatuma kinguneranik piumasaqaataavoq Naalackersuisunit akuersissut ingerlateqatigiiffik sassaalliteqarsinnaanermut akuersissummik qinnuteqaateqarpat, kiisalu nammineq imigassanik aalakoornartortaliortarpat aamma nioqquteqartarpat. Taamatuttaaq Naalackersuisunit akuersissut pissarsiarineqassaaq ingerlatseqatigiiffimmi pisortaasoq imaluunniit pisortaasut ilaat arlallit, kiisalu siulersuisuni ilaasortaqaq ataaseq imaluunniit ilaasortat arlallit imigassanik aalakoornartortaliortartunut imaluunniit imigassanik aalakoornartortalinnik nioqquteqartartunut ilaappata.

§ 6-imut

Aalajangersakkap aalajangersarpaa suliffeqarfimmik ulluinnarni ingerlatsineq akuersissummik piginnittumit namminermit imaluunniit pisortaaitamit aqunneqassasoq.

§ 7-imut

Imm. 1-imut

Immikkut aalajangersakkani peqatigiiffinni, klubbini il.il. pineqarput qaqugu sassaalliteqarnermik ingerlatsisoqarnersoq, tassa imigassanik aalakoornartortalinnik nioqquteqarsinnaanermut/sassaallersinnaanermut akuersissummik pigisaqarnissamik piumasaqaateqartoqarnera, kiisalu qaqugu aaqquissuussinermik ataasiaannartumik ingerlatsisoqarnersoq, tassani ataasiaannartumik atuuttussamik akuersissummik piumasaqaatitaqartumik. Kiisalu takukkit oqaaseqaatit §§ 16-imi aamma 17-imi.

Imm. 2-mut

Aaqquissuussinerit aalajangersimasut imaluunniit akuttunngitsumik ingerlanneqartartut peqatigiiffiup imaluunniit klubbip iniutaani, tassani imigassanik aalakoornartortalinnik sassaalliteqartoqartarluni, taamaattoqartartillugu imigassanik aalakoornartortalinnik nioqquteqarsinnaanermut/sassaallersinnaanermut akuersissut pigineqartariaqarpoq aammattaaq ilaasortaannarnut sassaalliteqartoqaraluarpalluunniit.

Aaqquissuussinernut aalajangersimasunut imaluunniit uteqqiattumik ingerlanneqartartunut assersuutigineqarsinnaapput “tallimangornikkut bareqartitsineq” imaluunniit “pingasunngornikkut billardertarneq” assigisaallu.

Pissutsit tassaasut sassaalliteqartarneq aalajangersimasumik akuttunngitsumik uteqqiattumik aaqquissuussinerit pisarlutik, taakku aalajangiisuupput klubbip imaluunniit peqatigiiffiup imigassanik aalakoornartortalinnik sassaalliteqartarnermut/nioqquteqartarnermut akuersissummik aalajangersimasumik peqarnissaanut.

Imm. 3-mut

Imm. 3-mi aalajangersarneqarpoq peqatigiiffinni aamma klubbini assigisaannilu siulersuisunut ilaasortat tamarmik namminneq inuttut qaquguluunniit § 4, imm. 1, normu 1-imit – 4-mut ukioqqortussutsimut, nammineersinnaassuseqarnermut aalajangersakkat eqqortittussaagaat, tassa suliffeqarfimmik isumannaatsumik ingerlatsinissamut piumasaqaatit aammattaaq eqqusuillutik nioqquteqaaqqittartunut imaluunniit imigassanik aalakoornartortalinnik imigassaliortartunut pituttorsimannginnissamut piumasaqaatit imaluunniit taarsigassarsisimanermut imaluunniit immikkut ittumik akiligassarsisimanermut tunngasut, imaangippat tamakkununnga tunngatillugu Naalackersuisunit akuersissuteqartoqarsimasoq.

§ 8-mut

Imm. 1-imut

Aalajangersakkami aalajangersarneqarput ingerlatseqatigiiffinni, suliffeqarfinni, assigisaannilu pisortat § 4, imm. 1, normu 1-imit 6-imut taaneqartut ukioqqortussutsimut, nammineersinnaassuseqarnermut, piumasaqaatinut tunngasut suliffeqarfimmik isumannaatsumik ingerlatsisinnaanermut aammattaaq eqqusuillutik nioqquteqaaqqittartunut imaluunniit imigassanik

aalakoornartortalinnik imigassaliortartunut pituttorsimannginnissamut piumasagaatit imaluunniit taarsigassarsisimanermut imaluunniit immikkut ittumik akiligassarsisimanermut tunngasut eqqortissavaat, imaanngippat tamakkununga tunngatillugu Naalackersuisunit akuersissuteqartoqarsimasoq.

Tamakku saniatigut pisortaaq oqartussaasunut akiligassaareersunik 50.000 koruuninik taakkuluunniit sinnerlugit akiligassaqaassanngillat, taamattaq akiliisinnajunnaarnermut imaluunniit aaqqissuusseqqinnermik ingerlatsiffigineqassanani.

§ 9-mut

Imm. 1-imut

Aalajangersakkami aalajangersarneqarput piginneqatigiiffinni, suliffeqarfinni, assigisaannilu siulersuisunut ilaasortat § 4, imm. 1, normu 1-imit 4-mut taaneqartut ukioqqortussutsimut, nammineersinnaassuseqarnermut, piumasagaatinut tunngasut suliffeqarfimmik isumannaatumik ingerlatsisinnaanermut aammattaq eqqusuillutik nioqquteqaqqittartunut imaluunniit imigassanik aalakoornartortalinnik imigassaliortartunut pituttorsimannginnissamut piumasagaatit imaluunniit taarsigassarsisimanermut imaluunniit immikkut ittumik akiligassarsisimanermut tunngasut eqqortissagaat, imaanngippat tamakkununga tunngatillugu Naalackersuisunit akuersissuteqartoqarsimasoq.

§ 10-mut

Imm. 1-imut

Pisortaatitat tassaapput atorfeqartitat namminnerlu imigassanik aalakoornartortalinnik nioqquteqarsinnaanermut/sassaallersinnaanermut akuersissummik peqartussaangillat, tamanna attartortumit allaanerussutigaat, pineqartoq imigassanik aalakoornartortalinnik nioqquteqarsinnaanermut/sassaallersinnaanermut akuersissummik nammineq peqartussaavoq, tassa neriniartarfimmik imaluunniit sassaalliuteqartarfimmik imigassanik aalakoornartortalinnik sassaalliuteqarfiusartumik attartorsimaguni.

Pisortaatitap taamaallaat § 4, imm. 1, normu 1-imit 4-mut taaneqartut eqqortittussaavai.

Pisortaatitap nalinginnaasumik suliffeqarfiup ingerlanneqarneranut akuersissummik peqartutulli ataatsimoortumik oqartussaassuseqanngilaq, taamaattumik piumasagaatigineqanngilaq pisortaatitap oqartussaasunut akiligassaareersunik 50.000 koruuninik taakkuluunniit sinnerlugit akiligassaqaannginnissaanik, taamattaq akiliisinnajunnaarnermut imaluunniit aaqqissuusseqqinnermik ingerlatsiffigineqannginnissaa piumasagaataanatik.

Imm. 2-mut

Pisortaatitap akuersissuteqartarnermut aalajangiisartunit akuerineqaqqaassaaq suliffeqarfimmik aqutsisuusinnaanerat sioqqullugu.

Akuersissummik pigisaqartoq pisortaatitamik atorfinitsitsiniaruni, taava pisariaqarpoq akuersissuteqartarnermut aalajangiisartut pisortaatitamik piffissap naammaginatup ingerlanerani akuerinninnissaat.

Taamaattumik suliamik suliarinninnerup eqaannerusumik suliarineqarnissaa siuarsarniarlugu akuersissuteqartarnermut aalajangiisartut periarfissaqarput suliarinninneq ataatsimiinnermi oqaluuserissanerlugu imaluunniit allakkatigut qinnuteqaammik suliarinninneq ingerlatissanerlugu.

Imm. 3-mut

Akuersissuteqartarnermut aalajangiisartut sapaatit akunnerisa pingasut iluanni qinnuteqaammik suliarinnittussaapput.

Taamaattorli akuersissuteqartarnermut aalajangiisartut piffissarititaasumik taassuminnga uniuisinnaapput soorlu assersuutigalugu suliap annertussusia imaluunniit katitigaanerata paasiuminaanera pissutigalugu. Aalajangersagaq qinnuteqaateqartumik erseqqissumik aamma amigaateqanngitsumik qinnuteqaammik akuerineqartussamik nassiussaqaarnissaanut kajumissaarivoq, taamaattoqarpat akuersissuteqartarnermut aalajangiisartut piviusumik periarfissaqaassapput qinnuteqaammik piffissaq eqqorlugu suliarinninnissaminnut.

Imm. 4-mut

Akuersissuteqartarnermut aalajangiisartut pisortaatitap akuerineqarsinnaaneranut piumasqaateqarsinnaapput.

§ 11-mut

Aalajangersagaq pisinnaatitaaffimmit atuuttumit ingerlatseqqiineruvoq.

Imm. 1-imut aamma 2-mut

Suliffeqarfinni imigassanik aalakoornartortalinnik nioqquteqarsinnaanermut/sassaallersinnaanermut pigisaqartuni akuersissummik peqartoq imaluunniit pisortaasunut ilaasoq aamma siulersuisunut ilaasortat aamma pisortaatitat, Naalakkersuisunit akuerineqaqqaassapput aningaasanik taarsigassarsissagunik imaluunniit allatut taarsigassarsissagunik, tunissutinik tigusaqassagunik imaluunniit qularnaveeqqusiinermik pissarsissagunik, tassa imigassanik aalakoornartortalinnik nioqqutissiortuneersunik imaluunniit tunisassiortuneersunik.

Imm. 3-mut

Immiaaraliorfiit akutunngitsumik immiaaqqanut maqitsivinnik neriniartarfinnut assigisaannullu atugassannortitsisarput. Nioqqutissiortup immiaaqqanut maqitsiviutaat akutunngitsumik immiaaqqanik maqillugit sassaalliteqarnissamut piviusumik piumasqaataasarpoq. Akuersissummik pigisaqartoq immiaaqqanik maqitsissummik atugassinneqarnerpat, taava tamatumunnga Naalakkersuisunit akuersissummik pissarsisoqarnissaa piumasqaataanngilaq. Immiaaqqanut

maqitsivik imatut pequtitut ilaasutut isigineqanngilaq kiisalu taamatutaaq ingerlatsinermut aningaasalersuinertut isigineqarsinnaanani.

Imm. 4-mut

Taarsigassarsiat, aallaqqaasiutissat imaluunniit qularnaveeqquusiissutissat aningaasalersuisarfinit taarsigassarsiarineqartut, taakku imigassanik aalakoornartortalinnik pisiniartarfinnut qilersorsimannippata, taava Naalakkersuisunit akuersissuteqartoqarnissaa piumasaqaataannngilaq.

§ 12-mut

Imm. 1-imut

§ 12, imm. 1-imi akuersissuteqartarnermut aalajangiisartut immikkut akuersissuteqarsinnaanermut periarfissaat atatiinnarneqarpoq, tassa nunaqarfinni aamma illoqarfinni mikinerusuni qassinik ukioqarnissamut § 4, imm. 1-imi, normu 1-imi pisiniarfinni pisortanut aamma nunaqarfinni niuertunut. Tamatumunnga pissutaavoq pissutsit immikkut ittut illoqarfinni mikinerusuni aamma nunaqarfinni atuuttut, taakkunani pisariaqarsinnaammat pisiniarfinni pisortat aamma nunaqarfinni niuertut inuusunnerusut atorfinitsissallugit pisariaqarsinnaammat.

Imm. 2-mut

Tamatuma assinganik tunngavilersuuteqartoqarluni § 12, imm. 2 periarfissiisoqarpoq qassinik ukioqarnissamut piumasaqaatip § 4, imm. 1-imiittup malinneqannginnissaanut, tassa Naalakkersuisut akuersissuteqareernerisigut akuersissuteqartarnermut aalajangiisartut tunngavissarsigunik qassinik ukioqarnissamut § 4, imm. 1-imi piumasaqaat illoqarfinni mikinerusuni aamma nunaqarfinni pisortaasunut, imaluunniit ingerlatsivinni, suliffeqarfinni, peqatigiiffinni imaluunniit klubbini siulersuisunut ilaasortaasunut immikkut akuersissuteqarnissamut.

Naalakkersuisuni akuersissuteqartoqartinnagu akuersissuteqartarnermut aalajangiisartut suliaq oqaluusereqqaassavaat kiisalu inassutigisartik Naalakkersuisunut nassiullugu.

§ 13-imut

Aalajangersakkami § 13-imiittumi imigassanik aalakoornartortalinnik nioqquteqarsinnaanermut /sassaallersinnaanermut akuersissummi suussutsit assigiinngitsut nalunaarsorneqarput, tassa imigassanik aalakoornartortalinnik nioqquteqarsinnaanermut akuersissummik tunniussinermut atatillugu.

Nakkutilliineq ajornannginnerulersinniarlugu akuersissutip suunera imigassanik nioqquteqarsinnaanermut akuersissummut ilanngullugu allanneqassaaq.

§ 14-imut

Imm. 1-imut

Aalajangersakkami § 14-imiittumi imigassanik aalakoornartortalinnik nioqquteqarsinnaanermut/sassaallersinnaanermut akuersissummi suussutsit assigiinngitsut nalunaarsorneqarput, tassa imigassanik aalakoornartortalinnik sassaalliuteqarsinnaanermut akuersissummik tunniussinermut atatillugu.

Imm. 2-mut

Akuersissummut tunngatillugu akuersissummi suussuseq Sassaalliuteqarneq annerpaamik 16 aamma Sassaalliuteqarneq annerpaamik 4,10, tassani imerneqarsinnaasut ataasiakkaarlutik imigassaataasa 16 volumenprocenti qaangersimassanngilaat. Tamanna aammattaaq atuuppoq uunga tunngatillugu Ataasiaannartumik atuuttussamik akuersissut annerpaamik 16, tassani imerneqarsinnaasut ataasiakkaarlutik imigassaataasa 16 volumenprocenti qaangersimassanngilaat.

Annerpaamik imigassap volumenprocenteqarnissamut aalajangersagaq, tassa imikkami ataatsimi imerneqarsinnaasut ataasiakkaarlutik kimittussusissaat, taanna ilanngunneqarpoq volumenprocentip akuersissutigineqartup unioqqutinneqarnissaa pinngitsoortinniarlugu, soorlu assersuutigalugu nioqqutissanik imigassamik aamma sodavandimik akooiikkanik sassaalliuteqarnikkut.

Imm. 3-mut

Nakkutilliineq ajornannginnerulersinniarlugu akuersissutip suunera imigassanik aalakoornartortalinnik nioqquteqarsinnaanermut/sassaallersinnaanermut akuersissummi ilanngullugu allanneqassaaq.

§ 15-imut

Imm. 1-imut

§ 15, imm. 1-imi maleruaqqusat maannamut atuuttut ingerlateqqinneqarput imigassanik aalakoornartortalinnik immikkut akuersissuteqartoqarneratigut piffissami nal. 06.00 aamma nal. 12.00 akornanni mittarfinni aamma hotelini unnuisoqartarfiusuni sassaalliuteqarsinnaanermut. Tassani pineqarpoq akuersissut immikkut ittoq tassani periarfissiissutaalluni nalinginnaasumik piffissap sassaalliuteqartarfiusup avataatigut sassaalliuteqartoqarsinnaalerluni.

Imm. 2-mut

Akuersissummi erseqqilluinnartumik nalunaarneqarsimassaaq piffissaq akuersissummi pineqartoq.

Imm. 3-mut

Imm. 3-mi aalajangersagaq nutaaq ilanngunneqarpoq ingerlatsinernut takornarianut aaqquissuussinernut tunngatillugu. Aalajangersakkami aaqquissuussinerit takornarianut tunngasut

isumagineqarput soorlu assersuutigalugu angallatinik attartornermi. Tamanna tunngavigalugu takornarianik sullissisut periarfissinneqarput immiaaqqanik, viinninik sassaalliteqarnissaminut asiarnermi nerinermut atatillugu, taamatuttaaq takornarianik sullissisoq periarfissinneqarpoq imigassamik sermersuup nilaanik nilalerlugu sassaalliteqarnissaminut sermersuarmut asiarnermut atatillugu.

Takornariaqartitsinermik sammisaqarneq suli ineriartortuarmat Naalakkersuisut imm. 4-mi pisussaatinneqarput mittarfinnut, hotelinut unnuisulinnut aammattaaq takornarianut tunngatillugu ingerlatsinernut taaneqartunut sukumiinerusunik aalajangersakkanik suliaqarnissaminut, taamaaliornikkut sammisaq ingerlaavartumik naleqqussarneqarsinnaassammat ineriartorneq malillugu.

§ 16-imut

Imm. 1-imut

Imm. 1-imi aalajangersakkami aalajangersarneqarpoq ataasiaannartumik atuuttussamik akuersissummik qinnuteqaateqartoqartarnissaa, aaqqissuussinerit ataasiaannartumik pisut ingerlanneqarneranni kikkut tamat peqataasinnaatillugit.

Inatsimmi paasinninneq tunngavigalugu tamatigungajalluinnaq sassaalliteqartoqartarpoq, imigassanik aalakoornartortalinnik aaqqissuussinermi sassaalliteqartoqartillugu akiliisitsisoqarpat. Tamatumunnga atatillugu apeqqutaanngilaq najugassanut toqqaannartumik akiliuteqarneq, imaluunniit toqqaanngitsumik akiliuteqarneq tassa isernermi akiliuteqarneq assigisaalluunniit atorlugit.

Aaqqissuussineq kikkunnit tamanit peqataaffigineqarsinnaasooq tassaavoq – tunngaviusumik – kikkut tamarmik isersinnaaffiat. Tassani pineqanngilaq aaqqissuussinermut kina ingerlatsisuunersoq, kisianni kikkut aaqqissuussinermut isersinnaanersut. Peqatigiiffik atituumik aamma aalajangersagaanngitsunik sullinniagaqaruni soorlu assersuutigalugu sumiiffimmi aalajangersimasumi najugaqartunik, kiisalu “isaarissami isilernermi” ilaasortannortoqarsinnaalluni, taava aaqqissuussineq taamaattoq kikkut tamat peqataaffigisinnaasaattut isigineqassaaq.

Taamaattorli aalajangersakkami pineqanngillat nammineerluni privatimik katerisimaarnerit, tassa imaappoq katerisimaarnerit privatimik isisineqartumik ingerlanneqartut.

Suliffeqarfimmi suleqatinik aamma suleqatigisartakkanik inuulluaqqusilluni ilasseqatigiinneq ataasiaannartumik atuuttussamik akuersissummik peqassaaq, tassa aaqqissuussineq taamaattoq privatimik isigineqartumik katerisimaarnertut taaneqarsinnaanngimmat.

Taamatutaaq ippoq soorlu assersuutigalugu peqatigiiffiup eqqumiitsulianik sammisallip saqqummersitseqqaarnermi ilasseqatigiinnermik ingerlatsiguni. Inuit ilaasortaasut katitigaaneratigut imminnut ataqatigiinnerat imatut isigineqarsinnaanngimmat tamanna privatimik katerisimaarnertut isigineqarsinnaalluni.

Nipilersorluni tusarnaartitsinerit nipilersorluni tusarnaartitsinissaq sioqqullugu bilitsinik pisititsisoqartillugu, aammattaaq aaqqissuussinertut kikkut tamat peqataaffigisinnaasaattut isigineqartussanut assersuutigineqarsinnaapput, tassani ataasiaannartumik atuuttussamik akuersissut pissarsiarineqassaaq.

Aaqqissuussinerit pisortat suliffeqarfiutaanni aamma ilinniarfinni sassaalliteqarluni ingerlanneqartut ataatsimut isiginnilluni kikkut tamat peqataaffigisinnaasaat, taamatutaaq ataasiaannartumik atuuttussamik akuersissummik qinnuteqaateqassapput.

Taamatutaaq apeqqutaanngilaq aaqqissuussinermi siunertarineqartoq inunnik isumaginninnermut imaluunniit ikiuiniarnermut samminersoq, aamma imigassanik aalakoornartortalinnik nioqquteqarnermi sinneqartoorutaajunnartut ikiuiniarnermut tunniussassatut, timersornermut, peqatigiiffilerinnermut il. il. ingerlatsinneqarnissaat siunertaappat.

Imm. 2-mut

Imm. 2-mi aalajangersarneqarpoq taamatutaaq ataasiaannartumik atuuttussamik akuersissut pissarsiarineqassasoq soorlu assersuutigalugu klubbip imaluunniit peqatigiiffiup sassaalliteqarnera ilaasortaannaanut tunngasuinnaagaluarpulluunniit. Tamatumunnga tunngavilersuutaavoq klbbimut imaluunniit peqatigiiffimmuut ilaasortanngorsinnaanerup killilersorneqannginnera, kiisalu aaqqissuussineq taamaattoq privatimik katerisimaarnertut isigineqarsinnaanngimmat.

Malugineqassaaq, kollegianut, atuarfinnut ulloq unnuarlu ineqarfigineqartartunut aamma ulloq unnuarlu perorsaavinnut allanut immikkut maleruaqqusat atuummata, tassa taakku tamatigut ataasiaannartumik atuuttussamik akuersissummik qinnuteqaateqartassapput, imigassanik aalakoornartortalinnik sassaalliteqartoqassatillugu, tak. tamanna pillugu immikkut aalajangersakkat § 20-miittut.

Aaqqissuussineq privatimik ingerlanneqartutut isigineqarsinnaavoq naak aaqqissuussineq katerisimaartarfinni assigisaanniluunniit ingerlanneqaraluartoq. Ataasiaannartumik atuuttussamik akuersissummik qinnuteqaateqartoqassanngilaq inuit peqataasut imminnut immikkut attuummassuteqaqatigiippata, soorlu assersuutigalugu inissaqarnissamik pissuteqartumik nalliuttorsiorneq katerisimaartarfinni imaluunniit assigisaanni ingerlanneqarluni.

Aaqqissuussineq matoqqasoq tassaasinnaavoq ilaqtanut aamma ikinngutitut imaluunniit suleqatitut festertitsineq. Aaqqissuussinerit taamaattut tassaapput privatitut isigineqarsinnaasut

inatsimmi aalajangersakkanut attuumassuteqanngitsut, tamanna pissutigalugu imigassanik aalakoornartortalinnik sassaalliteqarnermi maleruaqqusanut ilaatinneqarnatik.

Tamatumani ammaattaaq pineqarput suliffeqarfinni namminersortuni assigisaanniluunniit festernerit assigisaalluunniit, tassani peqataasut tassaappata suliffeqarfiup sulisui aamma taakku aapparisaat, tamatumani pineqarluni festernermi peqataasut killeqartut inuttullu namminertut ingerlaneqartuusoq. Taamatuttaaq ippoq suleqatigisartakkamik ullup qeqqanut nereqateqarneq tamanna aamattaaq privatimik aqqissuussinertut isigineqarsinnaavoq, tamatumunnga ataasiaannartumik atuuttussamik akuersissummik qinnuteqaateqartoqassanngilaq.

Imm. 3-mut

Killeqartitsinerit imm. 3-miittut akuersissuteqartarnermut aalajangiisartunit periarfissaqartippaat akuersissummik tunniussinerit atatillugu atugassarititaasunik aalajangersaanissaannik.

Soorlu assersuutigalugu atugassarititaasunut aalajangersarneqarsinnaasunut ilaasinnaapput matulerisunik atuinissaq, peqataasinnaasut amerlassusissaat, taamaallaat nal. 23-p tungaanut nipilersortoqarsinnaanera assigisaallu.

Piumasaqaatinik aalajangersaanerni kinaassusersiunnginnissaq mianerineqassaaq.

Ataasiaannartumik atuuttussamik akuersissummik qinnuteqaammut ilanngunneqassaaq akisussaassuseqartumik sassaalliteqarnissaq aamma aqqissuussinermik ingerlatsinissaq, tak. § 25. Tamanna pillugu sukumiinerusut § 25-imut oqaaseqaatini takukkit.

Imm. 4-mut

Imm. 4-mi ilanngunneqarpoq aalajangersimasumik imigassanik aalakoornartortalinnik nioqquteqarsinnaanermut/sassaallersinnaanermut akuersissummi maleruaqqusat nalinginnaasut unioqqutinneqarnissaat pinaveersaartinniarlugit. Aalajangersimasumik imigassanik aalakoornartortalinnik nioqquteqarsinnaanermut/sassaallersinnaanermut akuersissummi, ataasiaannartumik atuuttussamik akuersissutip akerlianik, akuersissummik pigisaqartumut annertunerisunik piumasaqaatitaqarpoq. Piumasaqaatit taamaattut ataasiaannartumik akuersissummik pissarsitinneqarnermi ilanngunneqartanngillat. Taamaattumik peqatigiiffik, klubbi assigisaallu akuttunngitsumik aamma aqqissuussamik tulleriaartumik sassaalliteqartarluni aqqissuussinernik ingerlatsisartoq aalajangersimasumik akuersissummik tunineqassaaq ataasiaannartumik atuuttussamik akuersissummut taarsiullugu, taamaalilluni peqatigiiffimmut piumasaqaatit akuersissummik aalajangersimasumik pigisaqartutulli piumasaqaatinut assigiilissapput.

Imm. 5-imut

Imm. 5-imi aalajangersarneqarpoq akuersissuteqartarnermut aalajangiisartut akuersissutip assinganik kingusinnerpaamik aaqqissuussinerup ingerlanneqarnissaa ullunik marlunnik sioqqullugu politinut nassiussisarnissaat.

§ 17-imut

Imm. 1-imut

Nutaatut § 17-imi aalajangersarneqarpoq ataasiaannartumik atuuttussamik akuersissummut atatillugu taamaallaat imigassanik aalakoornartortalinnik sassaalliteqartoqarsinnaasoq 16 volumenprocent tikillugu kimittussusilinnik. Aalajangersagaq ilanngunneqarpoq nalliuttorsiualaarnerit kikkut tamat peqataaffigisinnaasaattut ingerlanneqartut naleqquttumik ingerlanneqartarnissaannut periarfissiiniarluni, ingammik inuusuttut peqataasut illersorneqarnissaat siunertaralugu.

Ataasiaannartumik atuuttussamik akuersissummi § 43-imi ammasarfiit malinneqassapput, taamaattorli sassaalliteqarneq nal. 24 unissalluni.

Ataasiaannartumik atuuttussamik akuersissummik pissarsisinnaaneq maleruqaqusanik atuutereersunik allangortinneqalaartunik ingerlatitseqinneruvoq. Ataasiaannartumik atuuttussamik akuersissutip aaqqissuussinernik immikkut ittunik – imaluunniit annertunerusunik ingerlatsisinnaaneq periarfississavaa, tassa tamanna neriniartarfimmi imaluunniit sassaalliteqartarfimmi ingerlatinngikkaluarlugu.

Ineriartornerup kingunerisaanik pissutissaqalersimavoq sassaalliteqartarnerup nal. 24.00 unittarnissaanik aalajangersakkamik allangortitsinissaq. Taamaattumik periarfissaliisoqarpoq akuersissuteqartarnermut aalajangiisartut immikkut akuersissuteqarsinnaanngorlugit nal. 05-ip tungaanut sassaalliteqarnissamik. Tamatumani pineqarpoq immikkut akuersissuteqarneq, tamatumani pineqarluni aalajangersakkap nal. 24-p tungaanut sassaalliteqaaqusaanerup saneqqunneqarnissaanut pissutissaqartoq. Takukkit aammattaaq § 43-mut oqaaseqaatit.

Imm. 2-mut

Tamatuma saniatigut imm. 2-mi nutaamik aalajangersagaqarpoq tamatuma kingunerisaanik inuusuttut 18-it inorlugit ukiullit aaqqissuussinernut taamaallaat peqataasinnaapput angajoqqaaminnik, angajoqqaatut akisussaasuussuseqartumik imaluunniit inummik allamik inersimasumik nammineersinnaasumik, inersimasutut nammineq oqartussaassuseqanngitsumut immikkut akisussaaffeqartumik aatsaat ilaqarlutik.

Inersimasoq immikkut inuusuttumut akisussaassuseqartoq tassaasinnaavoq inersimasoq ilaqutarisaaq imaluunniit inersimasoq ilaqutariinnit ilisarimaneeqartoq, angajoqqaat imaluunniit angajoqqaatut

akisussaassuseqartoq isumaqatigalugit inuusuttumut ingiaqataasoq aaqqissuussinerup ingerlanneqarnerata nalaani.

Aalajangersagaq aqutigalugu ilaatigut kissaatigineqarsimavoq aaqqissuussinerit annertunerusut soorlu assersuutigalugit nipilersortut tusarnaartitsineri, festivalit, Kalaallit Nunaanni pissartanngorniunnerni naggataarnersiornerni assigisaannilu, inersimasunut taamatullu inuusuttunut 18-it inorlugit ukiulinnut ingerlanneqartartut, ingerlanneqarneranni inuusuttunut 18-it inorlugit ukiulinnut sassaalliuteqartoqassanngimmat.

Aaqqissuussisut tamatumunnga atasumik pisussaatinneqarput nakkutilliinermik pilersitsinissamut, kisianni tamatumunnga ilutigitillugu inuusuttunik nakkutiginninnermut oqilisaasoqassaaq, tassa inuusuttoq 18-it inorlugit ukioqartoq inersimasumik, soorlu assersuutigalugu angajoqqaamik immikkut inuusuttumut akisussaasuusumut ilaqartinneqarneratigut.

Inuusuttut 18-init inorlugit ukioqartut inersimasumik ingiaqatigineqanngitsut peqataasinnaanngillat, kisianni “matumi” itigartinneqassallutik.

§ 18-imut

Imm. 1-imut

Aalajangersagaq maleruaqqusanik atuuttunik ingerlatitseqqinneruvoq, tamatuma kingunerisaanik periarfissaalperpoq akuersissummik pigisaqartoq tamakkiisumik akuersissummik pisinnaassalluni katerisimaarnerni matoqqasuni soorlu akunnaalliliilluni inuuissioerni, katittuni, nalliuttorsiornerni aamma assigisaanni aammattaaq Inatsisartunut qinersinernut atatillugu, piffissami nalinginnaasumik sassaalliuteqarsinnaanermut piffissap akuersissutigineqarsimasup avataani ingerlatsisoqarnissamik. Tamatumunnga akuersissuteqarneq imigassanik aalakoornartortalinnik sassaalliuteqarsinnaanermut akuersissummi atsiornikkut tunniunneqartassaaq.

Aaqqissuussineq matoqqasumik ingerlanneqassaaq, tassunga kikkut tamarmik isersinnaassanatik aamma aalajangersagaq nalinginnaasumik sassaalliuteqarsinnaanermut akuersissummik unioqquitsiniarnermut atorneqarniassanngilaq.

Taamaalilluni akuersissummik pigisaqartup pisussaqaqarneri tamaasa ataasiaannartumik atuuttussamik akuersissummik qinnuteqaateqartarnissaa pisariaarutissaaq kiisalu akuersissuteqartarnermut aalajangiisartut allaffissornermi sipaaruteqassapput.

Imm. 2-mut

Aaqqissuussineq inini imigassanik aalakoornartortalinnik sassaalliuteqarsinnaanermut akuersissummut ilaatinneqartuni ingerlanneqassaaq. Akuersissummik pigisaqartup pisuni

ataasiakkaani aaqqissuussinerup ingerlanneqarnissaa politiinut ilisimatitsissutigisassavaa kingusinnerpaamik aaqqissuussinissaq ullunik marlunnik sioqqullugu.

§ 19-imut

Danskit aamma nunani tamalaani ilisimatusarnikkut misissuinerisa takutippaat imigassartortarneq, pujortartarneq aammattaq aangajaarniutinik atuineq inuusuttut ataatsimoornermi ineriartornerannut pitsaanngitsumik sunniuteqarsinnaasoq. Atuarfiit ilinniagaqarnerup ingerlanneqarneranik aaqqissuussinerat iliniakkanut aamma inuttut ataatsimoortarnernut sunniuteqarpoq, tassa inuusuttut akornanni ineriartortuni; tamatumanissaaq pineqarput atuarfiit imminnut ilisarititsilluni aaqqissuussisarnerisa ingerlanneqartarnerat.

Taamaalilluni periarfissaalerpoq “ineqarnermi maleruaqqusanik” aalajangersaanissaq ineqarfiit ataasiakkaat pisariaqartitaannut naleqqussarneqarsinnaasunik, tak. Ilinniartut ineqarfii pillugit Namminersornerullutik Oqartussat nalunaarutaat.

Aalajangersakkami § 19-imi siunertarineqarpoq imigassanik aalakkoornartortalinnik inuusuttut akornanni tulluurtumik atuisalernissap siuarsarneqarnissaa pinaveersaartitsinermik suliaqarnermut atatillugu.

Imigassaq pillugu (imigassartortarnermut politikki) “Ineqarnermi maleruaqqusanik” aalajangersaanermut tunngatillugu kollegiani ilinniartinnut atasuni eqqarsaatigilluarneqartariaqarpoq kollegiamiunut ataasiakkaanut pisiaqanngitsumik namminneq inuunerannut akulerutinnginnissamik eqqarsaateqarnissaq.

Tassa eqqarsaatigisanut ilanngunneqartariaqarpoq ineqarnermi maleruaqqusat, ineqartunut ataasiakkaanut namminneq angerlarsimaffianni (ineqqami) kiffaanngissuseqarnerannut ima killilersuilersinnaanerit, allaat nalinginnaasumik nammineq aalajangiisinnaassuseqarnermut pisinnaatitaaffigisanut kalluaallutit, tassa nammineq angerlarsimaffigisami nalinginnaasumik pigineqartunut.

Akerlianik ataatsimoortarfittut atorneqartartuni annertunerusumik killilersuisoqarsinnaavoq.

Ulloq unnuarlu inuusuttunut ineqarfinnut tunngatillugu maleruaqqusanik aalajangersaasoqarsinnaavoq ulloq unnuarlu inuusuttunut ineqarfimmu siunertaasoq tunngavigalugu ingerlanneqarnissaanut naleqqussakkanik. Tamakku pissutsit tunngavigalugit imigassartortarnermut killilersuinerusumik politikkeqarnissamut pissutissaqartoqarsinnaavoq.

§ 20-mut

Kollegiat, atuarfiit ulloq unnuarlu ineqarfittaqtut imaluunniit inuusuttunut ineqarfiit aaqqissuussinernik ingerlatsissagunik imigassanik aalakoornartortalinnik sassaalliteqarfiusunik, taava tamatumunnga ataasiaannartumik atuuttussamik akuersissummik qinnuteqaateqartoqassaaq.

Kollegiat aamma atuarfiit ulloq unnuarlu ineqarfittaqtut kiisalu ulloq unnuarlu inuusuttunut ineqarfiit aaqqissuussinerup ingerlanneqannginnerani akisussaassuseqartumik sassaalliteqarnissamut aamma aaqqissuussinerup ingerlanneqarnissaanut pilersaarusioreersimassapput. Tamanna pillugu annertunerusumik § 25-mut oqaaseqaatit takukkit.

§ 21-mut

Imm. 1-imut

Aalajangersagaq tamanna pillugu maannamut aalajangersagaasimasunik ingerlatsitseqqinneruvoq aalajangersarneqarporlu akuersissut inimut ataatsimut imaluunniit ininut aalajangersimasunut attuumatinneqassasoq. Taakku saniatigut nutaatut ilanngunneqarpoq silami sassaalliteqarnissamut akuersissummik tunniussisoqarsinnaalernera. Ataatsikkoortumik inip iluani taamatullu silami nunaminertami sassaalliteqarsinnaanermut qinnuteqaammik tunniussisoqarpat, taava akuersissut akuersissutitut ataatsitut tunniunneqassaaq. Siusinnerusukkut inip iluani akuersissummik qinnuteqaateqartoqarsimappat kiisalu nunaminertami tamatumunnga atasumi silami sassaalliteqartarnissaaq kissaatigineqarpat tamatumunnga qinnuteqaateqartoqassaaq.

Imm. 2-mut

Akuersissummi erseqqilluinnassaaq ini imaluunniit silami nunaminertat piviusumik imigassanik aalakoornartortalinnik nioqquteqarfittut imaluunniit sassaalliteqartarfittut atorneqassanersut.

Imm. 3-mut

Taamatuttaaq imm. 3-mi aalajangersarneqarpoq init atorneqalinnginnerminni akuersissutigineqaqqaassasut. Akuersissutiginnikkut qulakkeerneqassapput pissutsit minnerpaamik isumannaallisaanermut piumasaqaatit sukkulluunniit atuuttut eqqortinneqassasut – aamma piumasaqaatit peqqinnissamut tunngasut.

§ 22-mut

Imm. 1-imut

Inuusutissarsiutigalugu imigassanik aalakoornartortalinnik sassaalliteqarnerit init imaluunniit silami nunaminertanit taamaallaat ingerlanneqassapput, taakku neriniartarfittut, hotelitut, cafétut, imerniartarfittut assigisaattulluunniit suliarineqarsimasuussapput taamatullu atorneqarnissaminnut akuersissutigineqarsimasuussallutik.

Aalajangersagaq maanna tikillugu inatsisaasumit ingerlateqqitaavoq aalajangersarneqarporlu init sassaalliteqartarfiusut, tamakkununga ilanngullugit init neriniartarfittut atorneqartut atorneqarfissaminnut pequsersorneqarsimassasut aamma atorneqalinnginnerminni akuersissutigineqareersimanissaat. Nutaatut tamatumunnga aammattaaq ilaatinneqarput silami nunaminertat.

Imm. 2-mut

Akuersissuteqartarnermut aalajangiisartut immikkut pissutsit pissutaatillugit tamatuma malinneqannginnissanut akuersissuteqarsinnaapput, tassa inaarutaasumik akuersissut amigaatigineqarpat, tamatumanilu pineqarpata amigaataasut soqutaanngitsut kiisalu tamatumani isumannaallisaanermut imaluunniit peqqissutsimut tunngasut pineqanngippata.

Aalajangersagaq nutaaq ilanngunneqarpoq aaqqissuussinernut takornariaqarnermik ingerlatsinernut attuumassuteqartoq, taamaaliornikkut erseqqissarneqarpoq ingerlatsinerni taamaattuni immikkut akuerineqarnissamik pisariaqartitsisoqarsinnaasoq.

Aalajangersakkami ilaatigut isumagineqarput aaqqissuussinernit takornarianut tunngasut soorlu assersuutigalugu angallammik attartornermut atatillugu. Tamatuma kingunerisaanik takornariaqarnermi sullissisut periarfissaqalissapput akuersissummik pissarsinissaminnut, naak sassaalliteqarneq inini imm. 1-imi taaneqartuni ingerlanneqanngikkaluartoq.

§ 23-mut

Eqqissisimanissamut aamma torersuutitsinissamut kiisalu suliffeqarfimmik ingerlatsinerup pisariaqanngitsumik allanut akornusersuutaannginnissanik qulakkeerinninnissamut iliuusissanik aalajangersaanissamut piginnaatitsissut atuutsiinnarneqarpoq. Aalajangersagaq taanna periarfissiivoq pinaveersaartitsinermut attuumassutilinnik ininik aaqqissuussinissanut, soorlu assersuutigalugu isaarissamik, imigassanik aalakoornartortalinnik nioqquteqarnermut sassaalliteqarnermullu atatillugu kamaattoqarnissaa aamma nakuusertoqarnissaa pinaveersaartinniartugit.

§ 24-mut

Imm. 1-imut

§ 24, imm. 1-imi akuersissuteqartarnermut aalajangiisartut kommuneqarfinni tamani pilersinneqassapput.

Akuersissuteqartartuni ilaasortat oqartussaasunit aamma niuerfinit, § 24, imm. 2-mi taaneqartunit toqqarneqartassapput. Akerlianik kommunalbestyrelse pisussaatinneqarpoq akuersissuteqartarnermut aalajangiisartunik pilersitsinissaminut.

Imm. 2-mut

Akuersissuteqartarnermut aalajangiisartuni ilaasortaassapput ilaasortat marluk kommunalbestyrelsimi ilaasortat akornanneersut, ilaasortaq ataaseq politiineersoq, ilaasortaq ataaseq ilaasortaq ataaseq pisiniarfinit aammattaaq takornariaqarnermik, akunnittarfinnik aamma neriniartarfinnik ingerlatsisut sinniisuutitaat Kalaallit Nunaanni Sulisitsisut (GE) toqqagaat, ilaasortaq ataaseq kommuneqarfimmi isumaginninnermik sammisaqarfimmi, ilaasortaq ataaseq atuarfeqarfimmit imaluunniit peqqinnissaqarfimmit, aammattaaq pinaveersaartitsinermut siunnersorti.

Imm. 3-mut

Soqutigisaqaqatigiit, suliffeqarfiit aamma ingerlatsiviit taaneqartut ilaasortamik ataatsimik toqqaassapput aamma ilaasortaatitamik sinniisussaamik.

Imm. 4-mut

Akuersissuteqartarnermut aalajangiisartut inissitsitsissapput imatut, siulittaasoq ataaseq, siulittaasup tullia ataaseq aamma ilaasortat tallimat.

Imm. 5-imut

Inatsimmi aalajangersakkani aalajangersarneqarpoq akuersissuteqartarnermut aalajangiisartut aalajangiissuseqassasut tamakkersimagaangamik. Imm. 5-imi aalajangersagaq, tassa akuersissuteqartarnermut aalajangiisartut tamarmiugaangamik aalajangiisinnaassuseqassasut pillugit, tamatuma qulakkiissavaa akuersissuteqartarnermut aalajangiisartut ilinniakkatigut sinniisoqarluarnissaat, akuersissummik suliassami aalajangersaaneq ingerlanneqaraangat. Taamaattumik aammattaaq sinniisoqarnissaannut aalajangersakkamik ilanngussisoqarpoq.

Akuersissuteqartarnermut aalajangiisartut namminneq suleriaasissartik aalajangersassavaat, tak. imm. 8.

Imm. 6-imut

Akuersissuteqartarnermut aalajangiisartunut ilaasortat aamma taakkununga sinniisussaasut akuersissuteqartarnermut aalajangiisartuni ilaasortaanerminnut atatillugu aamma ataatsimiinnerminni ilisimalikkaminut tunngatillugu nipangiussisussaataapput.

Imm. 7-imut aamma 8-mut

Akuersissuteqartarnermut aalajangiisartut namminneq suleriaasissartik suliarissavaat. Taamaattorli

Naalakkersuisut akuersissuteqartarnermut aalajangiisartut suliassaannut aamma suleriaasissaannut aalajangersakkanik aalajangersaasinnaapput.

Imm. 9-mut

Imm. 9-mi akuersissuteqartarnermut aalajangiisartut ininut, inimut aamma silami nunaminertanut suliffeqarfinnut atasunut, Inatsisartut Inatsisaannut matumunnga attuumassuteqartinneqartunut ilaasunut, misissuiartorlutik isersinnaatitaapput.

Misissuinnermut atatillugu akuersissuteqartarnermut aalajangiisartut piumasaqarfigineqarunik kinaassutsiminnik uppersaammik takutitaqassapput. Misissuilluni isersinnaatitaaneq ineeqqanut unnuiffissatut attartortinneqarsimasunut atuutinngilaq. Akuersissuteqartarnermut aalajangiisartut paasissutissanik imaluunniit atortussianik suliffeqarfimmut attuumassuteqartunik piumasaqarpata, taava akuersissummik pigisaqartup atortussat aamma paasissutissat tamakkununnga tunngasut tunniutissavai.

§ 25-mut

Imm. 1-imut

Imigassanik aalakoornartortalinnik nioqquteqarsinnaanermut/sassaalliteqarsinnaanermut qinnuteqaat akuersissuteqartarnermut aalajangiisartunut tunniunneqassaaq. Qinnuteqaat kommuneqarfimmut nassiunneqassaaq pisiniarfiup sumiiffigisaanut akuersissummik qinnuteqaateqarnermi najugaqarfigisaanut.

Imm. 2-mut

Nutaatut ilanngunneqarpoq imigassanik aalakoornartortalinnik nioqquteqarsinnaanermut/sassaalliteqarsinnaanermut aalajangersimasumik qinnuteqaammut suliffeqarfiup imigassartorneq pillugu politikkaa ilanngunneqartussanngorpoq.

Suliffeqarfiup imigassat aalakoornartortallit pillugit politikiani ilaasinnaapput assersuutigalugit killiliussat makkununnga tunngasut sulisut suliffimminiitillutik imigassat aalakoornartortallit pillugit qanoq pissuseqarfigissaneraat, qanoq eqqarsaatigineqarpat sulisut imigassanik aalakoornartortalinnik nioqquteqarnerminni aamma sassaalliteqarnerminni akisussaassuseqartumik pissuseqarnissaannut tunngasut pillugit, sulisut inunnik aalakoortunik il.il. akuerinninnginnissaannut suleriaatsit.

Imigassartortarnermut politikkip taamatuttaaq qulakkeersinnaavaa atorfeqartitat imigassamik ajornartorsiuteqartut ikiorasuarneqarnissaa, taamaaliornikkut ajornartorsiutit isertortumik ineriartorsinnaanerat pinngitsoorniarlugu tutsuiginninneq paatsoorneqartoq pissutigalugu.

Imm. 3-mut

Taamatuttaaq imm. 3 nutaajuvoq. Ataasiaannartumik atuuttussamik akuersissummik qinnuteqaateqarnermut atatillugu imigassartortarnermut politikki ilanngunneqartassanngilaq.

Ataasiaannartumik atuuttussamik akuersissummik §§ 16 aamma 17 tunngavigalugit akerlianik qinnuteqaateqarnermi ilanngunneqartassaaq aaqqissuussinermi sassaalliteqarnerup aamma ingerlatsinerup akisussaassuseqartumik ingerlanneqarnissaa pillugu pilersaarut.

Tamatumunnga siunertaavoq ilaatigut akuersissuteqartarnermut aalajangiisartut ilisimasaqarneq tunngavigalugu akuersissuteqarnissaat, aappaatigut qinnuteqaateqartup nammineq aaqqissuussinerup ingerlatinnginnerani eqqarsaatigeriissammagu aaqqissuussineq qanoq ingerlanneqassanersoq, taamatuttaaq pisut siunertarineqanngitsut qanoq iliuuseqarfiginissaat.

Soorlu assersuutigalugu inummik akisussaanerpaasussamik toqqaasoqarsinnaavoq, maleruagassiortoqarsinnaavoq imigassanik aalakoornartortalinnik inunnut aalakoortunut sassaalliteqarnermut aamma tamatuma qanoq isummerfigineqassaneranut tunngasunik, inuusuttunut 18-it inorlugit ukiulinnut maleruagassat inuusuttut 18-it inorlugit ukiullit aalakoortut qanoq iliuuseqarfigineqarnissaannut aamma kikkut attaveqarfigineqassanerannut, maleruagassat inunnut tulluannngitsumik aamma nakuuserniarnermik iliuuseqartunut tunngasut aamma ikuallattoqassagalarpat il. il. qanoq iliuuseqartoqassaneranut.

Tamakku saniatigut aaqqissuussineq pillugu paasissutissat akuersissuteqartarnermut aalajangiisartut pitsaannerusumik periarfissaqartilissavaat sillimaniarnermut imaluunniit peqqissutsimut tunngasunik amigaateqarnersoq, tamakkulu tunngavigalugit ataasiaannartumik atuuttussamik akuersissummik tunniussaqaarnissaaq eqqarsarnartoqarsinnaanersoq.

§ 26-mut

Imm. 1-imut

Akuersissut ukiuni 3-ni, soorlu siornatigut taamaattoq atuuttussatut tunniunneqassaaq.

Imm. 2-mut

Akuersissutinik ukiut pingasut inorlugit atuuttussanik tunniussisoqarsinnaavoq. Assersuutigalugu tamanna pisinnaavoq ukiup ilaata ingerlanerani niuertarfeqarnermi imaluunniit pissutsit allat pineqartillugit, tamakku sivikinnerusumik atuutsitsisoqarnissaanut tunngavilersuutaasinnaappata.

Imm. 3-mut

Imm. 3-mi aalajangersagaq taamatuttaaq periarfissaliivoq utaqqiisaagallartumik akuersissutinik tunniussisoqarsinnaaneranut.

Nangillugu imm. 3-mi erserpoq immikkut akuersissutit taamatut ittut, taamaallaat atuuttuusinnaasut akuersissuteqartarnermut aalajangiisartut akuersissut pillugu aalajangiinermik saqqummiussinissaasa tungaanut.

Aalajangersagaq mianersortumik atorneqartariaqarpoq erseqqilluinnartumillu saqqummiunneqassaaq akuersissut akuersissutaagallartuusooq. Akuersissummik qinnuteqaateqartumut taamatuttaaq ilisimatitsissutigineqassaaq akuersissutip utaqqiisaagallartumik

akuersissutaanera pillugu, kiisalu taamaallaat atuutissasoq akuersissuteqartarnermut aalajangiisartut inaarutaasumik aalajangersaanerata saqqummiunneqarnissaata tungaanut.

Taamatuttaaq qinnuteqaateqartumut ilisimatitsissutigineqartariaqarpoq utaqqiisaagallartumik akuersissuteqarnermut tunngatillugu qanorluunniit isummersuisoqassanngitsoq akuersissuteqartarnermut aalajangiisartut akuersissummik qinnuteqaateqarnermik suliaqarnerannut atatillugu.

Aalajangersagaq ilanngunneqarpoq akuersissuteqartarnermut aalajangiisartut suliaq suliarineqarnerata ingerlaneqalereernerani akuersissummik tunniussisinnaanerata akimmisaartinniarnagu, tassa akuersissuteqartarnermut aalajangiisartut nalilerunikku pisumi tassanerpiaq tulluartsinnaasoq tamatumalu saniatigut eqqarsarnartoqarnani utaqqiisaasumik akuersissummik tunniussaqaarnissaq. Soorlu assersuutigalugu tamatumani pineqarsinnaavoq ukiup ingerlanerani piffissami aalajangersimasumi niuernerq, tassanilu suliaasumik suliarinninnermi piffissaq ingerlasoq qinnuteqaateqartup isertitaqaarnissaanut annertuumik sunniuteqarsinnaalluni.

Imm. 4-mut

Nutaatut akuersissut piffissap akuersissutip atuuffiata ukiut pingasuusut naareerneranni akuersissut atajuartussaannerusutut piffissami ukiuni 6-ini sivitsorneqarsinnaalerpoq. Atajuartussaannerusutut akuersissummik tunniussaqaarnissamut piumasaqaataavoq akuersissummik tunniussineq sioqqullugu, piffissami akuersissummik pigisaqarfiusimasumi pissutsinik isornartorsiorneqarsinnaasunik pisoqarsimannginnera, tassa tamakku atajuartussaannerusutut akuersissummik tunniussaqaarnissamut, tak. imm. 4. akerliunngippata. Takuuk aammattaaq § 27-mi oqaaseqaatit.

Tamatumani siunertarineqarpoq inuussutissarsiutinik ingerlatsisut ingerlatsinerisa kipisaqattaannginnissaat, kiisalu imigassanik aalakoornartortalinnik nioqquteqarsinnaanermut/sassaallersinnaanermut akuersissummik qinnuteqaateqarnermut atatillugu allaffissornikkut suliaasumik oqilisaassinissaq.

Imm. 5-imut

Imm. 5 tunngavigalugu akuersissut isummaminik sivitsorneqassaaq imatut pisoqarsimappat piffissap akuersissuteqarfiusup suli naannginnerani akuersissummik pigisaqartoq sivitsuinissamut qinnuteqaammik nassiussaqaarsimalluni, kiisalu piffissaq akuersissuteqarfiusoq nutaaq pillugu inaarutaasumik aalajangersaasoqarsimanani piffissap akuersissummik pigisaqarfiusup naannginnerani. Taamatut pisoqartillugu akuersissut suli atuutissaaq akuersissuteqartarnermut aalajangiisartut aalajangersagaata saqqummiunneqarnissaata tungaanut, taamaattorli piffissap akuersissummik pigisaqarfiusup naanerata kingorna sivisunerpaamik qaammatini pingasuni.

Imm. 6-imut

Imm. 6-imi aalajangersagaq ingerlatseqqinneqarpoq tassaasoq piffissami akuersissutip atuuffiani akuersissut nutaamik isummerfigeqqinneqarsinnaasoq, tassa suliffeqarfimmi imaluunniit pissutsit piginnittumut tunngasut annertuumik allannguuteqarpata tamatumunnga ilanngullugit aningaasaqarnermut tunngasut. Aalajangersakkap oqaasertaani ersersinneqartutut pissutsit pineqartut annertuujusariaqarput.

Tamatumani assersuutigalugu pineqarsinnaapput allannguutit malunnaateqarluartut, soorlu aqutsisut akornanni allanngortoqarnera. Taamatuttaaq periaatsini allannguisoqarnera tassa akuersissuteqartarnermut aalajangiisartut akuersissummik tunniussaqaqarnerminnut tunngavigisimasaannit allaanerusut, tassaasinnaapput allannguutit malunnaateqarluartut. Niuertarfiup ingerlanneqarnerani periaatsinik nalinginnaasumik ineriartortitsinerit tunngavigalugu akuersissummik nutaanngortitsisoqassanngilaq; kommuneqarfimmit soqutigineqassaaq suliffeqarfiit tamarmik nutarterinissaat aamma naleqqussarnissaat. Kisianni igaffik atorunnaarsinneqarpat taava tamanna allannguutaassaaq malunnaateqarluartoq, tassa tamanna neriniartarfiunerminit imigassanik sassaalliteqarfimmut allanngortinneqarmat. Taamatuttaaq qitittarfissamik pilersitsineq siusinnerusukkut taamaallaat imigassanik sassaalliteqartarfittut atorneqartumi, tamanna allannguutaassaaq malunnaateqarluartoq, tassa tamanna imigassanik sassaalliteqarfittut atorneqarnerminit qitittarfittut (diskotek) allanngortinneqarmat.

§ 27-mut

Imm. 1-imut

Akuersissut tunniunneqarsinnaavoq nal. 05.00 tikillugu sassaalliteqarnissamut pisinnaatitaaffik ilanngullugu, tassani piffissami sassaalliteqarsinnaanerup killiliussat iluanni, §§ 42-mi aamma 43-mi takuneqarsinnaasunit.

Akuersissuteqartarnermut aalajangiisartut pisussaataitaapput inuiaqatigiinnut, ileqqorissaarnissamut aamma pinaveersaartitsinerimut mianerisassat isiginiassallugit, tassa akuersissuteqarnermik nalunaaruteqarnissamut nalilersuinerminnut atatillugu.

Tamatumani pingaaruteqartutut isigineqassaaq akuersissuteqartoqarnissaanut qinnuteqaateqartoq, pisortaasut imaluunniit siulersuisut allalluunniit akornanni suliffeqarfiup ingerlanneqarneranut aalajangiisuusussatut inissisimasut ilaat imatut ileqqulersorsimansoq, pissutissaqarluni isumaqartoqarnissaa suliffeqarfiup isumannaatsumik ingerlanneqarsinnaanera qularnaateqarluni.

Taamatuttaaq akuersissummik qinnuteqaateqartup piginnaasai ilanngunneqarsinnaapput, tamatumunnga ilanngullugit isummerfigineqassaaq qinnuteqaateqartoq neriniartarfimmik isumannaatsumik ingerlatsinissaminut naleqquttuunersoq, tamatuttaaq qinnuteqaateqartup aningaasatigut tunngavigisai ilanngunneqartariaqarlutik.

Ilanngullugu suliffeqarfiup inissisimanera isiginiarneqarsinnaavoq taamaaliornikkut nangaassutaasinnaapput suliffeqarfiit neriniartarfittut atorneqartussat ineqarfiit imaluunniit atuarfiit il. il. eqqaanni atuutilersinneqarnissaat akuerineqarsinnaanersoq. Assersuutigalugu tamatuma kingunerisinnaavaa akuersissuteqartarnermut aalajangiisartut aallaaviatigut suliffeqarfinnut ineqarfiit, imaluunniit timersorfiusartut, timersortarfiit assigisaasalu, tassa meeqqat inuusuttullu nalinginnaasumik najortagaasa eqqaanni akuersissummik atajuartussaanagerusutut tunniussisoqannginnissaa.

Akuerissuteqartarnermut aalajangiisartut eqqarsaataannut ilaatinneqassapput sumiiffimmi nioqquteqarfiit imaluunniit sassaalliuteqartarfiit ataatsimoortinneqarnerisa akisussaassuseqartumik imigassartornermi ileqqunik siuarsaasoqarsinnaanersoq, imaluunniit tamanna ileqqorissaarnermut akornusersuutaasinnaanersoq tamatumalu kingunerisaanik inuttut ajornartorsiutit pilerlutik, tamakkulu tunngavigalugit imigassanik aalakoornartortalinnik sassaalliuteqarsinnaanermut/ nioqquteqarsinnaanermut akuersissummik tunniussinissaq eqqarsarnartoqarluni.

Nalilersuitit siullerpaamik qinnuteqaateqartoqarnerani aamma sivitsuinissamik qinnuteqaateqartoqarnerani ilanngunneqassapput. Mianerisassat oqimaatigiissinnerat nalinginnaasumik assigiinngitsuusarput tassa qinnuteqaammik sivitsuinissamik nalilersuinermi, piffissaq akuersissutit atuuffigisimasaa nalilersuinermit ilanngunneqartussaammat.

Akuersissuteqartarnermut aalajangiisartut tamatumunnga ilanngussinnaavaat paasissutissat naak politiinit mianersoqqussuteqartarsimagaluartoq, siusinnerusukkut imigassamut inatsimmik arlaleriartumik unioqqutitsisoqartarsimasoq. Soorlu assersuutigalugit inuusuttunut 18-it inorlugit ukiulinnut imaluunniit inunnut malunnartumik aalakoortunut sassaalliuteqartarsimaneq, uteqqiattumik ingerlatsinermit il.il. atatillugu pissutsinik isornartoqartarsimasoq il. il.. Pissutsit tamakku tunngavigalugit isumaqartoqalersinnaalluni sassaalliuteqartarfik tamatumunnga assingusumik ingerlatiinnarneqarsinnaanngitsoq.

Nalilersuinermi ilanngunneqartariaqarput pissutsinut isornartunut tunngatillugu ataasiinnaq pineqarnersoq imaluunniit arlaliunersut, taakku suunerat aamma unioqqutitsinerit qanga pisimanagerat. Pissutsit piffissaq siviisooq qaangiutereersoq pisimappata taava nalilersuinermi pingaaruteqartinneqarnerat annikinnerusariaqarpoq.

Pingaaruteqartitsissusermik ileqqoq nalilersuinermi tamatigut ilanngunneqartassaaq, tassa imaappoq pissutsit qanoq ittuunerat itigartitsisinnaajunnaarnermut naleqqiullugu naleqqutissaaq.

Taamaattumik akuersissuteqartarnermut aalajangiisartut taamatut pisoqartillugu piviusumik nalilersuineq atortariaqarpaat, tassa pissutsinut isorineqarsinnaajunnartunut tunngatillugu

imigassanik aalakoornartortalinnik nioqquteqarsinnaanermut/sassaallersinnaanermut qinnuteqaateqarnermut qanoq sunniuteqarsinnaanerannut tunngatillugu.

Inatsisinik unioqqutitsinerit ilaat immikkut tunngaviusinnaapput isumaqalernissamut suliffeqarfiup isumannaatsumik ingerlanneqarsinnaannginneranut. Tamatumani pineqarput soorlu assersuutigalugit nakuusersimaneq, aanngajaarniutinik tuniniaasarsimanermut, imigassartorsimalluni biilersimanermik assigisaannillu pissuteqartumik eqqartuuneqarsimanerit.

Pinerluttulerinermut inatsimmik unioqqutitsinerit aamma inatsimmik allamik unioqqutitsinerit annikinnerusut kingunerisinnaavaat akuersissuteqartarnermut aalajangiisartut imigassanik aalakoornartortalinnik nioqquteqarsinnaanermut/sassaallersinnaanermut akuersissut piffissami sivikinnerusumi atuuttussanngorlugu tunniukkaat, tassa suliffeqarfimmik ingerlatsineq malinnaaffiginiallugu imaluunniit imigassanik aalakoornartortalinnik nioqquteqarsinnaanermut/sassaallersinnaanermut akuersissummut attuumassuteqartunik piumasqaateqarniarlutik.

Tamatumunnga ilutigitillugu taaneqassaaq unnerluutigineqarsimanerit kingusinnerusukkut pinngitsuutinneqarnermik kinguneqartut tunngavilersuutaassanngimmata. Unnerluussisoqarsimatillugu suli naammassineqarsimanngitsunik taava imigassanik aalakoornartortalinnik nioqquteqarsinnaanermut /sassaallersinnaanermut akuersissut piffissami sivikinnerusumi tunniunneqarsinnaavoq eqqartuussisoqarnissaata tungaanut.

Aammattaaq eqqarsaatigineqarsinnaapput pisut, tassa siullerpaamik qinnuteqaateqartoq neriniartarfinnut allannut imigassanik aalakoornartortalinnik nioqquteqarsinnaanermut/sassaallersinnaanermut akuersissummik pigisaqarsimasoq, pissutsillu taakku neriniartarfiit ingerlanneqarneranut tunngasut ataatsimoortumik nalilersuinermi ilanngunneqarlutik.

Taamatuttaa malugisariaqarpoq imigassanik aalakoornartortalinnik nioqquteqarsinnaanermut/sassaallersinnaanermut akuersissutip nutarterneqarnissaanut qinnuteqaateqartoqarnerani qinnuteqaateqartup pilersuisinnaanerminut tunngavigisaata ingerlaannarnissaa nalilersuinermi ilaatinneqartariaqarpoq siullerpaamik qinnuteqaateqartoqarneranut sanilliussilluni.

Akuersissuteqartarnermut aalajangiisartut inatsimmi killiliussat iluanni ataatsimoortumik ileqqussat sukannersut toqqarsinnaavaat, tassa qaqugu akuersissummik qinnuteqaateqartoq, pisortaatitaaq aamma allat imatut ileqqulerssimassanersut tamanna tunngavigalugu isumaqartoqalersinnaalluni suliffeqarfik isumannaatsumik ingerlanneqarsinnaajunnaartoq, tassa pisuni ataasiakkaani piviusumik nalilersuinermit atatillugu. Tamatumani ilaatigut ilaapput nalilersuinermi suliamut tunngasut mianerisassat ilaatinneqassapput, taamaaliornikkut akuersissuteqartarnermut aalajangiisartut (taamatut pinianngikkaluarlutik) qinnuteqaateqartut assigiinngitsumik pineqarnerat atornerqalerluni.

Tamatumunnga ilutigitillugu akuersissuteqartarnermut aalajangiisartut nalilersuisarnerat ima killeqartigissanngilaq pissusiviusut tunngavigalugit imigassanik aalakoornartortalinnik nioqquteqarsinnaanermut/sassaallersinnaanermut akuersissummik pissarsiaqarnissaq periarfissaajunnaartillugu. Qinnuteqaateqarnermut itigartitsinermit taarsiunneqarsinnaavoq akuersissummik killikkamik imaluunniit imatut atugassaqaartitsisumik naleqqutsinngitsuusinnaasunik pinngitsoortitsisoqarsinnaalluni.

Imm. 2-mut

Akuersissuteqartarnermut aalajangiisartut akuersissutinik tunniussaqaarsinnaapput, tassani sassaalliteqartarnermut pisinnaatitaaffik piffissamut siusinnerusumut killilerlugu, soorlu assersuutigalugu nal. 23.00-imut imaluunniit nal. 01.00-imut, pissutsit imaappata ilaatigut init torersuutitsinissamut attaveqaasersuutinilli mianerisassaqaarluni (ilanngullugit assersuutigalugu inissiaqarfiit) pineqarpata.

Atugassarititaasut aallat soorlu assersuutigalugu baarimi imaluunniit pubimi tassaasinnaapput imigassanik sassaalliteqartarfirmi ilaasinnaapput nerisassanik oqitsunik sassaalliteqartassasoq, taamaaliornikkut init atorneqartut akuersissummik ilaatinneqarlutik imaassanngimmata taamaallaat imigassartortitsiffiusut.

Akuersissuteqartarnermut aalajangiisartut aammattaaq itigartitsitsinissaq eqqarsaatigigunukku, itigartitsinatik akuersissummik tunniussisinnaallutik tamatuma kingunerisaanik imigassat kimikitsumik aalakoornartortallit taamaallaat sassaalliutigineqarsinnaallutik.

Akuersissummi aammattaaq piumasaqaatigineqarsinnaavoq suliffeqarfiup eqqaata mianerineqarnissaa, tassa suliffeqarfimmik ingerlatsinermit atatillugu akornusersuutaasinnaasut mianerinerisigut. Tamatumunnga assersuutitut taaneqarsinnaapput nipilersornerup nipianik akornusersuutaasut imaluunniit akornusersuutaasut orniguttartut nipiliorlutik assigisaanilluunniit ileqqulersorlutik aggertarnerat aamma ingerlasarnerat.

Akuersissuteqartarnermut aalajangiisartut qinnuteqaammik oqaluuserinninnerminnut atatillugu nalilerunukku akuersissummik tunniussisoqarsinnaanngitsoq, imaluunniit taamaallaat tunniussisoqarsinnaasoq piumasaqaatitalimmik taava akuersissuteqartarnermut aalajangiisartut qinnuteqaateqartoq ilisimatissavaat (tusarniaassuteqarfigissavaat) aalajangiinissaq pilersaarutigisartik pillugu, taamaaliornikkut qinnuteqaateqartoq periarfissaqarniassammat oqaaseqaateqarnissaminut tassa akuersissuteqartarnermut aalajangiisartut aalajangersaannginneranni.

Imm. 3-mut

Imm. 3 tunngavigalugu akuersissuteqartarnermut aalajangiisartut imigassanik aalakoornartortalinnik nioqquteqarsinnaanermut /sassaallersinnaanermut akuersissummik tunniussaqaartilutik, taava akuersissutip assilinera politiinut nassiutissavaat.

Imm. 4-mut

Imm. 4-mi aalajangersarneqarpoq akuersissuteqarnermut uppernarsaat pisiniarfiup iluani imaluunniit sassaalliteqartarfiup iluani takuneqarsinnaasunngorlugu inissisimatinneqassasoq. Aalajangersakkap misissuinissap ajornannginnerulernissanut tapertaassaaq.

Akuersissut arlaannik sumik pissuteqartumik atuarneqarsinnaajunnaarpat taava akuersissummik pigisaqartup taanna nutaamik taarsissavaa atuarneqarsinnaasunngorlugu.

Imm. 5-imut

Imm. 5-ip Naalackersuisut pisussaattippai atugassarititaasut aamma piunasaqaatit pillugit sukumiinerusunik aalajangersaanissamut, tassa akuersissummik tunniussaqaarnermut tunngatillugu ilaatinneqartussanut tunngasut.

§ 28-mut

Imm. 1-imut

Aalajangersakkami ingerlateqqinneqarput manna tikillugu maleruaqqusat atuuttut imigassanik aalakoornartortalinnik nioqquteqarsinnaanermut/sassaallersinnaanermut akuersissutip atorunnaarsinneqarnissanut tunngasut, taamaattorli imm. 2-mi akuersissummik pigisaqartup toqukkut qimagussimasup apparisaata akuersissummik ingerlatitseqqinnissamut periarfissinneqarpoq, nutaaq.

Atorunnaarsitsineq pissaaq kinaassusersiunngitsumik aamma pissutsit qularnaarneqartut tungavigalugit. Toquneq, nakkutigineqalernerq (nammineersinnaajunnaartitaaneq), akiliisinnaajunnaarneq aamma eqqartuussaaneq tamakku kinaassusersiunnginnermut assersuutaapput, pissutsit qularneqarsinnaasut.

Akuersissuteqartarnermut aalajangiisartut taakkuupput isummertussat akuersissutip atorunnaarneranut tunngatillugu.

§ 28, imm. 1-imi, normu 1-imit – 8-mut, pissutsit tullerriaarneqarput akuersissutip atorunnaarneranut tunngaviusut. Nalinginnaasumik pineqarput pissutsit akuersissummik tunngavissaqarnerup pigineqarunnaarneranut tunngaviusussat.

Imm. 2-mut

Akuersissummik pigisaqartoq toqukukkut qimagutsillugu, taava toqusup aappaa qimagaasoq imm. 2-mi aalajangersakkat tunngavigalugit akuersissummik ingerlatsiinnarsinnaavoq, piumasagaatit aalajangersimasut naammassineqarpata.

Aapparisaq akuersissummik pigisaqartoq taassuma toqukkut qimagunnissaa tikillugu inooqatigisimassavaa, kiisalu aapparisaq qimagaasoq ingerlatsinermut peqataasimassaaq akuersissummik pigisaqartup toqunissaata tungaanut.

Tamatuma saniatigut aapparisaq qimagaasoq § 4-mi aalajangersakkanik naammassinnissimassaaq. Aappaasoq qimagaasoq 25-nik ukioqalersimanngippat akuersissuteqartarnermut aalajangiisartut § 4, imm. 1-imi qassinik ukioqarnissamut piumasagaatit atortussaatinngitsissinnaavaat.

Imm. 3-mut

Imm. 3-mi periarfissiisoqarpoq toqusup qimataa, aapparisaq kingornussassat suliarineqartinnagit (agguaanneqartinnagit), akiliisinnaajunnaarnerup kingorna pigisat imaluunniit nammineersinnaajunnaarsitaasimasumut angajoqqaatut akisussaassuseqartuusup toqukkut qimaguttup, akiliisinnaajunnaarsimasup imaluunniit nammineersinnaajunnaarsitaasimasup suliffiutaanik ingerlatseqqissinnaanera, tamatumani taamaatikkiartuaarnissaa, tunineqarnissaa imaluunniit assingusumik pineqarnissaa imigassanik aalakoornartortalinnik nioqquteqarsinnaanermut/sassaallersinnaanermut akuersissummik nutaamik pigisaqartinnagu siunertaralugu.

Aalajangersakkap periarfissiissutigaa soorlu assersuutigalugu katisimmallugu aapparisaq, kingornussassat suliarineqartinnagit ingerlaannartoq, katissimallugu aapparisaq suliffeqarfiutaanik ingerlatsiinnarsinnaanera nutaamik imigassanik aalakoornartortalinnik nioqquteqarsinnaanermut/sassaallersinnaanermut akuersissummik nutaamik peqarnani, tassa suliffeqarfiup tunineqarnissaata tungaanut.

Taamaaliornikkut aalajangersakkat qulakkeerpaa katissimallugu aapparisaq qimagaasup pigisanik tulluurtumik isumannaarisinnaanissaminut piffissaqarniassamat.

Pissuseq taamaattoq akuersissuteqartarnermut aalajangiisartunut nalunaarutigineqassaaq.

Taamatut periarfissiineq toqukkut qimaguttoqarnerata, akiliisinnaajunnaarnermik nalunaaruteqarnerup imaluunniit nammineersinnaajunnaarsitaasimanerup kingorna taamaallaat ukioq ataaseq atuuppoq, kisianni akuersissuteqartarnermut aalajangiisartut pissutsit immikkorluinnaq ittut tunngavigalugit piffissarititaasumik sivitsuisinnaavoq.

Imm. 4-mut

Imm. 4-mi pissutsit pisortaaitap, aalajangersakkamik § 4, imm. 1, normu 2-miittumik naammassinnikkunnaarneranut tunngasut maleruagassaliunneqarput.

§ 29-mut

Eqqartuussiviit unnerluussisartut unnerluussinerat tunngavigalugu akuersissummik pigisaqartoq akuersissummik pigisaanik arsaarsinnaavaat. Imigassanik aalakoornartortalinnik nioqquteqarsinnaanermut/sassaallersinnaanermut akuersissummik pigisaqarnissamut pisinnaatitaaffik arsaarinnissutaasinnaavoq akuersissummik pigisaqartoq imigassanik aalakoornartortalinnik nioqquteqarsinnaanermut/sassaallersinnaanermut akuersissummi piumasaqaataasunik annertuumik imaluunniit arlaleriarluni imaluunniit inatsimmi aalajangersakkanik unioqqutitsisimappat.

Akuersissummik pigisaqartoq akuttunngitsumik arlaleriarluni unioqqutitsinermi pisuusimappat, taava tamanna pillugu arsaarinnissuteqarnermut piumasaqaataavoq pissutsit politiinit akuersissummik pigisaqartumut uparuarneqarsimanerat.

Akuersissummik pigisaqarsinnaanermut pisinnaatitaaffik eqqartuussivimmit arsaarinnissuteqarneq toqqarneqarsinnaavoq siumoortumik mianersoqqussuteqaqqaarnani, tassa eqqartuussiviup nalilerpagu unioqqutitsinerup annertussusia taamaaliornissamut tunngavissaasinnaasoq.

§ 30-mut

Aalajangersakkami malittarisassaliorneqarput pisortaatitat akuersissutigineqarsimanerminnik arsaarinniffigineqarsinnaanerat.

Eqqartuussivinni arsaarinninneq pissaaq inatsimmi aalajangersakkanik unioqqutitsisoqarsimappat imalluunniit pinerluttuliornermik pisoqarsimappat. Taamaalilluni piumasaqaataavoq eqqartuussivitsigut suliamik pillaassutaasinnaasumik ingerlatsisoqartoq kiisalu tamatuminnga pissuteqartumik eqqartuussiviup isummerfigisinnaagaa kinguneqartitsinissaq aamma pisortaatitatut akuersissutip atorunnaarsinneqarnissaanut apeqqut tunngassuteqartoq.

§ 31-mut

Suliassani arsaarinnissuteqarnermut tunngasuni aalajangersaanerit atuuttut eqqartuussivinnit aalajangerneqartassapput.

§ 32-mut

Imm. 1-imut

Aalajangersakkami pineqarpoq allaffissornikkut imigassanik aalakoornartortalinnik nioqquteqarsinnaanermut/sassaallersinnaanermut akuersissummik atorunnaarsitsisoqarnera. Imigassanik aalakoornartortalinnik nioqquteqarsinnaanermut/sassaallersinnaanermut akuersissut

atorunnaarsinneqarsinnaavoq patsisissaqarluartumik isumaqartoqarpat akuersissummik pigisaqartoq suliffeqarfimmik isumannaatumik ingerlatsiumanngitsoq imaluunniit ingerlatsisinnaanngitsoq.

Akuersissummik atorunnaarsitsineq akuersissuteqartarnermut aalajangiisartunit aalajangersarneqassaaq, tak. imm. 3.

Atorunnaarsitsinermi pissutaasariaqanngilaq pissutsit tassaasariaqanngillat inatsimmik unioqqutitsisimanerit kingunerisimasai.

Akerlianik immikkut tunngavissaqarluni isumaqartoqarsinnaassaaq akuersissummik pigisaqartup suliffeqarfimmik aarlerinanngitsumik ingerlatserusunngitsoq. Tamatumunnga ilaatigut ilaasinnaavoq neriniartarfiup imaluunniit sassaalluteqartarfiup *piffissami ingerlasimasumi* aarlerinaateqartumik ingerlanneqarsimasinnaanera.

Tamatuma assersuutigalugit pineqarput suliffeqarfik imatut ingerlanneqarpat ingasattumik imertoqartarnera, mamianartumik ileqqoqarneq imaluunniit inatsisunik unioqqutitsisarnerit ingerlanneqartarlutik. Imigassanik aalakoornartortalinnik nioqquteqarsinnaanermut/sassaallersinnaanermut akuersissummik atorunnaarsitsisoqarsinnaavoq soorlu assersuutigalugu akuersissummik pigisaqartup naammaginartumik isaatitsinermi nakkutilliititsinngippat, akuersissummik pigisaqartoq politiinik aggersaanngippat inatsisunik unioqqutitsinernik annertuunik pisoqartillugu soorlu kamaannernik imaluunniit nakuuserluni saassussinernik pisoqartillugu, imaluunniit akuersissummik pigisaqartoq sulisulluunniit arlaleriarlutik imigassartorsimappata mianersoqqussummik tunniussisoqareersimanerata kingornatigut.

Atorunnaarsitsineq aammattaaq pissutsit tunngavigalugit pisinnaavoq tukatsitsinerujussuaq pineqarpat, soorlu assersuutigalugit salisimannginneq aamma immiartorfinnik imaluunniit puiaasanik aseqqukunik katersuisimannginneq, saligaatsuutitsinnginneq assigisaallu.

Imigassanik aalakoornartortalinnik nioqquteqarsinnaanermut/sassaallersinnaanermut akuersissummik atorunnaarsitsineq aamma pisinnaavoq malunnartumik aalakoortunut nioqquteqarneq sassaallersinnaanermut inerteqqut unioqqutinneqarpat, takuuk § 44, imm. 1.

Akuersissummik pigisaqartup Akuersissuteqartarnermut Aalajangiisartut imigassanik aalakoornartortalinnik nioqquteqarsinnaanermut/sassaallersinnaanermut akuersissummik atorunnaarsitsinerat eqqartuussisunut ingerlateqqissinnaavaa.

Imigassanik aalakoornartortalinnik nioqquteqarsinnaanermut/sassaallersinnaanermut akuersissummik atorunnaarsitsinissamik eqqarsaateqarnermi piumasaqaatigineqassapput siullermeertumik qinnuteqaateqarnermut atatillugu itigartitsinermi piumasaqaatinik annertunerulaartunik, tassani pissutaarpiarput pisinnaatitaaffimmik pigineqareertumik

arsaarinninneq. Tamatuma saniatigut arsaarinninneq akuersissummik pigisaqartumut aningaasatigut annertuumik kingulerlussinnaammata.

Imm. 2-mut

Siullermeertumik unioqqutitsisoqartillugu imaluunniit annikinnerusunik sumiginnaasoqartillugu taava akuersissuteqartarnermut aalajangiisartut aammattaaq allakkatigut mianersoqqusummik tunniussinissaq toqqarsinnaavaat, tassani akuersissummik pigisaqartoq ilisimatinneqassaaq taamatut iliuuseqaaqqinnerit akuersissummik utaqqiisaagallartumik imaluunniit ataavartumik atorunnaarsitsinermik kinguneqassasoq.

Akuersissuteqartarnermut aalajangiisartut taamatuttaaq toqqarsinnaavaat akuersissummik pigisaqaannarnissamut piunasaqaatinik piunasaqaateqarnissartik.

Akuersissummik pigisaqartoq politiinit mianersoqqusummik tigusaqarsimappat taava akuersissuteqartarnermut aalajangiisartut atugassarititaasunik aalajangersaasinnaapput, taakku pissutsinik politiit mianersoqqussuteqarsimanerannut tunngasunik iliuuseqartoqaaqqinnissaanut pinaveersaartitsissapput.

Piunasaqaatit unioqqutinneqarpata taava akuersissuteqartarnermut aalajangiisartut imigassanik aalakoornartortalinnik nioqquteqarsinnaanermut/sassaallersinnaanermut akuersissut atorunnaarsikkallarsinnaavaat, imaluunniit pissutsit qanoq ittuunersut apeqqutaatillugu ataavartussamik.

Aalajangersakkami siunertaavoq ilaatigut najukkani oqartussaasut periarfissinniarlugit allaffissornikkut malittarisassaliornissamut imaluunniit tulluanngitsumik ingerlatsinernik, atornerluinermik, nakuusernernik imaluunniit inuusuttunut 18-it inorlugit ukiulinnut sassaalliteqarnernik il.il. unioqqutitsisarnerit killilersuinissamut periarfissinniarlugit.

Akuersissuteqartarnermut aalajangiisartut pisussaaffigaat pissutsinik nakkutiginnissallutik aamma pisussaapput akulerutissallutik ingerlatsinermi sumiginnaaneri pineqartillugit, naammagittaalliutinik piviusunik tigusaqartoqartillugu imaluunniit politiinit saaffiginnittoqartillugu.

Akuersissuteqartarnermut aalajangiisartut ornigulluni misissuititsinernik nammineerlutik ingerlatsisinnaapput, tak. § 24, imm. 10.

§ 33-mut

Imm. 1-imut

Pisortaatitap akuersissutigineqarsimanera atorunnaarsinneqarsinnaavoq patsisissaqarluartumik isumaqartoqarpat pisortaatitaq suliassaqartitaanernik isumannaatsumik ingerlatsiumanngitsoq.

Atorunnaarsitsineq allaffissornikkut ingerlanneqassaaq. Akuersissutigineqarsimanermik atorunnaarsitsinermi piumasaqaataavoq patsisissaqarluartumik isumaqartoqarnera suliassaqtitaanermik isumannaatsumik ingerlatsisoqannginnera. Atorunnaarsitsineq piviusorsiortumik tunngavilersorneqassaaq. Soorlu assersuutigalugu pisortaatitaq nakuuserluni pissusilersosimappat imaluunniit aanngajaarniutit il. il. pillugit inatsimmik unioqqutitsisimappat, tassani pineqartariaqanngilaq pissuseq pinerlunnermut tunngasoq, taava tamakku eqqarsaatinut ilaasariaqarput ilumut pisortaatitap suliassaminik isumannaatsumik ingerlatsineranut tunngatillugu.

Akuersissutigineqarsimanermik atorunnaarsitsinermut piumasaqaataasariaqarput pissutsit ajornerusut akuersissutigineqarnissamik qinnuteqaateqarnermut atatillugu itigartitsinermi piumasaqaatinik annertunerulaartunik, tassani pineqarmat pisinnaatitaaffimmik pigineqareertumik atorunnaarsitsineq.

Pisortaatitap akuersissutigineqarsimaneranik atorunnaarsitsinissaq eqqartuussisutigut ingerlatassanngortissinnaavaa.

Imm. 2-mut

Innersuussutigineqarput § 32, imm. 2-mi oqaaseqaatit.

§ 34-mut

Akuersissuteqartarnermut aalajangiisartut aaqqissuussinerup suli ingerlanneqannginnerani ilisimalerunikku akuersissummik pigisaqartup aaqqissuussineq isumannaatsumik ingerlassinnaanngikkaa, taava ataasiaannartumik atuuttussamik akuersissut arsaarinnissutigisinnaavaat.

Tamatumunnga assersuutaasinnaapput atugassarititaasut aalajangersarneqarsimasut eqqortinneqarsinnaannginnerat annertuumik ilimasuutigineqarsinnaanngitsut, imaluunniit isumannaallisaanermut pissutsit paasisutissiissutigineqartut tamakkulu akuersissummik pigisaqartumit iluarsineqarnissaat angumerineqarsinnaanatik.

§ 35-mut

Akuersissuteqartarnermut aalajangiisartut akuersissut arsaarinnissutigisinnaavaat piginnittoq pisortanut akiligassanik akilerneqareertussanik ikinnerpaamik 50.000 koruuninik akiligassaqarpat.

Aalajangersagaq atorneqarsinnaavoq ilimagineqarsinnaanngippat akuersissummik piginnittup akiligassami akilerneqartussanngorneri malillugit akilersuisinnaassanngitsoq.

Akuersissummik pigisaqartup pisinnaatitaaffigaa akuersissutip imminut utertinneqarnissaa, oqartussaasunut akiitsut akiligassaareersut 50.000 koruunit ikinnerulerpata.

Akuersissummik pigisaqartoq oqartussaasunut naafferaalluni akilersuinissaminut isumaqatigiissuteqarsimasoq akiitsoqarsinnaavoq 50.000 koruuninik amerlanerusunik, akuersissutip arsaarinnissutigineqarnissaa pisariaqassanngilaq, naafferaalluni akilersugassat akilerneqarfissaanni akilersorneqartillugit.

Aalajangersaaneq akuersissuteqartarnermut aalajangiisartunit aalajangersarneqassaaq.

§ 36-mut

Imigassanik aalakoornartortalinnik nioqquteqarsinnaanermut/sassaallersinnaanermut akuersissummik aamma akuersissutigineqarnermik §§ 32-miit – 35-mut tunngavigalugit arsaarinnissuteqarnerit pillugit naammagittaalliutit suliarineqartassapput kapitali 14-mi aalajangiinerit pillugit naammagittaalliuteqartarnermut aalajangersakkat tunngavigalugit.

Akuersissuteqartarnermut aalajangiisartut imigassanik aalakoornartortalinnik nioqquteqarsinnaanermut/sassaallersinnaanermut akuersissutit aamma akuersissutigineqarneq pillugit aalajangersaaneq Naalakkersuisunut naammagittaalliutigineqarsinnaapput. Naammagittaalliut akuersissuteqartarnermut aalajangiisartunit tiguneqareersimassaaq kingusinnerpaamik sapaatit akunneri sisamat qaangiutsinnagit, aalajangiinerup akuersissummik pigisaqartumut nalunaarutigineqareernerata kingorna. Akuersissuteqartarnermut aalajangiisartut naammagittaalliut tigoreerpassuk taanna Naalakkersuisunut ingerlateqqinneqassaaq suliami uppersaatit ilanngullugit. Naammagittaalliuteqarneq kinguartitsissutaasinnaasumik sunniuteqassanngilaq, imaanngippat Naalakkersuisut suliamut tunngarpiartut tunngavigalugit nalilersuereernikkut kinguartitsinissamik immikkut tunngavissaasumik nassaartut tamannalu kinguartitsisoqarnissaanut sunniuteqarsinnaalluni.

Tamakku saniatigut §§ 71-imit – 73-imut oqaaseqaatit innersuussutigineqarput.

§ 37-mut

Imm. 1-imut

Aalajangersakkami pineqartoq imigassanik aalakoornartortalinnik nioqquteqarsinnaanermut/sassaallersinnaanermut akuersissut atuukkunnaartup imaluunniit arsaarinnissutigineqartup ingerlaannartumik akuersissuteqartarnermut aalajangiisartunut utertillugu nassiuuneqarnissaa, tassaavoq manna tikillugu tamatumunnga maleruqqusanik ingerlatitseqqinneq.

Imm. 2-mut

Tamanna taamatutaaq imm. 2-mi atuuppoq tassa tamanna politiinut nalunaarutigineqassasoq.

§ 38-mut

Imm. 1-imut

§ 38-mi imigassanik aalakoornartortalinnik 16 volumenprocenteqartunik (viinni akusaq aamma imigassat kimittuut) taakkulu sinnerlugit kimittussusilinnik piffissat unioqqutitsinngitsumik nioqquteqarfiusut aalajangersarneqarput. Aalajangersakkami imigassamut aalakoornartortalit ammasarfiit malittarisassaliunneqarput tassa ulluinnarnik imigassatut kimittuutut taaneqartartut, taakkunungalu tunngatillugu ammasarfiit allannguuteqanngingajapput.

Taamaattorli nutaaq periarfissiissutigineqarpoq imigassanik aalakoornartortalinnik ukiutoqqami nal. 13.00-ip tungaanut nioqquteqarsinnaaneq. Tamatumani anguniarneqarpoq immikkut nioqquteqarnerup pitsaanerusumik ingerlanneqarsinnaanera ukiortaap nalliussineranut atatillugu. Naatsorsuutigineqanngilaq allannguutip ataatsimoortumik nioqquteqarnermik annertusititsinissaa tassa ukiortaarsiorluni nalliuttorsiornermut atatillugu pisareersunut tunngasumik.

Imm. 2-mut

Imm. 2-mi ullut taagorneqartut tassaapput imigassanik aalakoornartortalinnik nioqquteqarnerup inerteqqutaaffii.

Tamakku saniatigut Ilanngussaq 1 innersuussutigineqarpoq, tassani ammasarfiit skemanngorlugit takutinneqarput.

§ 39-mut

§ 39-mi imigassanik aalakoornartortalinnik 16 volumenprocentit angullugit kimittussusilinnik piffissat unioqqutitsinngitsumik nioqquteqarfiusut aalajangersarneqarput, taakku assersuutigalugit tassaapput cider, immiaqqat, viinnit assigisaallu.

Imm. 1-imut

Immikkoortuni taakkunani nioqquteqarfiusoq annertusineqarpoq siornatigut maleruaqqusanut sanilliussilluni. Ulluinnarni ammasarfiit nal. akunnerinik marlunnik sivitsorneqarput nal. 18.00-imiit nal. 20.00-imut aamma arfininngornikkut ammasarfiit nal. akunnerinik pingasunik sivitsorneqarlutik nal. 13.00-imit nal. 16.00-imut. Siornatigutulli imigassanik aalakoornartortalinnik sapaatikku nioqquteqartoqaqqusaanngilaq, aamma imm. 2-mi ulluni taaneqartuni.

Tamatuma saniatigut nutaatut periarfissiissutigineqarpoq imigassanik aalakoornartortalinnik ukiutoqqami nal. 13.00-ip tungaanut nioqquteqarsinnaaneq, tamatumani anguniarneqarpoq ukiortaap nalliussineranut atatillugu immikkut nioqquteqartarnerup pitsaannerusumik ingerlanneqarsinnaanera.

Imm. 2-mut

Imm. 2-mi ullut taagorneqartut tassaapput imigassanik aalakoornartortalinnik nioqquteqarnerup inerteqqutaaffii.

Tamakku saniatigut Ilanngussaq 1 innersuussutigineqarpoq, tassani ammasarfiit skemanngorlugit takutinneqarput.

§ 40-mut

§ 40-mi nerisassanik angerlaassassanik tuniniaasarfinnut (Diner Transportable) atatillugu imigassanik aalakoornartortalinnik tuniniaaneq malittarisassaliuunneqarpoq.

Nerisassanik angerlaassassanik tuniniaasarfinnut aalajangersakkanik atuuttunik ilaatigut uniuissumik ingerlatsisoqartarsimavoq kiisalu malitsinneqarnissaat ajornakusoorsimalluni.

Inatsisissatut siunnersuummi matumani allannguutit ilanngunneqarsimasutigut uniuissarnernik ajornartorsiutit akiorniarneqarput aamma nakkutigineqarnissaat. Tamatumunnga ilutigitillugu kissaatigineqarpoq nerisassanik angerlaassassanik tuniniaasarfinnik aaqqissuussinerup ingerlatiinnarneqarnissaa, kiisalu niuertarfiit taamatut ittut ingerlaannarnissaannut tunngavissaqartitsiniarluni.

Imm. 1-imut

Nutaatut ilanngunneqarput imigassat aalakoornartortallit qanoq annertussuseqarnissaannik killiliineq tassa nerisassanik angerlaassassanik pisiaqarnermut atatillugu. Imigassat aalakoornartortalli annertussusissaat nerisassanik pisiaqarnermut atatillugu annertunerpaamik nerisassat tunineranni akiisa 50 %-iattut inissinneqarpoq.

Killilersuinerup taassuma atuutilersinneqarneranut tunngaviuvoq ilaatigut uniuissumik ingerlatsisoqartarsimanera, tamatuma kingunerisaanik nerisassanut pisiarisanut naleqqiussilluni tulluanngitsumik annertussusilinnik imigassanik aalakoornartortalinnik nioqquteqartoqartarsimalluni, neriniartarfinniit nerisassanik angerlaassassanik aaqqissuussinermut atatillugu.

Imm. 2-mut

Ammasarfinnut maleruaqqusat imigassanik aalakoornartortalinnik nioqquteqarnermut atatillugu akuersissutinik pigisaqartunut allanut tunngaviusunut naleqqupput:

Nerisassanik angerlaassassanik tuniniaasarfinni pisinermut atatillugu imigassat aalakoornartortallit ammasarfiit ulluinnarni nal. 12.00-imiit – 20.00-imut pisinnaapput.

Imm. 3-mut

Imm. 3-mi aalajangersagaq nutaaq ilanngunneqarpoq sapaatini aamma ullut ilaanni taamaallaat imigassat aalakoornartortallit 16 volumenprocenti angullugu kimittussusillit, soorlu assersuutigalugit cider, immiaaqqat aamma viinnit, taamaallaat nioqqutigineqaqqusaallutik.

Imm. 4-mut

Imm. 4 nioqquteqarfiusutut aamma imigassanik sassaalliteqartarfiusutut allatulli atuuttutut, imigassat aalakoornartortallit taamaallaat nioqqutigeqqusaapput ininit taamatut atorineqartussanngorlugit akuersissutigineqarsimasunit.

§ 41-mut

Iliusissatut nutaajusutut siunnersuutigineqarpoq imigassat aalakoornartortallit niuertarfinni inissinneqartarnerannik maleruagassaliorneq. Tamatuma kingunerisaanik imigassat aalakoornartortallit pisiniarfimi nioqqutissanit allanit assiaqusersorneqassapput. Tamanna imigassanik aammattaq immiaaqqanut kiisalu viinninut atuuppoq.

Misissuinerni arlaqartuni takutinneqarpoq pisiaqartarnernut amerlasuunut takusinnaasat pisinissamut pilerisutsitsilersarnerat pissutaasoq. Taamatut malittarisassaliornermi nittarsaassinerup ajoqutaasumik sunnuteqartarnera isigineqassaaq ingammik meeqqanut aamma inuusuttunut, imigassamik aalakoornartortalimmik ataatsimut isiginninnerannut aamma inuunerminni kingusinnerusukkut imigassanut aalakoornartortalinnut tunngatillugu ileqqoqalernissaannut.

Taamaattumik malittarisassaliorneq imatut ingerlanneqarpoq kikkut tamat iserfigisartagaanni imigassat aalakoornartortallit takussaanginnerulernissaat kissaatigalugu, ingammik meeqqat aamma inuusuttut tulluanngitsumik sunnerneqarsinnaanerannut illersorniarlugit, taamatuttaaq meeqqat imigassanik aalakoornartortalinnik ulluinnarni nioqqutissatut nalinginnaasutut isinnilissanngimmata.

Imm. 1-imut

Niuertarfinni anginerusuni imigassanik aalakoornartortalinnik nioqqutissanit allanit assiaqusiineq inimik allammik immikkut isertarfilimmik pilersitsinikkut ingerlanneqassaaq.

Pisiniarfinni mikinerusuni allatut iliorluni imigassat aalakoornartortallit assiaquserneqassapput immikkoortumik immikkut pilersitsisoqarneratigut, tassani imigassat inissinneqassapput imaaliiallaannaq pisiniarfiup iniisa ilaanniit takuneqarsinnaatinnagit.

Imm. 2-mut

Pisiniarfinni mikinerusuni assiaqusersuinissami immikkut pequsersuinissamut aalajangersimasunik piumasqaateqangilaq. Pingaerneruvoq imigassat aalakoornartortallit imaaliiallaannaq takuneqarsinnaannginnissaat, tassa pisiniartoq nammineerluni qinissammat imigassanik aalakoornartortalinnik takusaqassaguni.

Pisiniarfimmi assiaqusersuineq soorlu assersuutigalugu imatut pisinnaavoq pisiniarfiup nerriviusartaata ataanut ilioqqaavilersuinikkut imalluunniit skuffiliinikkut, soorlu Islandimi imaluunniit Canadamisut iikkamik ilioqqaaviit matulersorneratigut.

Imm. 3-mut

Naalakkersuisut nerisassanik angerlaassassanik tuniniaasarfinni (Diner Transportable) init aaqqissuussaanerinit sukumiinerusumik aalajangersaasinnaapput. Maleruagassialiani imm. 1-imi aamma imm. 2-mi aalajangersakkat pisiniarfinni imigassanik aalakoornartortalinnik assiaqusersuineq malinneqartussanngortinneqarsinnaavoq.

Imm. 4-mut

Imm. 3-mi aalajangersagaq aalajangersarneqarpoq imigassat aalakoornartortallit imigassamik 16 volumenprocentimik taannalu sinnerlugu akoqartut imigassanik aalakoornartortalinnit assiaquserneqassasut ataasinngornermiit tallimanngornermut nal. 18-imiit kiisalu arfininngornikkut nal. 13.00-imiit, taamaalillutik imigassat taakku takuneqarsinnaassanatik.

Imm. 5-imut

Naalakkersuisut assiaqusersuinissamut tunngatillugu nalunaarummi aalajangersaassapput. Aalajangersakkani taakkunani ilaatigut nassuiaaserneqassapput pisiniarfiit anginerusut qanoq paasineqassanersut aamma pisiniarfiit mikinerusut qanoq paasineqassanersut. Nalunaarusiaq GE pisiniarfiillu suleqatigalugit suliarineqassaaq, nalunaarusiami nioqquteqarfiit pisiniarfinni anginerusuni mikinerusunilu killiliinissat pillugit isumaat siunnersuutaallu ilaaniassammata. Uani eqqarsaatigineqarpoq killiliinissamut suut tunngaviussanersut, assersuutiginnarlugu killiliinissamut naliliinermi pisiniarfiup kaaviiartitai areal-ialu ataatsimortillugit tunngaviussanersut imaluunniit immikkut tunngaviussanersut.

Taamatuttaa aalajangersarneqassapput assiaqusersuinerit inimi immikkoortumik immikkut isertarfilimmi, tak. imm. 1 aamma maleruagqusaliorneqassapput immikkoortunik pilersitsinikkut

assiaqusersuinissat, tak. imm. 2. Uani aamma GE pisiniarfiillu suleqatigalugit assiaqusersuinerit maleruagassaannik suliarineqassapput.

Tamakku saniatigut inatsisissatut siunnersuummi siunnersuutigineqarpoq Naalakkersuisut immikkut aalajangersakkanik pilersitsissasut pisiniarfinni assiaqusersuinerup, tak. imm. 1 aamma 2, piffissami qaqugu naammassineqarnissaanut tunngasumik.

§ 42-mut

Imm. 1-imut

Aalajangersakkami imigassanik aalakoornartortalinnik 16 volumenprocenteqartunik taakkulu sinnerlugit kimittussusilinnik (viinni akusaq aamma imigassat kimiittut) sassaalliuteqarnissamut piffissaq pineqartoq aalajangersarneqarpoq.

Ulluinnarni sassaalliuteqartoqarsinnaavoq nal. 12.00-imit 24.00-imut.

Tamatuma saniatigut tallimangornikkut, arfininngornikkut aammattaaq ulluni aalajangersimasuni immikkut taaneqartuni sassaalliuteqartoqarsinnaanera sivitsorneqarpoq. Ineriartorneq imaappoq illoqarfiliarnermi unnuarsuarmut ingerlaannartoqartarluni. Taamaattumik siunertarissaarneruvoq inatsit tamanna tunngavigalugu suliarineqarpat, taamaaliornikkut “nangikkiartarnerit” avatangiisini taakkunani ingerlanneqarnissaat, tassa taamatut atorneqartussatut naatsorsuussani, taamaaliornermilu ineqarfinni “nangikkiartarnerit” annikillisarneqarnissaannut tamanna tapertaasinnavoq.

Imm. 2-mut

Malugeqquneqarpoq sapaatini aamma nalliuttuni aalajangersimasuni viinni akusanik aamma imigassanik kimittuunik sassaalliuteqartoqaqqusaannginnera. Ulluni taakkunani imigassat aalakoornartortallit taamaallaat 16 volumenprocenti angullugu kimittussuseqartut (cider, immiaaqqat aamma viinnit il. il.) sassaalliutigeqqusaapput.

Tamatuma saniatigut ilanngussaq 1 innersuussutigineqarpoq.

Paatsoortoqarnissaa akiorniarlugu ulluni aalajangersimasunik viinni akusanik aamma imigassanik kimittuunik sassaalliuteqarnissamik inerteqquteqarnek, taava inatsimmi § 14-imi imigassanik aalakoornartortalinnik sassaalliuteqarnermi aalajangersagaq aalajangersarneqarpoq imm. 2-mi imigassap aalakoornartortallip immikkoortup akuata 16 volumenprocenti qaangissanngikkaa

§ 43-mut

Imm. 1-imut

§ 43-mi aalajangersarneqarput imigassanik aalakoornartortalinnik 16 volumentprocent angullugu kimittussusilinnik (cider, immiaaqqat aamma viinnit il. il.) sassaalliuteqarnissamut piffissaq aalajangersarneqarpoq.

Ammasarfiit ataatsimut isigalugit sivitsorneqarput inuiaqatigiinni nalinginnaasumik ineriartornerup kingunerisaanik, tamakkununga ilaapput takornariaqarneq assigisaalu. Tamatumunnga ilutigitillugu imigassat kimittoorujussuit (viinni akusat aamma imigassat kimittuut) sassaalliutigineqarsinnaanerit killilerneqarpoq, tassa pinaveersaartitsinermit tunngatillugu imigassanik aalakoornartortalinnik atuinermit ileqqut allanngortinneqarnissaat kissaatigineqarmat kimittuallaanngitsunik imigaqartalernikkut.

Taamaattumik cider, immiaaqqat aamma viinnit il. il. sassaalliutigineqarsinnaanerannut periarfissat annertusineqarput, tassa piffissani imigassanik kimittoorujussuarnik (viinni akusat aamma imigassat kimittuut) sassaalliuteqaaqusaanngitsuni.

Tamatuma saniatigut ilanngussaq 1 innersuussutigineqarpoq.

Imm. 2-mut

Malugineqassaaq sapaatikku aamma nalliuttuni assigiinngitsuni viinni akusanik aamma imigassanik sassaalliuteqartoqassanngimmat. Ulluni pineqartuni taamaallaat imigassat aalakoornartortalli 16 volumenprocenti angullugu kimittussusilinnik (cider, immiaaqqat aamma viinnit il. il.) taamaallaat sassaalliutigeqqusaapput.

Juulliaqqami 24. decembari aamma juullerujussuarmi 25. Decembari immikkut killeqartumik sassaalliuteqartoqarsinnaavoq, tassa taamaallaat piffissami 18.00 – 21.00-imut sassaalliuteqartoqarsinnaammat.

Imm. 3-mut

Imigassap imerneqartussamut akuliunneqartup annertunerpaamik volumenprocenteqarnissaanik killilerneqarneranut pissutaavoq volumenprocentip akuersissutigineqartup qaangerneqarnissaanik pinngitsoortitsiniarneq, tassa soorlu assersuutigalugu nioqqutissanik akooriikkanik imigassanik aamma sodavandinik akulinnik sassaalliuteqarnikkut.

Imm. 4-mut

Imm. 4-mi ataasiaannartumik atuuttussamik akuersissutini piffissaq sassaalliuteqarfiusinnaasoq aalajangersarneqarpoq. Sassaalliuteqarnermit aallaavigineqassaaq nal. 12.00-imit – 24.00-imut ingerlatsinissaq kisianni akuersissuteqartarnermit aalajangiisartut akuersissutigisinnaavaat (immikkut akuersineq) nal. 05.00-ip tungaanut sassaalliuteqarsinnaaneq. Immikkut akuersissuteqarneq immikkut ittunik pisoqartillugu tunniunneqarsinnaavoq, soorlu assersuutigalugit akunnaalliliilluni inuissiornermi, nalliuttorsiornermi, Inatsisartunut qinersinermit imalluunniit kulturikkut aaqjissuussinermit soorlu nipilersortunik tusarnaartitsisuni. Tamatumunnga atatillugu

malugineqassaaq imigassanik aalakoornartortalinnik 16 volumenprocenti angullugu kimittussuseqartunik (immiaaqqat aamma viinnit) taamaallaat sassaalliutigineqaqqusaammata. Ataasiaannartumik atuuttussamik akuersissutit aammattaaq imigassap imernejartussamut akuliunneqartup annertunerpaamik volumenprocenteqarnissaanik aalajangersakkamut ilaatinneqarpoq, tak. imm. 3.

Imm. 5-imut

Imm. 5-imi ilanngunneqarpoq ulluni immikkut ittuni piffissap sassaalliuteqarfiusinnaasup killilerneqarnera. Juulliaqqami aamma juullerujussuarmi taamaallaat sassaalliuteqartoqarsinnaavoq nal. 18.00-imiit - 21.00-imut, kiisalu Nunatta Ulluani piffissami nal. 18.00-imiit - 24.00-imut.

Taamatuttaa q takukkit inatsimmi § 17-imut ataasiaannartumik atuuttussamik akuersissutit pillugu oqaaseqaatit.

§ 44-mut

Imm. 1-imut

Aalajangersagaq taanna tunngavigalugu inummut takuneqarsinnaasumik aalakoortumut imigassanik aalakoornartortalinnik sassaalliuteqarneq inerteqqutaavoq.

Kinaassusersiornertaqqanngitsumik akisussaassuseqartoqarpoq. Innersuussutigineqarput § 49, imm. 4-mut oqaaseqaatit.

Imm. 2-mut

Akuersissummik pigisaqartoq tamanna pillugu takuneqarsinnaasumik allagarsiisimassaaq.

§ 45-imut

Imm. 1-imut

Nutaatut inerteqqutaalerpoq akuersissummik pigisaqartoq nammineq akuersissummik pigisaqartutut imaluunniit sulisut piffissami tassani sulisuusunut isersimasut peqatigalugit imigassanik aalakoornartortalinnik imigaqarnissaaq.

Tamatumali pisinnaajunnaartinngilaa akuersissummik pigisaqartoq imaluunniit tamatuminnga pisussaaffilerneqarsimasooq viinnimik katerisimaartussat imigassaannik misiliinissaa pisisartoq ilagalugu imaluunniit ilassinninnermut atatillugu viinnimik iggiserluni nerisinnaaneq.

Akuersissummik pigisaqartoq aammattaaq nammineq inuttut neriniartarfimmi akuersissummik pigisaqartutut pigisamini isersimasinnaavoq, tamatuttaa q sulisut sulinnigiffimmini neriniartarfimmi suliffigisamini isersimasinnaapput.

§ 46-imut

Aalajangersakkami aalajangerneqarpoq sassaalliteqartarfinni imigassanik aalakoornartortakitsunik aalajangersimasunik pisisoqarsinnaanissaa, taamatuttaaq imeq sikuligaq saqqumitinneqassasoq akeqanngitsumik atugassanngorlugu. Aalajangersakkami ingerlateqqinneqarpoq pisinnaatitaaffik atuutereersoq tassani ilaatigut qulakkeerneqarpoq isersimasut imigassanik aalakoortartortalinnik sakkortunerusunik imigaqarnissaminut pisussaasutut misigisimanginnissaat, ilaatigullu imermik akeqanngitsumik pisinnaanissaat, tassa isersimasup imerusunnermigut aamma puigornermigut nammineq kissaatigisaminiit annertunerusumik imigassamik imigaqassanngimmat.

§ 47-imut

Aalajangersakkami aalajangersarneqarpoq pisisartunut tamanut akigitinneqartut assigiissasut (assersuutigalugu takornarianut aamma tamaani najugaqartunut akigitigineqartut assigiit) Imerneqartussatut nioqqutigisanut akigitinneqartut takuneqarsinnaallutik saqqumitinneqassapput. Tamanna imatut paasineqassaaq pisisartooq periarfissaqassaaq akigitinneqartut pillugit paasisaqarnissaminut, soorlu assersuutigalugu neriniartarfiit viinninut allagartaanni.

§ 48-mut

Aalajangersagaq taanna nutaajuvoq akuersissummillu pigisaqartoq pisussaatinneqarpoq sulisuni akisussaassuseqartumik imigassanik aalakoornartortalinnik tuniniaanermut aamma sassaalliteqarnermut pikkorissarnernut peqataatittassagai. Akuersissummik pigisaqartup isumagissava sulisumi sulilernermin kingorna piffissap naleqquttup ingerlareernerani pikkorissarnernut neqeroortigineqartunut peqataanissaat. Pikkorissarnerit Naalakkersuisunit imaluunniit taamatut iliornissamut Naalakkersuisunit piginnaatinneqarsimasumit neqeroortigineqassapput.

§ 49-mut

§ 49 maannamut aalajangersakkanik ingerlatitseqqiineruvoq.

Imm. 1-imut

Imm. 1-imi aalajangersakkap inuusuttunut 18-it inorlugit ukiulinnut imigassanik aalakoornartortalinnik nioqquteqarneq aamma sassaalliteqarneq inerteqqutaatippaa.

Imm. 2-mut

Inerteqqut taanna takussutissiissutigineqassaaq imatut, akuersissummik pigisaqartup tamanna pillugu allagarsiussaq nioqquteqartarfinni - imaluunniit inimi sassaalliteqartarfinni imaluunniit allami nivinngassavaa, taannalu isersimasunit tamanit takuneqarsinnaassaaq, tak. imm. 2.

Imm. 3-mut

Imm. 3 allannguuteqarnani maannamut inatsimmi atuuttumeersuuvoq, tassanilu aalajangersarneqarpoq akuersissummik pigisaqartup imaluunniit taassuma taartaata isumagissagaa qulakkiissallugu suliffeqarfiup inuusuttunut 18-it inorlugit ukioqartunut nioqquteqartoqannginnissaa imaluunniit sassaalliteqartoqannginnissaa.

Imm. 4-mut

Aalajangersagaq imm. 4-miittoq maannamut inatsimmit ingerlateqqitaavoq aalajangersarneqarporlu inuusuttut 18-it inorlugit ukioqartut inini sassaalliteqarfiusartuni nal. 20-p kingorna taamaallaat isersimasinnaasut inersimasumik ingjallorneqarlutik, tassa inersimasoq ingjalluisoq tassaappat angajoqqaavata arlaat, nakkutiginnittorisaa imaluunniit inersimasut allat pineqartumut immikkut akisussaaffeqartuusut.

Taamaattorli imm. 4-mi naggammi kingullermi ileqqoq periarfissaliisoq ullumikkut atorqeersinnaareersoq, taassuma kingunerisaanik akuersissummik pigisaqartoq aamma taassuma sulisuisa pisussaaffigaat nakkutigissallugu inuusuttup 18-it inorlugit ukioqartup pissusissamisoortumik ingiaqatigisaqarnissaa.

Aalajangersakkami erseqqissaatigineqarpoq sassaalliteqartarfiit 18-it sinnerlugit ukioqartunut isersimaffissatut siullerpaamik naatsorsuussaasut.

Aalajangersagaq imigassanik aalakoornartortalinnik imertaleqqaarnerup siusippallaarnissaanik aamma tulluannigsumik imigassanik aalakoornartortalinnik atuinermi ileqqoqalernissamik killilersuissaaq. Taamatutaaq inuusuttut 18-it inorlugit ukioqartut pisunut namminneq aqussinnaangisaminut illersorneqarnissaat anguniarneqarpoq.

Aalajangersakkanik § 49, imm. 1 aamma imm. 4-miittunik unioqqutitsineq pineqarpat oqaatigineqassaaq tassani kinaassusersiornani akisussaaffik pineqartoq. Tamatumunnga tunngavilersuutaavoq kinaassusersiornernani akisussaaffiup akuersissummik pigisaqartup 18-it inorlugit ukioqartunut sassaalliteqarnissaminik soqutigisaqarnissaanut pinngitsoortitsinissaaq. Kinaassusersiornani akisussaaffimmut nassuiaassutaassaaq akisussaaffik tunniunneqassasoq kiap pisuussuteqarneranik nalilersuisoqartoqaaqqannani. Taamaattumik akuersissummik pigisaqartoq akisussaatinneqarsinnaavoq naak unioqqutitsinermut pineqartoq piaaraluneermik imaluunniit mianersuaalliornermik tunngaveqartumik pisuutinneqanngikkaluarluni; tassa imaappoq naak akuersissummik pigisaqartup ilisimasimangikkaluarpagu imaluunniit takusariaqarsimagaluarpagu, pissutsit qanoq ittuunerat.

Tamanna ilaatigut imatut isumaqarpoq, tassa naak akuersissummik pigisaqartoq imaluunniit nioqquteqarnermut imaluunniit sassaalliteqarnermut akisussaasuusooq isumaqaruni inuk 18-inik ukioqartoq, tamatumalu kingorna paasineqarpat inuk 18-it inorlugit ukioqartuusoq taava akuersissummik pigisaqartoq tassaassaaq unioqqutitsilluni nioqquteqarnermut imaluunniit sassaalliteqarnermut akisussaasooq, taannalu pissutsit qanoq ittuunerat tunngavigalugu unioqqutitsinermit akisussaatinneqassaaq.

Tamanna ajornartorsiutinik pilersitsisinnaavoq tassami kikkut tamarmik 18-it sinnerlugit ukioqartut assitalimmik kinaassutsiminnut uppernarsaammik pigisaqanngimmata soorlu biilernermit allagartamik imaluunniit pasimik. Taamaattorli tamatumala akuersissummik pigisaqartoq imaluunniit sulisut nangaassuteqartissanngilai inuussuttumut kinaassutsiminik uppernarsaammik takutitseqqusinissamut, tamatumala uppernarsarsinnaappagu imaluunniit ilimanarnerulersissinnaappagu inuusuttup 18-it sinnerlugit ukioqartuunera.

Taamaattumik akuersissummik pigisaqartoq imaluunniit sassaalliteqarnermut imaluunniit nioqquteqarnermut akisussaasuusooq pisariaqartillugu kinaassutsimut uppernarsaatit allat tutsuigisariaqarpai soorlu ilinniagaqarnermi allagartat, sumi najugaqarnermut uppernarsaatit assigisaallu.

§ 50-imut

Aalajangersakkap § 50-imiittup sulinermi suliarisassat killilerpai, tassa sulisut 18-it inorlugit ukiullit suliarisinnaasaat.

Imm. 1-imut

Inuusuttut 18-it inorlugit ukioqartut imigassanik aalakoornartortalinnik tuniniaanermik imaluunniit sassaalliteqarnermik toqqaannartumik suliaqaqqusaanngillat.

Tamanna imatut paasineqassaaq inuusuttut 18-it inorlugit ukioqartut sassaalliteqartarfinni, imigassanik aalakoornartortalinnik sassaalliteqarfiusuni, suleqqusaanngitsut. Inuusuttut igaffimmi il. il. inini tunorlarni erruisutut sulisorineqarsinnaapput, kisianni neriniartarfimmi suli isersimasoqartillugu nerrivinnik saliisuussanngillat.

Taamatuttaaq inuusuttut 18-it inorlugit ukioqartut viinninut immikkoortortaqarfimmi viinninik nioqquteqaqqusaanngillat.

Taamaattorli tamanna ilinniartunut aamma praktikkertunut inuusuttunut atuutinngilaq, taakku ilinniarnerminnut atatillugu nioqquteqarnermut aamma sassaalliteqarnermut peqataaneranni. Taamaattumik inerteqqut inuusuttunut atuutinngilaq taakku assersuutigalugu saqisunngorniarlutik imaluunniit viinninut immikkoortortaqarfimmi assigisaannilu ilinniarnerminnik ingerlatsineranni, tamanna inuusuttut ilinniagaannut ilaasutut ilanngutaappat.

Imm. 2-mut

Inuusuttut 18-it inorlugit ukioqartut ilinniarnerninnut atatillugu nioqquteqarnermut aamma sassaalliuteqarnermut peqataappata, taava tamatumunnga ilutigitillugu sulisut naammattut 21-t sinnerlugit ukioqartut najuutissapput. Sulisut 21-t sinnerlugit ukioqartut ima amerlassuseqassapput, ilinniartoq inuusuttoq imaluunniit praktikkertoq imaaliillaannarluni ikiorneqarnissaminut aamma ilitsersorneqarnissaminut periarfissaqassalluni.

§ 51-imut

Inuit 21-t inorlugit ukioqartut neriniartarfinni aamma sassaalliuteqartarfinni allani matulerinermik isumaginnittuusutut suliaqaqqusaanngillat.

§ 52-imut

§ 52 nutaajuvoq ilanngunneqarlunilu erseqqissaatiginiarlugu inuusuttup 18-it inorlugit ukioqartup nammineq inatsit unioqutissagaa, pineqartoq angut arnarluunniit imigassanik aalakoornartortalinnik sassaalliuteqarfigineqaruni, pisiguni imaluunniit allatut pissarsiniarsariguni.

Inuusuttoq aammattaaq nammineerluni akisussaavoq inatsimmik unioqutitsissaguni.

§ 53-imut

Maanna tikillugu soorlu taamaattoq sassaalliuteqartarfinnit imigassanik aalakoornartortalinnik annissassanik nioqquteqartoqaqqusaanngilaq. Tamatuma kingunerisaanik neriniartarfinni aamma inini sassaalliuteqartarfinni allani isersimasut imigassanik aalakoornartortalinnik piseqquusaanngillat tamatumalu kingorna taakku sassaalliuteqartarfinniit annillugit.

Annisassanik nioqquteqarsinnaanermut ilaatinneqanngillat maleruaqqusat tunngavigalugit nerisassanik angerlaassassanik tuniniaasarfiit (Diner Transportable).

§ 54-imut

Aalajangersagaq pisinnaatitaaffinnik ingerlatitseqqiineruvoq, tassa aalajangersarneqarpoq umiarsuarni umiarsualivinniittuni imigassanik aalakoornartortalinnik nioqquteqartoqassanngitsoq imaluunniit sassaalliuteqartoqassanngitsoq allanut, tassa taamaallaat umiarsuarmi ilaasunut.

§ 55-imut

Imm. 1-imut

Imm. 1-imi inini neriniartarfittut aamma sassaalliuteqartarfittut atorneqartuni taakku matoreernerisa kingorna nalunaquttap akunneranni ataatsimi isersimasinnaaneq periarfissiissutigineqarpoq.

Nalunaaquttap akunnerata taassuma isersimasut piffissaqalersissavai sassaalliuteqartarfimmit eqqissimasumik aamma naammaginatumik ingerlanneqartumik qimatsinissaat, taamaaliornikkut perulluliornermut ajornartorsiuteqarnissaat pinngitsoortinneqassammata.

Imm. 2-mut

Matusinissap tungaanut sassaalliuteqartoqaqqusaanngilaq taamatuttaaq piffissap inimi isersimaffiusup nalaani (isersimaffiusoq). Soorlu aalajangersakkani atuuttuni matunissaq sioqquutilaarlugu imigassanik aalakoornartumik akulinnik ima annertutigisumik sassaalliuteqartoqassanngitsaq, piffissap kinguleruttup isersimaffiusup nalaani nungunneqarsinnaanngitsunik imaluunniit ima annertussuseqartunik/amerlatigisunik naatsorsuutigineqarsinnaalluni annertuumik putumasoaqalernissaa.

§ 56-imut

Aalajangersagaq Imigassaq ikiaroorartorlu pillugit Siunnersuisoqatigiinnut tunngasoq tamanna pillugu aalajangersakkat oqaasertaanik ingerlatitseqqiineruvoq.

§ 57-imut

Aalajangersakkami ingerlateqqinneqarput maleruaqqusat angerlarsimaffinni imigassanik aalakoornartortaliornerup inerteqqutaaneranut tunngasut.

§ 58-imut

Imm. 1-imut

Imm. 1 nutaajuvoq kiisalu tassani inerteqqutigineqarpoq nittarsaassinernik suugaluartulluunniit aviisini neqerooruteqarfiusuni, aviisini akeqanngitsuni, tusagassiuutini ullormut saqqummersartuni, radiumi, tv-mi assigisaannilu aammattaaq nittartakkani kiisalu inoqatinut attaveqaatitigut ingerlatsisinnaaneq.

Tamatuma kingunerisaanik imigassanik neqerooruteqarnermik pilerisaarutit taamaallaat niuertarfiup ilaani imigassanik aalakoornartortalinnut atorneqartussanngorlugu immikkoortinneqarsimasumi ingerlanneqarsinnaapput, tamattuttaaq “happy hour” assigisaallu taamaallaat inip sassaalliuteqartarfiup isaariaata iluani – imaluunniit inip sassaalliuteqartarfiup iluani - pilerisaarutaasinnaallutik.

Atisani nittarsaassineq, tamakku nittarsaassinermit atorneqartussanngorlugit sananeqarsimappata (timersornermi atisat il. il.) imaluunniit niuertarfiit saqqaanni aammattaaq inerteqqutaavoq.

Meqqit, saqqarmiuusat, ilisarnaatit assigisaallu atoqqusaanngillat.

Taamaattorli akornutaassanngilaq neriniartarfiup imaluunniit sassaalliuteqartarfiup soorlu assersuutigalugu nipilersortunik tusarnaartitsisoqarnissaanut atatillugu pilerisaariguni suliffeqarfiup

aqqa aamma ilisarnaataa atorlugit. Taamaattorli pilerisaarineranut atatillugu suliffeqarfiup aqqa aamma ilisarnaataa atorneqartillugit, ilanngunneqassanngillat assit imaluunniit allassimasut imigassanik aalakoornartortalinnik innersuussisut.

Imigassanik aalakoornartortalinnik akuttunngitsumik annertoorejussuarmik ingerlanneqartartumik, pilerisaarinermik killiliineq tapertaassaaq aalakoorniutigiinnarlugu imigassartortartut amerlassusiisa ikilinerannut, kiisalu ingammik inuusuttut annertuumik atuinernannik annikillisaataassalluni inuunermilu kingusinnerusukkut imigassanik aalakoornartortalinnik atuinissamik ileqqunik naleqqunnerusunik pilersitsissalluni.

Nittarsaassinermut inerteqqut tupamut tunngatillugu ilisimaneqarpoq tassani tupamik nioqqutissianik nittarsaassinermut inerteqqut ullumikkut peqqissutsimut akornutaasumik aamma tulluanngitsumik ileqqoqalernissamut nalinginnaasumik illersuutaasutut isigineqarluni.

Imm. 2-mut

Kalaallit Nunaanni inatsimmi aviisit, atuagassiat, atuagassiat sapaatit akunneranut saqqummersartut aamma assiliat atorlugit tusagassiuutit nunanit allaneersut killilersorneqanngillat. Tusagassiuutit taakku siunertarinngilaat Kalaallit Nunaanni imigassanik aalakoornartortalinnik pilerisaaruteqarnissaq, kiisalu innuttaasut aviisinik, aamma atuagassianik sapaatit akunneranut saqqummersartunik pisisarnissaasa imaluunniit assiliat atorlugit tusagassiuutit allanik nunanit allaneersunik atuisinnaanerisa inatsimmi killilersorneqarnissaat siunertarineqanngilaq.

Imm. 3-mut

Immiaaqqanik aamma viinninik misiliititsiniarnerit pilerisaarutigineqarsinnaapput, aqqissuussinerit matoqqasuni peqataaniaraanni nalunaaqqaarfiusussani ingerlanneqarpata. Immiaaqqanik aamma viinninik misiliititsiniarnerit pilerisaaruteqarneq assitaqassanngilaq imaluunniit imigassanik aalakoornartortalinnik takutitsissanani, kisianni allatanik taamaallaat imaqassaaq.

Tamatuma ilaatinneqannginneranut ilaatigut pissutaavoq aqqissuussineq taamaattoq tamanut neqeroorutigineqarsinnaanngimmat tamanna pillugu pilerisaarisoqanngippat. Tamakku saniatigut immiaaqqanik aamma viinninik misiliititsiniarluni aqqissuussinerit ullumi pineqartumi kaaviiartitsineq annertunerussanngimmat sassaalliuteqarneq annertusiartortillugu, kisianni soqutigisaqartunut nioqqutissianik immikkut ittunik nioqqutigeriikkat akornanni saqqummiussinerulluni.

Imm. 4-mut

Imm. 4-mi tassani maleruaqqusat atuutereersut misilitassanik assigisaannillu tunniussisinnaanermut inerteqqutaasoq ingerlateqqinneqarpoq, tamatumani apeqqutaatinnagu misilitassaaq akeqanngippat imaluunniit akilertussaagaanni.

Aalajangersakkap imm. 4-miittup ilaatigut piffissamut sassaalliteqarfiusartumut aalajangersakkap unioqqutinneqarnissaa pinngitsoortissavaa, aappaatigullu misilitassanik tunniussisarneq pilerisaarinermut aamma nittarsaassinermut maleruaqqusat malillugit inerteqqutaassamat. Taamaattumik aammattaaq inerteqqummi ”sullitanut tunissutit” aamma nioqqutissat misiliutit ilaatinneqarput.

Taamaattorli akornutaassanngilaq niuertarfiup imigassanik aalakoornartortalinnik immikkut akikillisanik nioqquteqarsinnaanera. Taamaattumik niuertarfik suli immiaaqqanik, viinninik aamma imigassanik “akikillisanik nioqquteqarsinnaavoq”.

§ 59-imut

Maannamut ittutut automatit atorlugit imigassanik aalakoornartortalinnik nioqquteqarneq aamma sassaalliteqarneq inerteqqutaavoq.

§ 60-imut

§ 58-imi politiit periarfissalernerqarput inuit aalajangersimasut neriniartarfimmi imaluunniit sassaalliteqartarfimmi isersimatinneqarnissaat inerteqqutigisinnaalerlugu, soorlu assersuutigalugu inuk arlaleriarluni nakuuserluni ileqqulersortarsimappat imaluunniit allatut isersimasunut akornusersuisarsimappat, imaluunniit politiit qularnaarsimagunikku aangajaarniutit pillugit inatsimmik unioqqutitsisoqartoq.

Tamatumani piunasaqaatigineqanngilaq pissutsit pillaatigineqarsinnaasut eqqartuussinermi aalajangersarneqarsimasut.

Aalajangersagaq mianersortumik atorneqartariaqarpoq aamma pisariaqarpoq unioqqutitsinermi peqqarniisaarneq sanilliutissallugu, tassa inuit ilaat iseqqusaajunnaartinneqassappata sumik angusaqarnissamik kissaatigisaqarneranut. Taamaattumik tamanna inerteqquteqarnerup sivisussusiani takuneqarsinnaassaaq, tassa politiit piffissamik aalajangersaaneranni inuup neriniartarfimmut imaluunniit sassaalliteqartarfimmut iseqqusaajunnaarnerata sivisussusianik.

Inuusuttut 18-it inorlugit ukioqartut isersimasinnaanerannik inerteqquteqarnermut tunngatillugu taava assersuutigalugu inerteqquteqarnermut pissutaasinnaapput, sumiiffimmi sassaalliteqartarfimmut tunngarpiartumik nalilersuereernikkut tamanna inuusuttunut 18-it inorlugit ukioqartunut ajoqutaasinnaappat, imigassanik aalakoornartortalinnik il.il. atuinerlunnermik kinguneqarsinnaalluni.

§ 61-imut

Aalajangersagaq taanna atorlugu politiit eqqartuussisunik akuersititseqqaarnatik ininut assigisaannullu isersinnaalerput, naliliisoqarpat tamanna pisariaqartinneqartoq. Aalajangersagaq pisinnaatitaaffinni atuutereersunik ingerlatitseqqiineruvoq.

Aalajangersakkami politiit pisinnaatinneqanngillat eqqartuussisunik akuersititseqqaarnatik ineeqqanut unnuiffigisassanngorlugit attartortinneqarsimasunut isernissaminnut.

§ 62-imut

Imm. 1-imut

Nipiliorluni, nakuuserluni, ajuallatsitsiniarluni assigisaannilluunniit ileqqulersorneq inerteqqutaavoq, taamaaliorneq tassaasinnaappat tamat ornittagaanni eqqissisimasinnaanermik akornusertuutaalluni imaluunniit allanut tamaaniittunut imaluunniit eqqaani najugaqartunut akornusersuutaasumik kinguneqarsinnaappat, sumiiffinni imigassanik aalakoornartunik nioqquteqarfiusuni imaluunniit sassaalliuteqartarfiusuni.

Imm. 2-mut

Akuersissummik piginnittoq imaluunniit taassumunnga taartaasoq pissussaaffeqarpoq nakkutigissallugu imm. 1-imi inerteqqutaasup eqqortinneqarnera, tamannalu pisariaqassappat politiit ikioqqusinnaalluni.

Aalajangersagaq nutaajuvoq aamma ilanngunneqarpoq aammattaaq akuersissummik pigisaqartoq qulakkeerinninnissamut peqataaniassammat, kikkut tamarmik ingerlaarsinnaanissaannut akornusersuinernik taamatut ittunik nalaataqarnatik, taamatutaaq soorlu assersuutigalugu ilaqutariit meerartallit pisiniarfiliarsinnaassapput cafeliarsinnaassapput, meeqqat aamma inuusuttut taamatut tulluannigsumik ileqqulersuutininik nalaataqarnatik.

§ 63-imut

Aalajangersakkami politiit periarfissalerneqarput akulerussinnaanerminnut aamma imigassanik aalakoornartortalinnik nioqquteqarnerup imaluunniit sassaalliuteqarnerup ingerlaannartumik piffissap ammaffiusinnaasup sinnerani matusisoqarnissaanut, tassa eqqissiviilliornermik imaluunniit aalajangersakkanik annertuumik unioqqutitsisoqartillugu Inatsisartut Inatsisaannik matuminnga imaluunniit inatsimmik allamik, soorlu assersuutigalugu pinerluttulerinermut inatsimmik.

Pisoq taamak iliornissamut tunngaviusoq sumiiffimmi nioqquteqarfiusummi imaluunniit sassaalliuteqarfiusumi tassanerpiami pisimassaaq.

Politiit periarfissiineq taamaallaat periarfissiivoq nioqquteqarnerut imaluunniit sassaalliteqarnerup ullup imaluunniit unnuup sinnerani matusinissamut.

Imm. 2-mut

Politiit taamatut pisoqarnera ingerlaannartumik akuersissuteqartarnermut aalajangiisartunut nalunaarutigissavaat.

Akuersissuteqartarnermut aalajangiisartut tassaapput tamatuma kingorna isummertussat, akuersissummik pigisaqartup tungaanut allanik iliuseqartoqassaneranut tunngatillugu.

§ 64-imut

Imm. 1-imut

Aalajangersagaq nutaajuvoq aalajangersarneqarporlu politiit peqqussuteqarsinnaanerat nakuusernerit pinaveersaartinniarlugit niuertarfinni, neriartarfinni, hotelini aamma sassaalliteqartarfini allani tamanik iserfigineqarsinnaasuni ininik ilusilersuineranut pequersuinernullu tunngasut allanngortinneqarnissaannut.

Taamatut peqqussuteqarnissap nalunaarutigineqarnissaanut piunasaqaataavoq nioqquteqartarfimmi – imaluunniit sassaalliteqartarfimmi nakuuserniarluni ileqqulersortoqarsinnaanerata immikkut aarlerinaateqartoqarnera. Nakuusertoqarnissaanut immikkut aarlerinaateqartoqarsinnaanera aammattaaq siornatigut nakuusertarsimaneratigut imaluunniit taamatut iliortoqaqqajaalernikkut takussutissaqarsimasinnaavoq.

Taamaattumik piviusumik nalilersuineq tunngavigalugu isumannaatsuunissamik iliuseqarneq aallartinneqassaaq, tamatumani nakuusertoqarsinnaanera pinaveersaartinniarlugu imaluunniit taamaattoqalerneratigut pilertortumik akuleruttoqarsinnaanera anguniarlugu.

Isumannaallisaaanermut atatillugu ininik allanngortitsisoqarnissaa soorlu assersuutigalugu tassaasinnaapput isertarfiit isumannaallisarnissaat, tassunga ilanngullugit matut, saputaasat imaluunniit assingusut ninngusuunik taarserneqarnissaat. Aammattaaq kalerrisaarutinut tunngatillugu piunasaqaatitaqartoqarsinnaavoq, soorlu assersuutigalugu matulerisoq ikiortissarsiorsinnaavoq isaarissami kamaattoqaqqajaasoqalerpat imaluunniit assingusumik pisoqalerpat. Isumannaallisaaanermi pequtinut atatillugu peqqussuteqarsinnaavoq sassaallertarfimmi igalaat aseroneq ajortunik atuinisaaq.

Taamatuttaaq piunasaqaataavoq pissutsit piviusut tunngavigalugit pitsanngortitsisoqarsinnaanera.

Politiit, taamaaliornissaminnut periarfissaqarpat, isumannaatsuunissamut pissutsit akuersissummik pigisaqartumut oqaluuserisariaqarpat imaluunniit akuersissummik pigisaqartoq ilisimatillugu,

piumasaqaatit pisuni ataasiakkaani saqqummiussassat erseqqissumik suliarineqarnissaasa isummerfigineqannginneranni.

Imm. 2-mut

Isumannaallisaanermi iliuusissat pisariaqartut piviusunngortinnissaannut naammaginartumik piffissaliisoqassaaq. Piffissarititaasoq politiinit sivitsorneqarsinnaavoq iliuusissat piffissarititaasut aalajangiussap iluani piviusunngortinneqarsimanginnerannut naammaginartumik tungavissaqarpat.

Akuersissummik pigisaqartup peqqussutigineqartoq naammassisimangippagu, taava akuersissuteqarnermut aalajangiisartut politiinit inassuteqaateqartoqarnera tungavigalugu sassaalliteqarsinnaanermut akuersissut arsaarinnissutigisinnaavaat isumannaallisaanermut atatillugu ininut allanngortiterisoqarnissaanik piumasaqaataasup naammassineqarnissaata tungaanut.

Imm. 3-mut

Akuersissummik pigisaqartup politiit peqqussuteqarnerat naammagittaalliutigisinnaavaa. Akuersissuteqartarnermut aalajangiisartunut naammagittaalliut ingerlatinneqassaaq. Aallaavigineqassaaq naammagittaalliteqarneq kinguartitsinermik kinguneqarsinnaasoq. Taamaalilluni politiit peqqussuteqarnerat naammagittaalliutip suliarineqarnerata nalaani malinneqassanngilaq. Taamaattorli akuersissuteqartarnermut aalajangiisartunit aalajangersaaffigineqarsinnaavoq naammagittaalliutip kinguartitsisinnaanermik kinguneqannginnissaa.

§ 65-imut

Imm. 1-imut

Aalajangersakkami neriniartarfiit aamma sassaalliteqartarfiit allat peqquneqarput inunnik naammattumik amerlassusilinnik matulerisutut matulerisutut nakkutilliisuusussanik atorfinitsitsisaqqullugit.

Suliffeqarfiup pisussaaffigaa isumagissallugu inunnik naammattumik amerlassusilinnik sulisoqassalluni neriniartarfimmut imaluunniit sassaalliteqartarfimmut isernissamik isumaginnittussanik, taamaaliornikkut tamanna eqqissisimasumik aamma torersumik ingerlanneqassammat.

Suliffeqarfiit matulerisoqarneq pinngitsoorsinnaavaat eqqissisimasumik aamma torersumik pisoqarnissaata nakkutigineqarnissaa pisariaqanngippat.

Soorlu assersuutigineqarsinnaapput café imaluunniit neriniartarfiit allat suliffeqarfiup piffissat ammasarfii imaluunniit allatigut qanoq ittuunera pissutigalugit matulerisoqarnissamik pisariaqartitsinngitsut. Taamatutaaq suliffeqarfiit allat sassaalliuteqartartut ammasarfeqarsinnaapput, soorlu assersuutigalugu ulluunerani, sassaalliuteqartarnerup pisiniartunut avatangiisinullu akornutaanngitsumik sassaalliuteqarnermik ingerlatsisinnaasut matulerisoqarnissamik pisariaqartitsinatik.

Matulerisut inersimanagerusuussapput taamaattumillu inerteqqutaalluni inuusuttut 21-t inorlugit ukiullit taamatut sulisorinissaat, tak. § 51.

Imm. 2-mut

Imm. 2-mi ilanngunneqarpoq Naalakkersuisunut piginnaatitsissut, tamatumuuna Naalakkersuisut matulerisunik aamma matulerisuunermut tunngasunik allanik suliaqartartunik pinngitsaaliissutaasumik ilinniartitsisarnissamut tunngatillugu aalajangersaasinnaanissaannut.

§ 66-imut

Imm. 1-imut

Nakkutilliinermut oqartussaasut maannamut pisinnaatitaaffigaat misissuisinnaaneq, tassa inatsisimmi aalajangersakkanik unioqqutitsisoqartarnerseq. Aalajangersakkap taamatutaaq nakkutilliinermik oqartussaasut pisinnaatippai misissuisinnaanermut, tassa akuerissummik pigisaqartup akuersissummi aalajangersakkanik piunasaqaataasinnaasunik unioqqutitsinersoq.

Imm. 2-mut

Naalakkersuisut nakkutilliinerup ingerlanneqarnissaanut tunngasunik maleruaqqusanik aalajangersaasinnaapput.

Imm. 3-mut

Aalajangersagaq tunngavigalugu Naalakkersuisut imaluunniit taamatut pisussaatinneqartoq eqqartuussisup aalajangiinera tunngavigeqqaarnagu suliffeqarfimmut isersinnaatitaapput. Aalajangersagaq pisinnaatitaaffimmik atuuttumik ingerlatitseqqiineruvoq. Nakkutilliinermik oqartussaasut isersinnaatitaanerit sammisanit allanit ilisimaneqarpoq, tassa nakkutilliinernik ingerlatsiffiusuni.

Taamaattorli isersinnaatitaanermi matumani init unnuiffigisassatut attartortitat ilaatinneqanngillat.

§ 67-imut

Aalajangersagaq nutaajuvoq aamma Kalaallit Nunaanni pisortat suliffeqarfiutaanik tamanik imigassaq aalakoornartortalik pillugu politikkimik suliaqarnissamik peqqussuteqarpoq.

Imm. 1-imut

Suliffeqarfiup avataani ataatsimoornermi aaqqissuussinerni, taassuma ingerlanneqarnerani imigassanik aalakoornartortalinnik sassaalliteqartoqarluni, taava imigassaq pillugu politikkimut assersuutigalugu ilanngunneqarsinnaavoq qanoq ililluni aaqqissuussinermit imersimalluni angerlarnermi biilertoqannginnissaa. Ilasseqatigiinnernut imaluunniit nereqatigiinnernut atatillugu sassaalliteqarnermi ileqqut, sulisut isumasioqatigiinnernut sulisut pisortat suliffeqarfiutaansut allat peqatigalugit il. il.. Imigassaq pillugu politiktimi ilanngunneqartariaqarpoq ikiuinissamut pilersaarut, tassa suleqataasup imigassamik ajornartorsiuteqarsinnaanerata aallartinnerani.

Imm. 2-mut

Imm. 2-mi akuersissummik pigisaqartut paasisitsiniaanernut peqataanissaannut pisussaatinneqarsinnaapput, soorlu assersuutigalugu paasisitsiniaanerit ingasaassinani imigassartornermut tunngasut, biilit atunnginnissaat, naartunermi imigassamik aalakoornartortalinnik imigassartortoqannginnissaa assigisaannilu. Aalajangersaaneerup siunertaraa akuersissummik pigisaqartut peqquneqarsinnaanissaat atortunik paasititsiniutinik pisisartunut agguaasarnissaannut imaluunniit saqqumititsisarnissaat pisisartut namminneq tigusinnaaniassammatigik imaluunniit atortut paasititsiniutit tuniniaavinni sassaallertarfinnilu nappaalluni assiliarsuit assigisaallu pineqarpata.

Paasisitsiniaanerit taamaattut akuersissummik pigisaqartumut aningaasartuutaassanngillat.

§ 68-imut

Aalajangersakkani taakkunanani tikillugu inatsimmi atuussimasut ingerlateqqinneqarput Naalackersuisullu pisussaatinneqarput imigassanik aalakoornartortalinnik nioqquteqarsinnaanermut/sassaallersinnaanermut akuersissutinik tunniussinerni imaluunniit nutarterinerni aammattaaq § 18 tunngavigalugu atsiuinerni sukumiinerusunik maleruaqqusaliornissamut. Naalackersuisut sukumiinerusumik maleruaqqusaliorsinnaapput akitsuutip annertussusissaanut aamma qanoq akilersinneqarnissaanut. Akitsuut Nunatta Karsianut akilerneqartassaaq.

§ 69-imut

Aalajangersagaq manna taamatutaaq Naalackersuisut piginnaatinneqarnerannik atuuttumik ingerlatitseqqiineruvoq. Aalajangersakkat itisilernerqarput inatsimmi ersarinnerulersillugit qanoq pisoqartillugu Naalackersuisut malittarisassiornissamut nioqquteqarsinnaanermut sassaallersinnaanermullu. Naalackersuisut malittarisassiorsinnaapput nioqquteqarsinnaaneq sassaallersinnaanerlu unitsillugit soorluttaaq Naalackersuisut immikkut ittunik aaqqissuussisinnaasut nioqquteqarsinnaanermut sassaallersinnaanermullu kommunip illoqarfiinut

nunaqarfiinullu aalajangersimasunut (assersuutigalugu Tasiilaq kisianni Nuuk pinnagu imaluunniit illuatungaanut).

Soorlu aamma atuuttoq maanna siunissami periarfissaavoq illoqarfiup nunaqarfiulluunniit nammineq aalajangersinnaagaa nalunaarusiornissaq pineqartumi. Nalunaarusiami tassani maleruagassat aalajangersarneqarsinnaapput imigassanik aalakoornartuni nioqquteqarsinnaaneq sassaallersinnaanerlu unitsinneqassasut. Taamaattuni aalajangiineq illoqarfimmi nunaqarfimmiluunniit pisinnaavoq taasititsinikkut.

Imm. 2-mut

Naalakkersuisut maleruagassanik pilersitsisinnaapput suliffeqarfinni imigassat aalakoornartortallit imerneqartarnerannut tunngasunik.

Imm. 3-mut

Naalakkersuisut aalajangersakkanik aalajangersaasinnaapput sumiiffinni kommuneqarfiit aggornerisa avataanniittuni imigassanik aalakoornartortalinnik nioqquteqarsinnaanermut/sassaallersinnaanermut akuersissuteqartarnerit arsaarinnissuteqartarnerillu pillugit.

Taamatuttaaq Naalakkersuisut aalajangersakkanik aalajangersaasinnaapput imm. 1-imi taaneqartutut ittunik sumiiffinni kommuneqarfiit aggornerisa avataanniittuni atuuttussanik.

Imm. 4-mut

Naalakkersuisut umiarsuarni imigassanik aalakoornartortalinnik tuniniaanermut aamma sassaalliuteqarnermut aalajangersakkanik aalajangersaasinnaapput.

§ 70-imut

Imm. 1-imut

Aalajangersakkami aalajangersarneqarpoq akuersissuteqartarnermut aalajangiisartut taakku tassaasut imigassanik aalakoornartortalinnik nioqquteqarsinnaanermut/sassaallersinnaanermut akuersissutinik aamma akuersissutaasunut tunngatillugu sulianut aalajangersaasartut.

Imm. 2-mut

Piomasagaammik aalajangersaasoqarpoq akuersissuteqartarnermut aalajangiisartut aalajangiineri allaganngorlugit nalunaarutigineqartassasut.

§ 71-imut

Imm. 1-imut

Akuersissuteqartarnermut aalajangiisartut aalajangiineri pillugit naammagittaalliutit Naalakkersuisunit suliarineqartassapput.

Imm. 2-mut

Naammagittaalliut akuersissuteqartarnermut aalajangiisartunut nassiunneqassaaq, tamatuma kingorna naammagittaalliut Naalakkersuisunut ingerlateqqissavaat suliamut tunngasut ilanngullugit.

Naammagittaalliut aalajangiinerup tiguneqarnerata kingorna sapaatit akunneri sisamat qaangiutsinnagit tunniunneqarsimassaaq. Taamaattumik inassuteqaatigineqarpoq naammagittaalliorluni allakkat tammarnaveeqquserlugit nassiunneqarnissaat, nalinginnaasumik allakkerisarfikkut nassiussineq atorneqarpat.

Aallaavigineqarpoq kingusinnerpaamik piffissarititaasoq allakkat tiguneqarfiat aallaavigalugu aallartissasoq, tak. siulianiittoq. Akuersissuteqartarnermut aalajangiisartut aalajangiinerat qinnuteqaateqartumut imaluunniit akuersissummik pigisaqartumut allakkerisarfikkut nalinginnaasumik allakkatigut nassiunneqarpat, taava piffissamut tigusiffiusumut ilanngunneqassaaq piffissaq allakkat nalinginnaasumik ingerlaartarnerat. Taamaattorli ilaatigut allakkat allakkeriviit aqputigalugit nassiunneqartut sivisunerusumik uninngasarput, kiisalu allakkat tammarnaveeqquserlugit nassiunneqarsimangippata uppersaruminaassinnaavoq allakkat sivisunerusumik ingerlaarsimanagerat.

Assersuutitut taaneqarsinnaasoq tassa akuersissuteqartarnermut aalajangiisartut aalajangiinertik nassiuppat 25. oktobari. Allakkat nalinginnaasut ullut pingasut ingerlanerini tigusissamut apuuppata, taava aalajangersaanagerup tiguneqarnera 28. oktobarimut aalajangerneqarpoq, imaangippat pissutsit immikkut ittut tassani atuussimasut.

Naammagittaalliutip piffissarititaasoq eqqorlugu apuussimanageranut tunngatillugu Naalakkersuisut naammagittaaliuteqarfiusutut aalajangersaasinaapput. Naalakkersuisut aalajangersarsinnaavaat naammagittaalliutip kinguartitsinermik kinguneqarsinnaanera, tassa Naalakkersuisut pissutissaqarsorigunikku malittarisassap pingaanagerup, tassaasup naammagittaalliut kinguartitsinermik kinguneqarsinnaangitsoq, saneqqunneqarsinnaasoq.

Imm. 3-mut

Akuersissuteqartarnermut aalajangiisartut naammagittaalliut tigoreerunikku taanna Naalakkersuisunut ingerlateqqissavaat suliamut tunngasut tamaasa ilanngullugit.

Imm. 4-mut

Aalaavigineqassaaq naammagittaalliuteqarneq kinguartitsinermik kinguneqarsinnaannginnera, kisianni Naalakkersuisunut soorlu assersuutigalugu aalajangiisnaapput akuersissummik pigisaqartoq suliffeqarfimmi ingerlatsisinnaasoq suliap sularineqarnerata ingerlanerani.

§ 72-imut

Imm. 1-imut

Naalakkersuisunit aalajangiinerit aalajangersarneqartut oqartussaasut allaffeqarfiinut allanut ingerlateqqinneqarsinnaanngillat.

§ 73-imut

Aalajangersakkami saqqummiunneqarput inatsimmi aalajangersakkanik unioqqutitsisoqarnerani kinguneqartitsissutaasinnaasut.

Politiit pillaaammik akiliisitsinissamut periarfissaqarnerat unioqqutitsinermik pilertortumik kinguneqartitsinissamut periarfissiivoq naatsorsuutigineqarporlu tamanna imigassamut inatsimmik unioqqutitsisarnerit amerlinissaannut pinaveersaartitsiumaartoq.

Imm. 1-imut

Akiliisitsinermik pineqaatissiissuteqartoqassaaq unioqqutitsinernut makkununga

- 1) aalajangersakkat normu 1-imi taaneqartut
- 2) unioqqutitsinerit aalajangersakkanik piumasaqaataasunik makku malillugit § 10, imm. 4, § 16, imm. 3 aamma § 27, imm. 2., kiisalu
- 3) politiit makku § 58, § 61, imm. 1. malillugit peqqussutaannik unioqqutitsinerit

Imm. 2-mut

Aalajangersakkami periarfissiissutigineqarpoq pillaaammik akiliisitsinnissaq Inatsisartut Inatsisaanni matumani aalajangersakkanut akerliusumik pisisoq, pissarsisoq imaluunniit.

Imm. 3-mut

Aalajangersakkami aalajangersarneqarpoq maleruaqqusanik unioqqutitsisoqartillugu akiliisitsisoqartarnissaa aamma arsaarinnissuteqartoqartarnissaa Inatsisartut Inatsisaat manna tunngavigalugu maleruaqqusatigut aalajangersarneqarsinnaasut.

Imm. 4-mut

Aalajangersakkami pineqarpoq kinaassusersiunngitsumik akisussaassuseqartoqarnera. Tamatuma saniatigut § 49-mut oqaaseqaatit innersuussutigineqarput.

Imm. 5-imut

Aalajangersakkamik periarfissaliisoqarpoq imigassat aalakoornartortallit angerlarsimaffinni imigassaliat aamma atortussat aalakoornartortalinnik angerlarsimaffinni imigassaliornissamut atorineqarsinnaasut arsaarinnissutigineqarsinnaanerannut.

Imm. 6-imut

Imm. 6-imi aalajangersagaq periarfissaliivoq Inatsisartut Inatsisaat manna tunngavigalugu malittarisassat suliarineqartut tunngavigalugit inuit inatsisitigut akisussaasut pillammik akiliisussanngortinneqarsinnaanerannik pinerluttulerinermut inatsit tunngavigalugu.

Imm. 7-imut

Pillaammik akiliisitsissutit aamma arsaarinnissutigineqartut Landskarsimut ingerlatinneqasapput.

§ 74-imut

Aalajangersakkami saqqummiunneqarput piffissaq atortuulersitsiffiusoq aammattaaq ikaarsaariarnermi aalajangersakkat.

Imm. 1-imut

Inatsisartut Inatsisaat atuutilerpoq 1. juli 2017.

Imm. 2-mut

Inatsisartut Inatsisaata atuutilerneratigut Inatsisartut Inatsisaat nr. 11, 11. november 2000-imeersoq imigassanik aalakoornartortalinnik nioqquteqartarneq sassaallertarnerlu pillugit kingusinnerusukkut Inatsisartut Inatsisaatigut nr. 3-kkut 2001-imeersukkut allanngortinneqartoq atorunnaarsinneqarput.

Imm. 3-mut

Nalunaarutit aamma maleruaqqusaliat allat imigassanik aalakoornartortalinnik nioqquteqartarneq sassaallertarnerlu pillugit Inatsisartut Inatsisaat nr. 11, 11. november 2000-imeersoq aamma Inatsisartut Inatsisaat nr. 3, 2001-imeersoq tunngavigalugit aalajangersarneqarsimasut atorunnaarsinneqarnissamik tungaanut atuutissapput.

Imm. 4-mut

Imigassanik aalakoornartortalinnik nioqquteqarsinnaanermut/sassaallersinnaanermut akuersissutit inatsisip matuma atortuutilerfia sioqqullugu tunniunneqarsimasut atorunnaarnissamik imaluunniit inatsit manna tunngavigalugu atorunnaarsinneqarnissamik tungaanut atuutissapput.

§ 75-imut

Aalajangersakkami aalajangersarneqarput inatsit atuutinngitsoq, sumiiffinni illersornissaqarfiusuni Kalaallit Nunaata illersorneqarnissaa pillugu isumaqatigiissutit tunngavigalugit.